

# Holy Bible

*Aionian* Edition®

भगवान ना खरला बोल

**Palya Bareli Bible**

[AionianBible.org](http://AionianBible.org)

The world's first Holy Bible untranslation

100% free to copy and print

also known as "The Purple Bible"

*Holy Bible Aionian Edition* ®

भगवान ना खरला बोल  
Palya Bareli Bible

CC Attribution NoDerivatives 4.0, 2018-2024

Source text: eBible.org

Source version: 2/21/2024

Source copyright: CC Attribution 4.0

The Word for the World International, 2020

Formatted by Speedata Publisher 4.19.2 (Pro) on 5/4/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

*Celebrate Jesus Christ's victory of grace!*



# Preface

Bareli, Palya at [AionianBible.org/Preface](http://AionianBible.org/Preface)

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at [eBible.org](http://eBible.org), [Crosswire.org](http://Crosswire.org), [unbound.Biola.edu](http://unbound.Biola.edu), [Bible4u.net](http://Bible4u.net), and [NHEB.net](http://NHEB.net). The Aionian Bible is copyrighted with [creativecommons.org/licenses/by-nd/4.0](http://creativecommons.org/licenses/by-nd/4.0), allowing 100% freedom to copy and print, if respecting source copyrights. Check the Reader's Guide and read online at [AionianBible.org](http://AionianBible.org), with Android, and TOR network. Why purple? King Jesus' Word is royal... and purple is the color of royalty!



# Table of Contents

## NEW TESTAMENT

मत्ती .....	11
-------------	----

## APPENDIX

Reader's Guide

Glossary

Maps

Destiny

Illustrations, Doré





# NEW TESTAMENT



## The Crucifixion

*"Jesus said, 'Father, forgive them, for they don't know what they are doing.'  
Dividing his garments among them, they cast lots."*

Luke 23:34

# मत्ती

**1** ईसू मसीं ना आडा-बुडा नी नाम नी लीखली सूची नी कीताप, जे अब्राहम नी अवलयात, अने दावूद नी अवलयात हाता। 2 अब्राहम ईसाक नो सोरो हतो, अने ईसाक याकुब नो बाह हतो, अने याकुब यहूदा नो बाह हतो अने तीना भाय। 3 अने यहूदा फीरीस अने जोरुह नो बाह हतो, तीमनी आयह तामार हती, फीरीस हीसरोन नो बाह हतो, अने हीसरोन एराम नो बाह हतो। 4 एराम अम्मीनादाब नो बाह हतो, अने अम्मीनादाब नहसोन नो बाह हतो, नहसोन सलमोन नो बाह हतो। 5 अने सलमोन बोवाज नो बाह हतो, अने बोवज नी आयह राहब हती, बोवाज ओबेद नो बाह हतो, अने ओबेद नी आयह स्त हती, अने ओबेद यीसे नो बाह हतो। 6 यीसे राजा दावूद नो बाह हतो। अने राजा दावूद सुलेमान नो बाह हतो, सुलेमान नी आयह उरीययाह नी लाडी हती। 7 अने सुलेमान रहबाम नो बाह हतो। अने रहबाम अबीयाह नो बाह हतो, अने अबीयाह, आसा नो बाह हतो। 8 आसा यहोसाफात नो बाह हतो, यहोसाफात योराम नो बाह हतो, अने योराम उज्जीयाह नो बाह हतो, 9 उज्जीयाह योताम नो बाह हतो, योताम आहज नो बाह हतो, अने आहज हीजकीयाह नो बाह हतो, 10 हीजकीयाह मनसीह नो बाह हतो, मनसीह आमोन नो बाह हतो, अने आमोन योसीयाह नो बाह हतो; 11 अने ईसरायल ना माणहु ने धरीन बेबीलोन मे लीजवा नी टेमे, योसीयाह यकूनयाह अने तीना भायु नो बाह हतो। 12 अने ईसरायल ना माणहु ने धरीन बेबीलोन मे लीजवान बाद, यकूनयाह सलतीयेल नो बाह हतो, अने सलतीयेल जम्बाबील नो बाह हतो, 13 जम्बाबील अबीहूद नो बाह हतो, अबीहूद ईलयाकीम नो बाह हतो, अने ईलयाकीम अजोर नो बाह हतो, 14 अजोर सदोक नो बाह हतो, सदोक अखीम नो बाह हतो, अने अखीम ईलीहूद नो बाह हतो, 15 ईलीहूद एलीयाजार नो बाह हतो, एलीयाजार मत्तान नो बाह हतो, अने मत्तान याकुब नो बाह हतो। 16 याकुब यूसुफ नो बाह हतो, जे मरीयम नो घोरवाळो हतो, अने आहयी मरीयम सी ईसू पयदा हयो, जे मसीं केवाये। 17 अनी रीते आखी मेळीन अब्राहम गेथी दावूद लग चोवदे पीडी हयी, दावूद गेथी बेबीलोन मे धराय जवा नी टेमे लग चोवदे पीडी हयी, अने बेबीलोन मे धरीन लीजवा नी अळतेण लग गेथी ईसू मसीं लग चोवदे पीडी हयी। 18 ईसू मसीं नी पयदावारी आसम हयी; जतयार तीनी आयह मरीयम नी जोडावणी यूसुफ हाते हय जेली हती, अने अळतेण तीमना वेवा हयन भेळा हयवा नी प्लेत मरीयम चोखली आत्मा नी लारे भारेपोगे हय जी। 19 मरीयम नो घोरवाळो यूसुफ धरमी माणेह हतो अने माणहु अगळ मरीयम नु नामबददी नी करवा हीडतो हतो, एतरे होगोत तीने सोड देवा नो वीचयार करवा बाज रेलो। 20 यूसुफ आसम वीचयार करीन हुय ज्यो, ततयास्त तीने हपना मे भगवान नो हरगदुत देखाव पडीन केदो, “ए यूसुफ दावूद नी अवलयात, मरीयम ने तारी लाडी बगनीन लाववा सी ना बीहे। काहाके तीहयी चोखली आत्मा नी लारे भारेपोगे हयली से। 21 अने तीहयी सोरु ने पयदा करहे अने तु तीनु नाम ईसू राखजे, काहाके तीहयो आपणा माणहु ने तीमना पापु सी सोडावहे।” 22 आहयु आखु आनीन करते हयु के जे बोल मालीक, भगवान वगे गेथी वात केणया नी लारे केदलो, पुरो हये: 23 “हमळो एक कुवारी भारेपोगे हयहे अने तीहयी एक सोरु पयदा करहे, अने तीनु नाम ईममानुएल पाडहे तीहयु नाम नु मतलब से; भगवान आपणी हाते से।” 24 जतयार यूसुफ हुवीन उट्यो, ततयार हपना मे भगवान नो हरगदुत केदो नेमत करयो अने मरीयम हाते वेवा करीन आहफा ना घोर ली आयो; 25 बाखीन यूसुफ ततयार लग मरीयम नी हाते नी ज्यो, जतयार लग तीनु सोरु पयदा नी हयु। यूसुफ सोरु नु नाम ईसू पड्यो।

**2** ईसू यहूदा देस ना बेतलहम गाम मे पयदा हयो। ततयार हेरोद राजा राज करवा बाज रयो हतो। ततयार उगवणा गेथा तारा ने जाणवा वाळा जानकार यस्सेलेम हेर मे आया। 2 अने माणहु ने पुसवा बाज ज्या, “युहदी माणहु नो राजा जे पयदा हयलो से तीहयो कां से? काहाके उगवणो गेथो तीनी सेलाणी नो तारो उगतलो देखला से। अने आमू तीने वांदवा आवला से।” 3 आहयी वात हमळीन हेरोद राजा अने यस्सेलेम हेर मे रेणया आखा माणहु घबराय ज्या। 4 एतरे हेरोद राजा युहदी ना डायला पुंजार अने चोखली सासुतर हीकाडन्या ने अने आखा ने भेळा करीन आहयु पुख्यो, मसीं कां पयदा हयवा जोवे? 5 तीहया केदा, “यहूदा परदेस ना बेतलहम गाम मे; काहाके भगवान भणी गेथो केवा वाळो आना बारा मे केदलो

से।” 6 “ए बेतलहम, तु यहूदा देस मे वाळा, काना बी मोट्ला हेर मे गेथु नानु नी हय; काहाके तारी मे एवो राज करनयो अदीकारयो पयदा हयन उजततो हयहे। जे मारा ईसरायल ना माणहु नी देख-भाळ करहे।” 7 अळतेण तारा ने जाणवा वाळा जानकार ने हेरोद राजा होगोत बोलायो अने तीमने पुसीन मालम कर लेदो के तारो कानी टेमे देखावा पडलो। 8 अळतेण हेरोद राजा तीमने बेतलहम मोकलयो अने हुकम आप्यो, “जावो, अने जायत सोरु ने होदो अने तीहयु सोरु जड जाय, ता मने खबर करजो, एतरे मे बी जायन तीना पोगे पडीन वांदही।” 9 तीहया राजा नी वात मानीन चाल पड्यो। अने जे तारा ने तीहया देखला हाता, तीहयो तारो बी तीमनी अगळ-अगळ चाल पड्यो, अने जां सोरु हेतु तीहयात जागे जायन उबो री ज्यो। 10 तीहया तारा ने देखवा ता घण-जबर खुस हय ज्या। 11 घोर मे मोय ज्या अने तीहयु, सोरु ने तीनी आयह मरीयम हाते देख्या अने तीना पोगे पडीन वांद्या, अने तीहया आहफा-आहफा नी पेटारी मे गेथा नीकाळीन ईसू ने होनु, लोबान अने गंदायणयु ईततर भेट करया। 12 काहाके भगवान तीहया जानकार ने हपना मे चेताय देदलो के तमु हेरोद राजान तां नी जजो। एतरे तीहया बीजी वाट्ये पडीन आहफाम ना देस जत रया। 13 तीहया जानकार ने जवादीन मालीक नो दुत यूसुफ ने हपना मे देखाव पड्यो अने हुकम आपीन केदो, “उठो सोरु अने तीनी आयह ने लीन मीसर देस नाह जा। जतयार लग मे पासो चाल नी केम ततयार लग तांत रेजे। काहाके हेरोद राजा मराय नाखवा करीन सोरु ने होदाडवा वाळो से।” 14 आहयु हमळीन तीहयीत राते उठीन सोरु अने तीनी आयह ने लीन मीसर देस भणी चाल पड्यो। 15 तीहयो हेरोद राजा ने मरते लगण यूसुफ मरीयम अने सोरु हाते मीसर देस मेत रयो, अळतेण मालीक भगवान वगे गेथी वात केणया माणहु नी लारे केदली वात पुरी हये, “मे मारा सोरा ने मीसर देस मे गेथो बोलायो।” 16 अळतेण तारा ने जाणवा वाळा जानकार मने धोको दीन जत रया करीन हेरोद राजा ने घण-जबर रीह लागी। अने तीहयो सीपायडा ने आहयु कीन मोकलयो के तारा ने जाणवा वाळा जानकार नी केदली टेम पोर बेतलहम अने आडे-धेडे वाळा आखा सोरा ने मार नाखो, जे बे साल ना अने बे साल गेथा नाना से। 17 अने ततयार भगवान वगे गेथा केणया माणेह यीरम्या नी केदली वात पुरी हय जी, 18 “रामा हेर मे गीण आवे एवी अवाज हमळाय पडी, रडवा अने नेहरा दीन रडवु हमळाय पड्यु। राहेल आहफा सोरा नी करते रडवा बाज री हती। काहाके तीहया हाव नी रयो।” 19 हेरोद ने मरवान बाद, मीसर देस मे यूसुफ ने हपना मे मालीक नो दुत देखाव पडीन केदो, 20 “उठ, सोरा ने अने तीनी आहय ने लीन ईसरायल ना देस मे जत रे, काहाके जे तारा सोरा ने मारवा हीडता हाता, तीहया मर जेला से।” 21 ततयार यूसुफ नीदर मे गेथो जाग उट्यो, अने सोरा ने अने तीनी आहय ने हाते लीन ईसरायल ना देस मे पासो आयो। 22 ततयार अरखीलउस आहफा ना बाह हेरोद ना जागे यहूदया पोर राज करवा बाज रयो, ईसम हमळीन तां जवा सी बीहते हतो। अळतेण हपना मे भगवान सी खबर जडी अने गलील देस मे जत रयो, 23 अने नासरत नाम ना गाम मे जायन रेवा बाज ज्यो, काहाके तीहयो बोल पुरो हये, जे भगवान वगे गेथी वात केणया माणहु नी लारे केदलो हतो: “तीहयो नासरी केवायहे।”

**3** तीहया दाडा मे बपतीसमा आपणयो युहननो, युहदी जीला ना बडा मे आवीन, आडीन आहयु परचयार करवा बाज ज्यो, 2 “पापु ने सोडीन आहफाम ना मन ने भगवान वगा वाळो, काहाके हरग नु राज हातेत आय जेलु से।” 3 आहयो युहननो तीहयोत होतो, जीना बारा मे भगवान वगो गेथो वात केवा वाळो यसायो केदलो हतो: “उजाडी बडा मे आडवा वाळा नी अवाज से: मालीक जुगु रोहो तीयार करो अने तीनी जुगु वाट हुदी करो।” 4 आहयो युहननो ते उटडा ना नीमबाळा ना लुगडा पेरतलो अने केड्या मे चामडा नो पट्टो बांदतलो। तीनु खाणु टीड्या अने बडा मे नु मोद हतु। 5 यस्सेलेम हेर वाळा, आखा यहूदया वाळा, अने यरदन नदी ना आडे-धेडे ना गाम वाळा आखा माणहु युहननान तां आवता हाता। 6 अने आपणा पापु ने मानीन यरदन नदी मे तीना हाते आया अने तीहयो बपतीसमा आप्यो। 7 युहनना डेरत फरीसी माणहु ने अने सदकी माणहु ने बपतीसमा लेवा करीन आवतला देख्यो अने तीहयो तीमने केदो, “ए गडहा ना बचचा! तमु बपतीसमा लेहु ता आंवला वाळी गरा तमारी पोर गेथी टळ जहे ईसम तमने कोय की देदु?” 8 आमु पाप भणी गेथा मन फीरवीन भगवान वगा वळ जेला से, ईसम जीवाय जीवीन आहफा ने उजतात करो। 9 अने ‘अमु ते अब्राहम बाह

नी अवलयात से' ईसम वीच्यारीन बेफीकरया नी रेजो। मे तमने आहयु केम, भगवान दगडा मे गेथो बी अब्राहम वाटु सोरो उबजाड सके। 10 हाव झाड ना मुळ्या पोर कुराडी मेकाय जेली से। एरे जे झाड वास नी फाले, तीहयु झाड ने वाड देहे अने तीने आकठा मे धपाडवा करीन नाख देहे। 11 मे ते तमने पाप भणी गेथु मन फीरवीन भगवान वगा वळवा करीन पाणी सी बपतीसमा आपु; बाखीन जे मारी अळतेण आव्ला वाळो से, तीहयो मारी गेथो घणो सकृती वाळो से। मे तीना खाहडा उचलवा नी लायक बी नी हय। तीहयो तमने चोखली आत्मा अने आकठु सी बपतीसमा आपहे। 12 तीहयो आहफा नु हुपडु तीना हात मे ली लेदलो से, अने तीहयो आहफा ना खळा मे गम नीकाळीन चोखाळहे अने गम ने मोहटी मे भरेहे, पण गम ना चारा ने आकृती मे नाख देहे जे कदी नी ओलाये।" 13 तीहयी टेमे, ईसु यहनना पांह बपतीसमा लेवा करीन गलील जीला गेथो यरदन नंदी धेडे ज्यो। 14 यहननो आहयु केतो जायनु ईसु ने रोक्वा बाज ज्यो, मने तारा हात सी बपतीसमा लेवा नी जखत से, अने तु मारिनुतां काहा आय रयो? 15 ईसु तीने जपाप आप्यो, "हमणे आहयु ईसमेत हयवा दे, आपणु ने, भगवान ने जे गमे तीने पुर करवा करीन आहयुत करवा वारु से।" ता यहननो तेमेत हयवा देदो। 16 ईसु ततयास्त बपतीसमा लीन पाणी मे गेथो उपर नीकळ्यो। ता तेमरी घडी हरग उगडी ज्यु, अने ईसु, भगवान नी आत्मा ने पारवान वेहे मे आहफा पोर उतरतली अने थंगतली देख्यो। 17 अने तीना बारा मे हरग गेथो आहयो बोल हमळायो, आहयो मारो मोगाळ्ळो सोरो से। जीनी सी घणो खुस से।

4 ते वखत भुतडा सी ईसु नी पारख कराववा करीन आत्मा ईसु ने उजाडी बडा मे ली जी। 2 ईसु चाळीह दाडा अने चाळीह रात उपाह करवा नी अळतेण तीने भुक वेला पाडवा लागी। 3 अने पारखवा वाळो भुतडो आवीन ईसु ने केदो, कदीम तु भगवान नो सोरो हय, ता आहया दगडा ने हुकम आपीन कीदे, के तमु रोदला बण जावो। 4 पण ईसु भुतडा ने केदो, "सासतर मे लीखलु से, 'माणेह रोदला खायन नी जीवे पण तीहया भगवान ना मोडा मे गेथा नीकळवा वाळा एक-एक बोल सी जीवतलो रेया।" 5 भुतडो ईसु ने यरसलेम मे ली ज्यो, जे चोखलु हेर केवाये, अने मंदीर नी चोटली पोर उबो कर देदो। 6 अने भुतडो ईसु ने केदो, "कदीम तु भगवान नो सोरो हय, ता मंदीर नी चोटली पोर गेथो आहफोत हेतो कुद पड, काहाके चोखली सासतर मे लीखलु से; भगवान तारी रखवाळी करवा करीन हरगदुत ने हुकम आपहे; तीहया तने उपरेत झेल लेहे, अने तारा पोगु मे दगडा नी ठेह नी लागवा देया।" 7 ईसु, तीहया भुतडा ने अळी केदो, 'मेम सासतर मे आहयु बी लीखलु से, तु आहफा ना मालीक भगवान ने ना पारखे। 8 अळतेण भुतडो ईसु ने एक घणा उचा बडा पोर ली ज्यो अने तीने कळी ना आखा राज अने तीनु राज-पाट देखाड्यो। 9 अने ईसु ने केदो, कदीम तु मने पोगे पडीन वांदे, अने मारी पुजा करे, ता मे तने आहयु आखु आप देही। 10 ततयार ईसु भुतडा ने केदो, "ए भुतडा, सेतो हय जा! काहाके चोखली सासतर मे लीखलु से, तमु आहफा ना मालीक भगवान ने वांद्या करो, अने नीसृती तीनीत सेवा करो।" 11 अळतेण भुतडो, ईसु ने सोडीन जत रयो, अने देखो हरगदुत आवीन तीनी चाकरी करवा बाज ज्यो। 12 जतयार ईसु आहयु हमळ्यो के बपतीसमा आपण्यो यहनना धराय ज्यो, ता तीहयो गलील जीला मे जत रयो। 13 तीहयो नासतर हेर ने सोडीन, कफरनहम हेर मे जे दरया धेडे जबुलुन अने नपताली ना देस मे जीन रेवा बाज ज्यो। 14 काहाके भगवान वगे गेथा केणया यसाया नी लारे केदलु हतु तीहयु पुरु हये: 15 "जबुलुन अने नपताली परगणा मे दरया नी वाट्ये, यरदन नंदी नी बुडणला ईलाका वाळा, आडजातया ना देस गलील मे। 16 जे माणह अंदारला मे जीववा बाज रया हता। तीहया एक पणु मोटु वीजाळु देख्या, अने तीहया देस मे माणह मोटा ना साहळा मे जीवता हता, तीमनी पोर घणु मोटु वीजाळु हयु।" 17 तीहयी टेमे गेथो ईसु आहयु परच्यार करवा बाज ज्यो, पाप भणी गेथु मन फीरवीन भगवान वगा वळो। हरग नु राज हाते आय लागलु से। 18 जतयार ईसु गलील दरया धेडे मायन जवा बाज रयो हतो, ता बे भाय ने देख्यो, सीमोन ने, जे पतरस बी केवाये, अने तीना भाय अंदर्यास ने। तीहया दरया मे जाळ नाखवा बाज रया हता काहाके तीहया काहरया हता। 19 ईसु तीमने केदो, "मारी हाते चालो, मे तमने माणह ने भगवान भणी कीकम लाववा हीकाडही।" 20 अने तीहया ततयास्त जाळ तांत रेवा दीन ईसु हाते चाल पड्या। 21 अने ईसु तां गेथो अगो ज्यो ता तां अळी बीजा बे भाय ने देख्यो, जब्दी ना सोरो याकुब ने अने तीना भाय यहनना ने तीहया आहफाम ना

बाह जब्दी हाते दुंड्या मे आहफाम नी जाळ हुदारता हता। ईसु तीमने बोलायो। 22 अने तीहया ततयास्त दुंड्या ने अने आहफाम ना बाह ने सोडीन ईसु हाते चाल पड्या। 23 ईसु गलील जीला मे फीरतो जायन भगवान ना भक्ती ना घोसु मे हीकापण आप्तो रयो, अने भगवान ना राज नी खुस-खबर परच्यार करतो रयो। अने माणहू नी आखी भाती नी मंदवाड अने लुलखाय सेटी करीन आरगो करयो। 24 अने आखा सीरिया देस मे ईसु नी खबर फेल जी। माणहू फेपराळा माणहू ने, लखवा हयला माणहू ने अने एवा कंय भाती ना मंदवाड वाळा ने दुख मे पडला माणहू ने अने भूत लागला माणहू ने ईसुनुतां लावता हता अने तीहया आखा ने आरगा करतो हतो। 25 अने गलील जीला मे गेथा, दीकापुलीस मे गेथा, यरसलेम गेथा, युहदया मे गेथा, अने यरदन नंदी नी हेली धेडे गेथा, माणहू ना मोटा-मोटा टोळो ईसु पसळ आवता हता।

5 ईसु माणहू ना मेळा ने देखीन बडा पोर चड ज्यो, अने तां बह ज्यो। ता तीना चेला तीनीनुता आया। 2 अने तीहयो तीमने आहयु केतो जायनु हीकापण आपवा बाज ज्यो; 3 "जुगाळा से तीहया जे मन ना गरीब से! काहाके हरग नु राज तीमनुत से।" 4 "जुगाळा से तीहया, जे दुखी हयन रडे काहाके तीमने सांती जडहे।" 5 "जुगाळा से तीहया जे नीचळा से! काहाके आहयी धरती ना हकदारया से।" 6 "जुगाळा से तीहया, जे धरमीपणा ना भुकला अने तरहेला से! काहाके भगवान तीमने नीहा कर देहे।" 7 "जुगाळा से तीहया, जे गीणाळ्या से! काहाके भगवान तीमनी पोर गीण करहे।" 8 "जुगाळा से तीहया, जीमना मन चोखला से! काहाके तीहया भगवान ने देखेहे।" 9 "जुगाळा से तीहया, जे मेळ कराववा वाळा से! काहाके तीहया भगवान ना सोरा केवायहे।" 10 "जुगाळा से तीहया, जे धरमीपणा ना कारण दुख झेले, काहाके हरग नु राज तीमनुत से।" 11 "जुगाळा से तमु, जतयार माणहू मारीन करते तमारी नाबबंदी करे अने वेला पाडे, अने तमारी पोर आखी भातीन कुहराय करीन झटो गुनो लगाडे। 12 तमु खुस रेजो अने खुसी मनावजो काहाके तमारी वाटु हरग मे घणु मोटु ईलाम से। काहाके आहयीत रीते भगवान वगे गेथा केणया माणहू ने वेला पाडता हता।" 13 तमु धरती नु खारलु मीठु से। कदीम खारलु मीठु नु खारापण जत रय, ता तीने कानी बी चीज वेर खास नी कर सके, अने तीहयु कंय काम नु नी रेया। अने तीहयु बारथु नाखवा अने माणहू ना पोग तळे कचरायवा वाटु से। 14 तमु कळी नु वीजाळु से। जे हेर बडा पोर वहलु से तीहयु हताये नी। 15 माणहू दीवो धपाडीन कांणी तळे नी मेले, बाखीन दीवलाय पोर मेले, ता तीहयो दीवो आखा थोरलया ने वीजाळु आपे। 16 दीवा नु वीजाळु नी तेम भबलीन तमारा भला काम बी माणहू अगळ उजनुता हयवा देवो। तीनी सी तीहया तमारा भला काम ने देखीन हरगो वाळा तमारा भगवान बाह नी बडाय करे। 17 तमु ईसम ना हमजो के मुसान लीखली सासतर ने अने भगवान वगे गेथा केणया माणहून सासतर ने खततम करवा आबलो। मे तीमने खततम नी, बाखीन धुरी करवा आबलो से। 18 मे तमने हाचलीन केम, के जतयार लग हरग अने धरती खततम नी हय जाय, मुसा नी लीखली सासतर ना बोल नी एकीक वात अने एकीक अकसर पुरो हया वगर नी टळे। 19 एतरे जे कोय आहया हुकम मे गेथा काना बी नानला हुकम ने पाळवा सोड देय, तीहयो हरग राज मे नानो केवायहे। पण जे कोय तीहया हुकम ने पाळ्या करहे अने तीमने हीकाडहे, तीहयो हरग ना राज मे मोटो केवायहे। 20 मे तमने केम, कदीम तमु चोखली सासतर हीकाडन्या गेथा अने फरीसी माणहू गेथा वदीन धरमपणा मे नी चालो ता तमु हरग राज मे नी भराय सके। 21 तमु हमळी लेदला से, तमारा आडा-बुडा ने आहयु केदलु हतु के मारजो नी, जे कोय मारहे ता कोरट-कचवरी मे नीयाव ना दाडे डंड नी लायक ठेरहे। 22 पण मे तमने केम जे कोय आहफा ना भाय पोर रीह करहे तीने कोरट-कचवरी मे नीयाव ना दाडे डंड नी लायक ठेरहे। अने कदीम कोय आहफा ना भाय ने रीकामा, केहे तीहयो मोटली पंचु मे डंड नी लायक ठेरहे; अने जे कोय आहफा ना भाय ने ए गांडा, केहे तीहयो नरक नी आकृती नो डंड नी लायक ठेरहे। (Geenna g1067) 23 कदीम तमु वेदी पोर आहफा नी भेट चडाववा लाय रया हय, अने तां हातीक तमने आहयु फोम आवे के मारा भाय ना मन मे मारी भणी गेथु कंय वीरोद से। 24 ता तु आहफा नी भेट तांत वेदी अगळ रेवा दीन पेले आहफा भाय हाते मेळ कर ले अने अळतेण आवीन भेट ने चडावो। 25 तारो वेरी तने थाणा मे लीन जवा वखत वाट्येत हय, ता तीने छोटोत आहफा नो दोसतीदार बणाय ले कंखर तीहयो तने नीयाव करन्या

ना हात मे कर देय, अने नीयाव करन्यो तने सीपायडा ना हात मे कर देय, अने सीपायडा तने जेल मे कुंड देय। 26 मे तने हाचलीन केम, तू जेल सी तां लग नी छुट सकतो जां ह तक तू पाय-पाय नी आप देय। 27 तमु जाणो के आहयु केदलु से, छीनाळु नी करजो, 28 पण मे तमने केम, जे कोय कानी बयर भणी तीनी हाते छीनाळु करवा नो वीच्यार करीन देखे, ता तीहयो आहफा ना मन मे तीनी हाते छीनाळु कर लेदलो से। 29 कदीम तमारो जमण्यो डोळो तमने पाप करावे, ता तीने काडीन नाख देवो। काहाके वास ते आहयु से के तमारा डील मे ना एक अंग खूट जाय, पण तमारु आखु डील नरक मे नी आकठी मे नी नखाये। (Geenna 9:10-17) 30 अने कदीम तमारो जमण्यो हात पाप करे, ता तीने वाडीन नाख देवो; वास आहयु से के तमारा डील मे नु भले एक अंग खूट जाय, पण तमारु आखु डील नरक मे नी नखाये। (Geenna 9:17) 31 आहयु बी केदलु हतु के, जे कोय आहफा नी लाडी ने सोडे तीहयो तीने सोडवा नी चीट्टी लीखीन पुरवा भेळ आप देवा जोवे। 32 बाखीन मे तमने केम, छीनाळा नी वात ने सोडीन काना बी बीजा कारण सी, जे आहफा नी लाडी ने सोडे; ता तीहयो तीने छीनाळु करावे, अने जे कोय तीहयी छुटली बयर सी वेवा करे, तीहयो बी छीनाळु करे। 33 तमु आहयु बी हमळी रया के आडा-बुडा सी केदलु हतु के छुट्टी हाम नी खाजो, पण मालीक सी करली हाम ने पुरी करजो। 34 पण मे तमने केम हाम नी खाजो। हरग नी हाम बी नी खाजो, काहाके हरग भगवान नी राजगदी से; 35 धरती नी हाम नी खाजो, काहाके तीहयी तीनो पोग मेलवा नो पाटलो से। यस्सलेम नी हाम नी खाजो, काहाके यस्सलेम मोट्ला राजा नु हेर से। 36 अने आहफा ना मुंडा नी बी हाम नी खाजो, काहाके तमने मुंडा नो एक बी नीमवाळा धोखा नीता काळा नी कराये। 37 कदीम तमारी वात “होव हय” ता “होव केजो” अने “नी” हय ता “नी” केजो। काहाके आनी गेथु वतु केय तीहयु बुराय मे गेथु से। 38 “तमु आहयु बी हमळी रया के केदलु हतु के ‘एक डोळा बदले, एक डोळो, अने एक दात बदले, एक दात।’” 39 पण मे तमने केम, काना बी कुहरया माणेह नो वीरोद ना करो; पण कदीम कोय तमारा जमणा गाल्या पोर थापड देय, ता तीनी भणी बीजू गाल्यु बी फीरवी देवो। 40 कदीम कोय तारी पोर जोर करीन तमारु डगलु मांगे ता तीने आहफा नो कोट बी आप देवो। 41 अने कदीम कोय तमने जोर करीन एक कीलोमीटर ली जाय ता तीनी हाते बे कीलोमीटर चालीन जावो। 42 जे कोय तमारी पांढ मांगे, ता तीने आप देवो, अने कोय तमारी पांढ उदार मांगे, तीने नी ना केवो। 43 तमु हमळी रया: केदलु हतु के आहफा ना हाते वाळा ने मोंग करो अने आहफा ना वेरी सी रीह राखो। 44 पण मे तमने केम, आहफा ना वेरी ने मोंग करो। अने जे कोय तमने वेला पाडे, तीमनी वाटु वीनूती करो। 45 ईसम करीन तमु आहफा ना हरग वाळा भगवान बाह नी अबलयात बण जह; काहाके तीहयो भोळा अने कुहरया बेम माणह पोर आहफा नु दाडो उगाडे अने धरमी अने वण-धरमी बेम माणह पोर पाणी पाडे। 46 कदीम तमु तीमनेत मोंग करो, जे तमने मोंग करे, ता तमने हु फोळ जडहे? एवो मोंग ते फाळो लेवा वाळा बी नी करे। 47 अने कदीम तमु आहफा ना भाय ने एतरोत वास करे, के करीन पुछो, ता तमु कानु मोटु काम कर रया? आडजातया माणह ईसम नी करे हु? 48 एतरे तमु पुरा पाका बणो, जीसम तमारो हरग वाळो बाह पुरो पक्को से।

**6** चेतीन रेवो! आहयु ने गुमे तीहया धरम ना कामु ने माणह अगळ देखाडवा करीन ना करो, ईसम करहु ता तमने हरग वाळा बाह भणी गेथो फोळ कदी नी जडे। 2 एतरे जतयार तमु काना गरीब दुखी ने दान आपो, ता तीहयी वात ने आखा अगळ ना केवो, जीसम के भक्ती ना घोर अने गळी मे ढोंगडा करनया माणह बीजा पांढ बडाय हात करवा करीन करे। मे तमने हाचलीन केम, तीमने तीमनी बडाय नी लारे पेलेत फोळ जड जेलु से। 3 एतरे जतयार तमु दान आपो, ता तमारो डाखर्यो हात आहयु नी जाणवा जोवे के तमारो जमणो हात हु करवा बाज रयो। 4 के तमारु दान हतायलु रहे। ता तमारो भगवान बाह जे तू हताडीन करे तीने बी देखे, तीहयो तने तीनु ईलाम आपहे। 5 अने जतयार बी तमु वीनूती करो, ता ढोंगडा करनया तम ना करो। काहाके माणह ने देखाडवा नी लेदे भक्ती ना घोर-घोर अने वाट ना भेळया पोर उबा रीन वीनूती करवा तीमने वास लागे। मे तमने हाचलीन केम, हीमनी बडाय नी लारे पेलेत हीमने फोळ जड जेलु से। 6 पण जतयार तू वीनूती करे, ता आहफा ना घोर मे जा अने झापलु दीन हतायन आपणा भगवान बाह सी वीनूती कर। ततयार तारो बाह जे हतायन देखे, तने फोळ आपहे। 7 वीनूती करती वखत आडजातयान तम जादा बोलु नी केजो। काहाके तीहया

आहयु सोचे के नाम्बी वीनूती करवा सी अमारी वीनूती हमळहे। 8 एतरे तमु तीमनी तम ना बणो, काहाके तमारो बाह तमारी मांगवा सी पेलेत जाणे के तमने हु-हु जरवत से। 9 एतरे ईसम वीनूती करो, “ए अमारा बाह, तू जे हरग मे से तारु नाम चोखलु मनाये। 10 तारु राज आवे। तारी मरजी जीसम हरग मे पुरी हये, तेमेत आहयी धरती पोर बी पुरी हये। 11 दाडीन, आमने जोवे तेरु खाणु आप्या कर। 12 अने जीसम आमु अमारा गुनेगार ने तीमना पाप ना लेदे माफी आपला से, तेमेत तू अमारा पाप ना लेदे आमने माफी आप; 13 अने जतयार पाप कराखा नी पाख आवे ता आमने पाप मे नी पडवा देजे, पण बुराय सी बचाड।” 14 कदीम तमु माणह ने तीमना पाप नी लेदे तीमने माफी आपो, ता तमारो हरग वाळो बाह बी तमारा पाप नी लेदे तमने माफी आपहे 15 पण कदीम तमु माणह ने तीमना पाप नी लेदे माफी नी आपे, ता तमारो हरग वाळो बाह बी तमारा पाप नी लेदे तमने माफी नी आपे। 16 जतयार तमु उपाह करो, ता ढोंगडा करनयान तम तमारा मोडा पोर नुरपाणी नी रेय, काहाके तीहया आपणु मोडु बी नी धोवे, काहाके माणह तीमने उपाह वाळो जाणे। मे तमने हाचलीन केम, के तीमने आपणु ईलाम जड जेलु से। 17 पण जतयार तू उपाह करे ता आहफा ना मुंडे तेल लगाड अने मोडु धोव, 18 काहाके माणह नी पण तारो बाह जे हरग मे से, तने उपाह वाळो जाणे। ईसम रेवा मे जे तारो बाह हतायन देखे, तने तीनो फोळ आपहे। 19 “आपणी जुगु धरती पोर धन एकटु ना करो, आज ते कीडो अने वेदाय बगाडतला से, अने आज चोट्टा डाको डाले अने चोरे कर लये। 20 पण आपणी जुगु हरग मे धन एकटु करो तां नी ते कीडो अने नी वेदाय बगाडे, अने तां चोट्टा नी डाको डाले अने नी चोरी करे। 21 काहाके जां तमारु धन से तां तमारु मनी लागलु रहे।” 22 “डील नो दीवो डोळा से: एतरे कदी तारा डोळा चोखा हय, ता तारु आखु डील बी वीजाळा मे रहे। 23 पण कदी तारा डोळा चोखा नी हय, ता तारु आखु डील बी चोखलु नी रहे; आनीन करते तीहयु वीजाळु जे तारी मे से कदी अंदारलु हय ता तीहयु अंदारलु कीसम मोटु हेहे।” 24 काना बी माणेह ने बे मालीक नी चाकरी नी कराये; काहाके तीहयो एक मालीक सी हीगी करहे अने बीजा मालीक ने मोंग करहे; नीता एक मालीक हाते मेळीन रहे अने बीजा मालीक नो वाक काडहे। तमने भगवान नी अने धन-दवलत नी बेम नी सेवा नी कराये। 25 एतरे मे तमने केम के आहफाम ना जीव ना लेदे आहयी फीकर नी करजो के आमु हु खाहु अने हु पीह; अने नीता आहफाम ना डील जुगु हु परेहु। हु जीव खाणा सी, अने डील लुगडा सी मोटु नी हय हु? 26 वादळा मेना चडा ने देखो! तीहया नी वेरे, नी वाडे, अने नी मोहटी मे भेळु करे, ते बी तमारो हरग वाळो बाह तीमने खवाडे। हु तमु तीमनी सी जादा कीमत नी राखो? 27 तमारी मे गेथु आसम कोय से, जे फीकर करीन आहफा नी जीवाय नी अमाळ बी उमर बडाय पक्के? 28 “अने लुगडा जुगु हुका फीकर करो? जंगल मे ना फलु पोर धयान करो, के तीहया कीसम वदे, तीहया नी ते मेहनत करे, नी ते लुगडा बणावे। 29 ते बी मे तमने हाचलीन केम के सुलेमान आहफा नी बडाय मे तीमनी मायन कोयने तम लुगडा परेलो नी हतो। 30 एतरे जतयार भगवान चोवगान ना चारु ने, जे आज से, अने काले आकठा मे नाख देह, एवा लुगडा परावे, ता ए वण-भरहा वाळा, तमने तीहयो काहा नी परावे? 31 एतरे तमु फीकर करीन आहयु नी केजो, के आमु हु खाहु, अने हु पीह अने हु परेहु। 32 काहाके आडजातया आहयी आखी चीज नी होद मे रेय, अने तमारा हरग वाळो बाह जाणे, के तने आहयी आखी चीज जोवे। 33 एतरे पेले तमु भगवान ना राज नी अने धरमीपणा नी होद करो ता आहयी आखी चीज तमने जड जहे। 34 एतरे काले नी फीकर ना करो, काहाके काले नो दाडो आहफा नी फीकर आहफो कर लेहे; आज नी लेदे आज नोत दुख ढेंत से।

**7** “गुनो ना लगाडो, ता गुनो तमारी पोर बी नी लगाडे। 2 काहाके जे रीते तमु गुनो लगाडो, तीहयी रीते तमारी पोर बी गुनो लगाडहे; अने जे माप सी तमु माणह, ते माप सी तमारी वाटु बी मपायहे।” 3 “तू हुका तारा भाय ना डोळा मे वाळु कचर देखे, अने तारा डोळा मे वाळु खटकु तने नी देखातु। 4 तू तारा भाय ने कीकम की सकतलो, ‘लाव’ मे तारा डोळा मे गेथु कचर नीकाळ देम, पण देख, खटकु ते तारा डोळा मे से?” 5 ए ढोंगडा करनया, पेले आहफा ना डोळा मे वाळु खटकु नीकाळ ले, ता तारा भाय ना डोळा मे वाळु कचर नीकाळवा करीन वास देख सकही। 6 “चोखली चीज कुतरा ने ना आपो, अने आहफाम ना मोती हुवरया ना अगळ ना नाखो, कंकर ईसम नी हय जाय के तीहया तीने तीमना पोगु तळे डाबहे अने पास फीरिन तमने फाड देहे।” 7 मांगहु ता तमने आपहे, होदहु ता

जडहे; झापलु ठोकह, ता तमारी वाटु उगाडहे। 8 काहाके जे कोय मांगे, तीनी आपे; अने जे होदे, तीनी जडे; अने जे झापलु ठोके, तीनी जुगु झापलु उगाडहे। 9 तमारी मायन एवो कानो माणेह से, कदीम तीनो सोरो तीनी पांह रोटलो मांगे, ता तीनी दगडो आपे? 10 अने माछला मांगे, ता तीनी गडहो आपे? 11 कदीम तमु गांडा हयन, बी तमारा सोरा ने वारली चीज आपवा जाणो, ता तमारा हरग वाळो बाह बी मांगवा वाळो ने वारली चीज काहा नी आपहे? 12 अने जे वेवहार नी हेर तमु बीजा सी कर रया; तीहयो वेवहार तमु बीजा हाते बी करया करो; काहाके मुसा नो नेम अने भगवान वगे गेथा केणया नी हीकापण आहयी से? 13 हाकडला झापले मायन चालो, काहाके चवडलो रोहो से तीहयो रोहो अळी वास से तीहयो रोहो नास भणी लीजतलो से; अने ढेरेंत से जे तीनी सी चालतला से। 14 काहाके हाकडक से तीहयो झापलु अने काठो से तीहयो रोहो जे जीव ने तां ली जाय; अने थोडाक से जे तीने हात करे। 15 “झुटा भगवान वगे गेथी वात केणया माणहु सी चेतनी रेवो, अने जे गाडरान तेम तमारी हाते आवे, पण अळतेण फाडवा वाळा लेंड्या से। 16 तीना फोळ सी तमु तीनी ओळखी लेह। माणहु कटाळसया झाटवा सी अंगूर, नीता गोखरा काटान वेले गेथा गुलर तोडे ह। 17 एमेत कानु बी वारलु झाड वारलु फोळ लावे अने रीकामा झाड खोडलो फोळ लावे। 18 वारलु झाड खोडलु फोळ कदी नी लावे, अने नी खोडलु झाड वारलु फोळ लावे। 19 जे-जे झाड वारलु फोळ नी लावे तीहया झाड ने वाडीन आकटु मे नाखे। 20 ता तीमना फोळ सी तमु तीमने ओळखी लेह।” 21 जे मने “ए मालीक! ए मालीक! केय, तीहयी मायन कोय बी हरग राज मे भराय नी सके, पण तीहया एतरा जे मारा हरग वाळा बाह नी मरजी पोर चाले।” 22 तीहया नीयाव ना दाडे घणा ढेरका माणहु मने केहे, मालीक! आमु तारु नाम लीन भगवान वगे गेथी वात नी केदा ह? तारु नाम लीन भूत ने नी नीकाळया ह? अने तारु नाम लीन सकृती ना काम नी करया ह? 23 ततयार मे तीमने चोरखुझण की देही, “मे तमने नी ओळखु। ए पाप करनया! मारीनतां गेथा सेटा हय जावो।” 24 जे मारी आहयी वात ने हमळीन तीनीन तेम जीवे, तीहयो तीना हमजदार माणेह ने तेम से, जे आहफा नु घोर चाफरया पोर वास पायो खोदीन बणायो। 25 पाणी पड्यो, अने नंदी आवी, अने आंजी बी आवी अने तीना घोर ने अफठायी। ते बी तीहयो घोर नी ओदरयु; काहाके तीनो नीव चाफरया मे खोदीन बणावलु हतु। 26 जे मारी आहयी वात हमळीन तीनीन तेम नी जीवे, तीहयो तीहया वण-अकलया माणेह हरको से, जे रेत पोर पायो खोदीन आहफा नु घोर बणायो। 27 पाणी पड्यो, नंदी आवी, अने आंजी बी आवी अने तीना घोर ने अफठायी। तीहयो घोर ओदरी ज्यु अने खततम हय ज्यु। 28 जतयार ईसु आहयी वात की देदो, ता माणहु तीनी हीकापण हमळीन वहराय जया। 29 काहाके तीहयो चोखली सासतर हीकाडन्यान तेम नी, पण एक अदीकारीन तेम हीकापण आप्तो हतो।

**8** जतयार ईसु तीहया बडा पोर गेथो हेटो उतर्यो। ता एक घणो मोटो माणहु नो मेळो तीनी पसळ चाल पड्यो। 2 अने एक कुडावो माणेह ईसुनतां आयो अने तीहयो तीना पोगे पडीन वांद्यो अने वीनती कर्यो, “ए मालीक। कदीम तारी मरजी हय ता मने चोखो कर दे।” 3 ईसु हात अगो करीन ईसम केतो जीन तीनी छीम्यो, मारी मरजी बी आहयी से के त वास हयन चोखो हय जा। अने ततयास्त तीहयो वास हयन चोखो हय जयो। 4 अने ईसु तीने केदो, हमळ आजे जे हयु तीहयु कोयने नी केजे। पण पुंजारानतां जा, अने आहफा नु डील ने देखाडजे। अने मुसा ना कायदान लारे तीने भेट चडावजे; ता आखा माणहु जाणीन गवा बण जहे। 5 जतयार ईसु कफरनहम हेर मे आयो, ता तीनीनतां एक रोमी राज नो सुबेदार आयो अने तीनी सी वीनती कर्यो, 6 “ए मालीक मारा पावोर ने लखवा नी बीमारी हय री, अने तीने वेला हय री तीहयो घोर मे दुखी हयन पड रयो।” 7 ईसु तीने केदो, “मे आवीन तीने आरगो कर देही।” 8 सुबेदार केदो, “ए मालीक मे एतरो वास नी हय के त मारा घोर आवे। पण त एकीत बोल कीदे ता मारो पावोर आरगो हय जहे।” 9 मे आहयी वात जाणु काहाके मे बी एक अदीकार्यो से, अने मारा हात मे सीपायडा रेया। जतयार मे एक ने केम “जा” ता तीहयो जाय अने बीजा ने, आव, केय, ता तीहयो आवे अने मारा पावरया ने, आहयु कर, केम ता, तीहयो तीहयत करे। 10 ईसु आहयु हमळीन वहराय जयो अने तीहयो आहफा नी पसळ आवणया ने केदो, मे तमने हाचलीन केम, मे ईसरायली माणहु मे बी कोयने एतरो मोटो भरहो करतलो नी देख्यो। 11 मे तमने केम, ढेरेंत आडजातया माणहु

उगवणा अने बुडवणा गेथा आवीन अब्रारहम, ईसाक अने याकुब भेळता हरग राज मे बढहे। 12 पण राजय नी अवलयात ने बारथा अंदारला मे नाख देहे: तां रडहे अने दातु ककडावता रहे। 13 अने सुबेदार ने ईसु केदो, जा जीसम त भरहो करलो से, तेमेत तारी जुगु हय जाय। अने तेतरी घडी तीनो पावोर आरगो हय जयो। 14 पतरस ना घोर ईसु पुगयो, ता तां पतरस नी हाहू ने ताव चड रेलो देख्यो। 15 ईसु तीनो हात छीम्यो, अने तीनो ताव उतर ज्यो, अने तीहयी उठीन तीमनी चाकरी करवा बाज जयी। 16 हानुती टेमे माणहु, भूत लागला ढेरेंत माणहु ने ईसुनतां लाया। ईसु एकीत बोल कीन भूत ने माणहु मे गेथा नीकाळ्यो अने आखा मांदला ने वास कर्यो। 17 भगवान वगे गेथी वात केणया यसाया नी वात पुरी करवा करीन आहयु आखु हयु, तीहयो आखु लीखलो हतो: तीहयो अमारी आखी लुलगाय ने झेल लेदो, अने अमारी मंदवाड ने सेटी कर देदो। 18 ईसु आहफान नी च्यायो-मेर एक मोटलो मेळो देखीन चेला ने दरया नी हेली धेडे जवा नो हुकम आपयो। 19 तेतरी घडी एक चोखलु सासतर हीकाडन्यो आवीन ईसु ने केदो, मासतर! त जां बी जही, तां-तां मे तारी पसळ आवही। 20 ईसु तीने केदो, लेंड्या जुगु रेवा करीन तीमना दोर से अने हरग ना चडा जुगु तीमना पोतरा से, पण मनखया ना सोरा जुगु मुंडु मेलवा लग जागो नी हय। 21 चेला मे गेथो एक चेलो केदो, “ए मालीक मे तारी पसळ आवही, पण मने पेले मारा बाह ने गाडवा करीन जवा दे।” 22 पण ईसु तीहया चेला ने केदो, मरला ने मरला माणहु गाडहे पण त मार हाते चाल। 23 जतयार ईसु लेंड्या मे बह जयो ता तीना चेला बी हाते बह जया। 24 अने तीहयी वखत दरया मे उचकाहलुत घण-जबर आंजी आवी, अने दरया नी झलक लुंड्यो अफठायन लुंड्या ने घेरवी री हती। पण ईसु हुक्मा बाज रयो हतो। 25 चेला हाते आवीन ईसु ने जगाड्या अने केदा, मालीक आमने बचाड! आमु मरवा बाज रया। 26 ईसु तीमने केदो, ए वण-भरहया! तमु एतरी जबर हुका बीही रया? अळतेण तीहयो आंजी अने पाणी ने वड्यो अने आखु धीरु पड ज्यु। 27 आहयु देखीन तीहया वहराय जया, अने केदा, आहयो केवो माणेह से के आंजी अने दरया लग हुकम माने। 28 जतयार ईसु दरया नी हेली धेडे गदरेनीया देस मे पुगयो, ता भूत चोटला बे अदमी मडाटया मे गेथा नीकळीन ईसुनतां आया। तीहया एतरा आकरा हाता के तीहयी वाट्ये कोयने बी नी अवायत-जवायत हतु। 29 तीहया आडीन केदा, “ए भगवान ना सोरा! अमारी हाते तारु हु काम से? टेम नी आयी अने पेले गेथीत आमने वेला पाडवा आय रयो हु?” 30 तां गेथो थोडाक सेटो हवरया नो एक टोळो चरवा बाज रयो हतो। 31 भूत आहयु केता जायन वीनती करया, कदीम त आमने नीकाळवा बाज रयो, ता आमने हवरया ना हेला टोळा मे मोकली दे। 32 ईसु तीमने हुकम आपीन केदो, जावो ता भूत तीहया माणहु मे गेथा नीकळीन हवरया मे भराय जया अने तीहया आडखे गेथा दरया मे कुद पड्या अने पाणी मे डुबीन मर जया। 33 अने हवरया ने चारनया नाही पड्या, अने तीहया जे हयु तीहयु आखु हेर मे जायन की देदा। अने भूत चोटला माणहु नु ह हयु तीहयु बी की देदा। 34 अने हेर ना आखा माणहु ईसु ने भेटवा आया, अने जतयार तीहया ईसु ने देखया ता तीनी सी वीनती करया, त अमारा देस मे गेथो जत रे।

**9** अळतेण ईसु लुंड्या मे बह जयो अने दरया नी हेली धेडे तीना हेर मे आयो। 2 तीहयी वखत थोडाक माणहु, लखवा मे पडला एक माणेह ने खाटला मे हवाडीन ईसुनतां लाया। तीमनो भरहो देखीन ईसु तीहया लखवा मे पडला ने हुकम आपीन केदो, सोरा, हीममत राख! तारा पाप नी लेदे तने माफी जड जी। 3 थोडाक युहदी-धरम हीकाडनया मन मे वीचयारया, हीयसो ते भगवान नो वाक काडे। 4 तीमना मन ना वीचयार जाणीन ईसु तीमने केदो, तमु तमारा मन मे एवा बुरा वीचयार काहा कर रया? 5 जाडा वास हु से? “तारा पाप नी लेदे तने माफी जड जी केवा वास से के, ‘उठीन तारु खाटलु उचलीन चाल केवा वास से?’” 6 पण मे आहयु आसम करीन की रयो के तमु आहयु जाण लेवो के मनखया ना सोरा ने धरती पोर पाप नी लेदे माणहु ने माफी आपवा नो बी हक से। अळतेण ईसु लखवा मे पडला माणेह ने केदो, “उठ अने तारु खाटलु उचलीन तारा घोर जत रे।” 7 अने तीहयो उठीन तीना घोर जत रयो। 8 आहयु देखीन माणहु बीह जया, अने तीहया भगवान ना गुण गावीन बडाय करवा बाज जया, जे माणेह ने ईसम हक आपयो। 9 ईसु तां गेथो अगो जयो, अने तीहयो मत्ती नाम ना एक माणेह ने फाळो लेवा ना नाका पोर बह रेलो देख्यो, अने तीने केदो, मारी हाते चाल। अने तीहयो उठीन तीनी हाते चाल पड्यो। 10 एक दाडो ईसु आहफा ना चेला हाते मत्ती ना

घोर मे खाणु, खावा बहयो अने घणा देरका फाळो लेणया अने बीजा पापी आवीन तीनी हाते खाणु खावा बाज रया हाता। 11 अने आहयु देखीन फरीसी पंथवाळा ईसु ना चेला ने केदा, तमारे मास्तर फाळो लेणया अने बीजा पापी भेळतो खाणु काहा खाय? 12 ईसु आहयु हमळीन तीमने केदो, “आरगला ने दाक्तर नी जोवे, पण मांदला ने दाक्तर जोवे।” 13 एतरे जायन चोखली सास्तर मे लीखली आहयी वात ने हीक लेवो के मने बादा नी जोवती, पण गीण जोय री ईसु मतलब हु से, काहाके मे धरमी माणहु ने नी, पण पापी माणहु ने बोलावळा आवलो से। 14 अळतेण बपतीसमा आपणया युहनना ना चेला ईसुनतां आया, अने आहयु केदा, आमु अने फरीसी पंथवाळा उपाह करया। पण तारा चेला उपाह काहा नी करता? 15 ईसु तीमने केदो, जतयार तक लाडो हाते से, ततयार तक वरातया दुखी हयहे ह? बाखीन तीहया दाडा बी अक्क जतयार लाडो तीमनीनतां गोथो हय जाय, ता तीहया उपाह करहे। 16 नवलु थिंगळु जुनला लुगडा पोर कोय नी लगाडे; काहाके लुगडु धोवहे, ता तीहयो नवलु थिंगळु उहटी जहे, अने जुनला लुगडा ने हापकीन जादा फाड देहे। 17 अने नवला अंगुर नो रोह, जुनला चामडा ना कवड्या मे कोय नी भरे, नीता अंगुर नो रोह चामडा ना कवड्या ने फाड देहे। अने आसम करीन अंगुर नो रोह वय जहे अने चामडा नो कवड्यो बी बगडी जहे। करीन नवला अंगुर नो रोह नवला चामडा ना कवड्या मे भरे। अने तीहया बेम बचला रहे। 18 ईसु तीमने आहयी वात केवात बाज रेलो हतो, के मुखयो माणेह आयो अने तीहयो हुंगो व्हांन ईसु सी वीनूती करयो, मारी सोरी हमणे मर जेली से। पण आवीन तीनी पोर हात मेक, अने तीहयी जीवती हय जहे। 19 ईसु उडीन आहफा ना चेला भेळतो तीनी पसळ चाल पडयो। 20 अने देखो, एक बयर ने बारे साल नो पोगराळो दुख हतो, अने तीहयी पसळु गेथी आवीन ईसु ना लुगडा ना छेडा ने सीम लेदी। 21 काहाके तीहयी आहफी ना मन मे केती हती, “कदीम मे ईसु ना लुगडा ने बी सीम लेही ता मे आरगी हय जही।” 22 ईसु पासो फीरीन तीने देख्यो अने केदो, “बेटी हीमस्त राख; तारो भरहो तने वार करलो से।” अळतेण तीहयी बयर ततयास्त वार हय जी। 23 जतयार ईसु तीहया मुख्या ना घोर मे पुगयो अने फेपारया वगाडवा वाळा अने रडवा बाज रेला देख्यो ता केदो। 24 ईसु तीमने केदो, “सेटा हय जावो, सोरी मरी नी, पण हुवा बाज री।” आसम केदो एतरोत अने तीहया ईसु नी हाही उडाडवा बाज ज्या। 25 पण जतयार माणहु नी गडदी ने बीरी नीकाळ देदा। ता ईसु घोर मे जायन सलो नी हात धर्यो, अने तीहयी उडीन बह जी। 26 अने आहयी वात नी खबर तीहया आखा देस मे फेल जी। 27 जतयार ईसु तां गेथो अगो ज्यो, ता बे आंदळा ईसु पसळ आसम आडता जायन चाल पड्या, “ए दावुद नी अवलयात, अमारी पोर दया कर।” 28 जतयार तीहयो घोर मे पुगयो, ता तीहया आंदळा ईसु हाते आया, अने ईसु तीमने केदो, “के तमारे भरहो से के मे तमने वार कर सकतलो से?” तीहयो ईसु ने केदो, “होव, मालीक!” 29 ततयार ईसु तीमना डोळा सीमीन केदो, “तमारा भरहा नी लारे तमारी वाटु हय जाय।” 30 अने तीमना डोळा उगडी ज्या अने ईसु तीमने चेतावीन केदो, “चेतीन रेवो। कोय आहयी वात ने नी जाणे।” 31 पण तीहयो नीकळीन आखा देस मे तीहयी वात फेलाड देदी। 32 जतयार तीहयो बारो जवा बाज रयो हतो, ता देखो, माणहु एक गुंगा ने भूत लागलो हतो, ईसुनतां लाया; 33 अने जतयार भूत ने नीकाळ देदलो, ता गुंगो बोलवा बाज ज्यो। अने माणहु नी गडदी वहरायन केवा बाज जी, “ईस्रायल देस मे एवु कदी नी देख्या।” 34 पण फरीसी पंथवाळा केदा, “आहयो ते भूत ना डायला नी लारे भूत ने नीकाळतलो से।” 35 ईसु आखा हेर मे अने गाम मे फीरतो रयो अने युहदया ना भक्ती ना घोर मे माणहु ने हीकाडतो रयो, अने भगवान ना राज नी खूस-खबर नो परच्यार करतो रयो, अने आखी भातीन मंदवाड ने अने लुलखाय ने सेटी करतो रयो। 36 जतयार ईसु गडदी ने देख्यो ता ईसु तीमनी पोर दया करयो, काहाके तीहया तीना गाडरान तेवा हात, तीमनो कोय गुवाळ्यो नी हतो, घबरायला हात अने धर्यो जेला हाता। 37 ततयार ईसु आहफा चेला ने केदो, “मेर ते घणी से, पण मेर वाडवा वाळा दाडक्या थोडाक से। 38 एतरे मेर ना मालीक सी वीनूती करो के तीहयो आहफा नी मेर वाडवा करीन दाडक्या मोकल देया।”

**10** ईसु आहफा ना बारे चेला ने बोलायो अने वीटळळा आत्माम ने काडवा नो हक आप्यो, अने आखा भातीन मांदला ने आरगा करवा अने आखी लुलखाय सेटी करवा नो हक आप्यो। 2 बारे नेवताळा ना नाम आहया से: पेलो

सीमोन, जे पतरस केवाय, अने पतरस नो भाय अंदरयास; अने जबदी नो सोरो याकुब अने याकुब नो भाय युहनुनो; 3 अने फलीपस, अने बरतुलमे, अने थोमस, अने फाळो लेण्यो मत्ती; अने हलफाय नो सोरो याकुब, अने तददे; 4 सीमोन कनानी, अने यहूदा ईसकरियोती, जे ईसु ने धरायो। 5 ईसु बारे जणा ने आहयो हुकम आपीन मोकल्यो, “आडजातया माणहु भणी नी जजो, अने सामरी माणहु ना हेर मे नी जजो। 6 पण ईस्रायली जाती ना तीहया माणहु मे जावो, जे खोवायला गाडरान तेम हय जेला से। 7 अने वाटये चालता जायन ज्योरे आडीन ईसम परच्यार करो के हरग राज हाते आय जेलु से। 8 मांदला ने आरगा करो, मरला ने जीवाडो, कुडावा ने आरगा करीन चोखा करो, भूत ने नीकाळ्यो। तमने फोक्ट मे संयबरकत जडली से, एतरे आप देवो। 9 तमारी कोथळी मे होना ना, चांदी ना अने ताम्बा ना, पय्हा लाग नी लीजजो। 10 परच्यार करवा जाय ता, तमारी वाटु झोलो, बे डगला, हाडडा, अने डीगा नी लीजजो; काहाके दाडक्या ने खावा नु हक से।” 11 तमु काना बी हेर नीता गाम मे जावो, ता तां पुगीन एक मदत करवा लायक माणेह नो पतो लगाडो, अने तां गेथा जता लग तीनीनतां रेवो। 12 जीना बी घोर मे तमु जावो ता केजो, “आहया घोर ना माणहु ने सांती अने संयबरकत जडे।” 13 कदीम तीना घोर ना माणहु सांती नी संयबरकत हात करे एवा हय ता सांती नी संयबरकत तीमनी पांह रहे, पण तीमने सांती नी संयबरकत नी जोवती हय, ता सांती नी संयबरकत पासी आवती रहे। 14 कदीम कोय तमारे आव-भाव नी करे, अने तमारी वात नी हमळे, ता तीना घोर मे गेथा, नीता तीना हेर मे गेथा नीकळे ता तमारा पोग नो कादो झटकी देजो। 15 मे तमने हाचलीन केम, “नीयाव ना दाडे सदेमो अने अमोरा देस ना माणहु गेथी बी तीहया देस ना माणहु ने जादा डंड जडहे।” 16 देखो, मे तमने लेंड्या हको माणहुन वच मे गाडरान तेम मोकलु। एतरे गडहा ने तेम कदरया अने पारवान तेम खरला बणो। 17 “माणहु सी चेतिन रेवो। तीहया तमने हडका देवा करीन भगवान ना भक्ती ना घोर मे लीजहे, अने पंचु अगळ ली जायन हडका देह। 18 तमु मने मान रया करीन तमने राज करन्या, अने राजा अगळ लीजहे, अने ईसम करीन तमु आडजातया अगळ मारा गवा बणहु। 19 जतयार तीहया तमने सीपायडा ना हात मे होप देय, ता फीकर नी करजो के आमु हु केहु। काहाके तमने हु केवा जोवे तीहयु भगवान तीहयी टेमे की देहे। 20 काहाके बोलवा वाळा तमु नी हय, पण भगवान बाह नी आत्माम से, जे तमारा मन मे गेथी बोलहे।” 21 तीहया दाडा मे भाय आहफा ना भाय ने मराय नाखहे अने बाह आहफा ना सोरा-सोरी ने धराय देहे अने सोरा-सोरी आयुह-बाहा ना वीरोद मे हय जहे अने तीमने मराय नाखहे। 22 मारा नाम ना कारण आखा माणहु तमारी सी हीगी करहे, पण जे मरते लग गम खाहे, तीमने छुटकारो जडहे। 23 कदीम तीहया तमने एक हेर मे वेला पाडे ता बीजा हेर मे नाह जजो। काहाके मे तमने हाचलीन केम, तमने ईस्रायली देस ना आखा हेर मे फीरते-फीरते मनख्या नो सोरो आय लागहे। 24 “चेलो, मास्तर गेथो मोटो नी हय अने चाकरयो मालीक गेथो मोटो नी हय। 25 चेला ने मास्तर बराबर अने पावरया ने मालीक बराबर हयवान घणु से; जतयार तीहयो घोर ना मालीक ने बालजबुल केदो ता तीहया घोर वाळा ने काहा नी केय?” 26 एतरे माणहु सी ना बीहो। ईसम कंय बी ढकायलु नी हय, जे वीजाळा मे नी लवाये, अने ईसम कंय बी हातायलु नी हय, जे उजनतु नी हय। 27 मे तमने जे कंय अंदारला मे केम, तीने तमु वीजाळा मे हमळावो। अने जे कंय तमने होगेत केदलो से तीहयु तमु घोर ना पडाळ पोर चडीन ज्योरेत परच्यार करो। 28 तीमनी सी ना बीहो जे डील ने मार नाखहे पण जीव ने नी मार सके; बाखीन तीनी सी बीहो, जे डील अने जीव बेम ने नरक मे कर सके। (Geenna 11:16) 29 एक पय्याह मे बे घंचडी वेचाय, ते बी तमारा बाह नी मरजी वगर तीमनी मायन एक बी धरती पोर पडीन नी मरे। 30 तमारा मुंडा ना एक-एक नीमबाळा गणायला से। 31 एतरे ना बीहो। तमु ढेरत घंचडा गेथा मोगा से। 32 “जे मने माणहु अगळ मान लेहे। तीने मे बी मारा हरग वाळा बाह अगळ मान लेही। 33 अने जे मने माणहु अगळ नीकारो करहे, तीने मे बी मारा हरग वाळा बाह अगळ नीकारो करही।” 34 “आहयु ना हमजो के मे धरती पोर सांती लीन आवलो से। मे सांती लीन नी आयो बाखीन तलवार लीन आवलो से।” 35 मे आनीन करीन आवलो से के बेटा ने बाह ना वीरोद मे करवा, अने व्वेह ने हाहु ना वीरोद मे करवा करीन आवलो से। 36 माणेह ना वेरी तीना घोर वाळा बण जहे। 37 “जे बेटो आहफा ना बाह ने नीता आहफा नी आयुह ने मार गेथो जादा मोंग करे, तीहयो मारी लायक नी हय। अने जे बी बाह बेटा ने नीता बेटी ने मारी गेथो

जादा मोंग करे तीहयो मार लायक नी हय। 38 जे कोय आहफा ना दुख नु कुस्स उचलनी मार पसळ नी चाले, तीहयो मार लायक नी हय। 39 जे आहफा नो जीव बचाडवा हीडे, तीहयो आहफा ना जीव ने खोय देय; अने जे मारीन करते आहफा नो जीव खोय नाखे, तीहयो आहफा ना जीव ने बचाड लेहे।” 40 जे तमार आव-भाव करे, तीहयो मारो आव-भाव करे, अने जे मारो आव-भाव करे, तीहयो तने मोकलन्या नो आव-भाव करे। 41 जे भगवान वगे गेथी वात केणया माणह नो आनीन करते आव-भाव करे के तीहयो भगवान वगे गेथी वात केणयो माणेह से, ता तीने भगवान वगे गेथी वात केणया ना ईलाम ने तेवतु ईलाम जडे। अने जे धरमी नो आनी करते आव-भाव करे के तीहयो धरमी से, ता तीने भगवान वगे गेथी वात केणया माणह ना ईलाम ने तेवतु ईलाम जडेहे। 42 अने जे कोय आहया नानला हदला चेला मायन काना एक ने पीवा करीन टाडलु पणी आसम करीन आपहे के तीहयो मारो चेलो से, ता मे तमने हाचलीन केम के तीहयो आहफा नु ईलाम हात करहेन करहे।

**11** जतयार ईसू आहफा ना बारे चेला ने आहयी हीकापण आप चुक्यो अने गलील जीला ना हेर-हेर ने हीकापण आपतो, अने परचयार करतो जायन तां गेथो जत र्यो। 2 जतयार युहननो जेल ने रीन ईसू मसीन काम ना बारा मे खबर हमळीन अने आहफा ना चेला ने तीने आहयु पुसवा मोकलयो, 3 “हू आववा वाळो तुत से नीता आमु बीजा नी वाट जोवया?” 4 ईसू तीने जपाप आप्यो, “जे कंय तमु हमळो अने देखो तीहयु आखु जायत युहननाने ने की देजो, 5 के आंदळा देखे, अने लंगडा चाले, कुडावा आरगा हये, बेरा हमळे मरला जीवता हये, गरीब ने खुस-खबर हमळाव्यो। 6 अने जुगाळो से तीहयो, जे मारी कारण सी ठोकर नी खाय?” 7 जतयार तीहया तां गेथा चाल पड्या, ता ईसू युहनना ना बारा मे माणह ने केवा बाज जयो, “तमु बडा मे हू देखवा जेला हता? के वाहळु मे हीलतला वाहणया ने? 8 अळी तमु हू देखवा जेला हता? के नरम लुगाडा परला भागवान ने? देखो, जे नरम लुगाडा परे, तीहया राजा नी हवेली मे रेय। 9 ता अळी काहा जेला हता? भगवान वगे गेथा केणया माणेह ने देखवा करीन जेला हू? होव, मे तमने केम के भगवान वगे गेथा केणया गेथा बी मोटला माणेह ने देखवा जेला। 10 आहयो तीहयोत से, जीना बारा मे लीखलु से; के देख; मे मारा हरगदुत ने तार गेथो अगळ मोकलही। तीहयो तार अगळ तार जुगु रोहो तीयार करहे। 11 मे तमने हाचलीन केम के, जे आहय सी पयदा हयलो से, तीमनी मे गेथो युहनना बपतीसमा आपवा वाळा सी कोय मोटो नी हय, पण जे हरग राज मे नाना सी नानो से तीहयो बपतीसमा आपणया युहनना गेथो मोटो से। 12 युहनना बपतीसमा आपण्यो आयो तां गेथात आज तक माणह हरग राज मे ताखत भेळ भरयाता रेटा हता, अने ताखत वाळा तीने हापकी लेता हता। 13 भगवान वगे गेथी वात केणयो माणेह अने मुसा नी लारे लीखली सासतर, बपतीसमा आपणया युहनना ने आववा नी पेलेत भगवान वगे गेथी वात केता हता। 14 कदीम तमने जोवे ता मानो के एलीया जे आववा वाळो हतो तीहयो आहयो युहननो से।” 15 जीना कानटा हय, तीहयो हमळी लेय। 16 मे आहयी पीडी ना माणह नी बराबरी मे कोय सी करू; तीहया हाट मे बहला तीहया सोराम नी तेवा से, जे एक-बीजा सी आडीन केता हता, 17 के आमु ते तमारी वाट पीहो वगाड्या, अने तमु नी नाचया; आमु ते दुखी हया, अने तमु छाती नी पीट्या। 18 काहाके बपतीसमा आपणयो युहननो नी ते रोटला खातो हतो अने नी पीतो हतो, अने तीहया केता हता के तीनी मे थुत से। 19 माणह नो सोरो खातो-पीतो आयो, अने तीहयो केतो हतो के देखो, “खाडइयो अने दारकुटो माणेह, फाळो लेणया अने पापी नो दोस्तदार से। पण जे माणह ने भगवान नी अक्कल हीकाडे तीहया खरला से।” 20 ता ईसू तीहया हेर ना माणह ने खीजवायन वडवा बाज जयो, तां हारीक ईसू डेरत जुदा-काम करयो पण तीहया आहया काम देखीन बी पाप भणी गेथा मन फीरवीन भगवान वगा नी वळ्या। 21 ए खराजीन हेर! ए बेतसेदा! तमारी वाट दुख नी वात से; देख, जे सकृती ना काम तमारी मे करयो, तीहया सुर अने सेदा मे करतो, ता तीहया ठेला ओडीन अने रोखडा मे बहीन पापु भणी गेथा मन फीरवीन भगवान वगा वळ जता। 22 एतरे मे तमने केम नीयाव ना दाडे तमारी हालत सर हेर अने सेदा हेर नी हालत सी बी जादा वेठवा जुगु हयहे। 23 अने ए कफनरनुहमा! हू तु हारगे लग उचु हयही? नी! तु ते पताळ मे लग हेठो जही; जे सकृती ना काम तमारी मे करला से, कदीम तीहया सदाम मे करतो, ता तीहया आज लग बणीन रेटा। (Hades g86) 24 एतरे मे तमने केम, नीयाव ना दाडे तमने सदाम गेथो जादा डंड जडहे।” 25 तीहयी टेमे ईसू केदो, “बाह! हरग अने

धरती ना मालीक! मे तारा गुण गावु; काहाके तु आहयी आखी वात ने अक्कल वाळा अने भणला माणहू गेथी हताडीन भोळा सोरा हरका माणहू अगळ उजन्ती करयो। 26 होव बाह! तु आनी करते आसम करयो काहाके तने आहयुत वास लाग्यु।” 27 “मारो बाह, मने आखु कंय आप देदलो से। बाह ने सोडीन कोय बी बेटा ने नी जाणतु। आहयीत रीते बेटा ने सोडीन बाह ने कोय नी जाणतु। अने तीहयो एतरोत बाह ने जाणे, जीमनी पोर बेटो बाह ने उजन्तो करे।” 28 “ए आखा काम करीन थाकला अने भार मे डबायला माणहू मारीनां आवो, मे तमने अराम आपही। 29 मारो वळो आहफा पोर मेक लेवो अने मार सी हीको, काहाके मे नीचळो अने मन मे गरीब से। अने तमु तमारा मन मे अराम हात करहु, 30 काहाके मारो वळो वास से, अने मारो भार फवरलो से।”

**12** ईसू काना अराम ना दाडे गम ना खेतर मायन जवा बाज रेलो। ता तीमना चेलाम ने भुक लागी, अने तीहया उंबया तोडी-तोडीन खावा बाज जया। 2 आहयु देखीन फरीसी पंथवाळा ईसू ने केदा, “देख, जे काम अराम ना दाडे काव वास नी हय, तीहयुत काम तारा चेला कर रया।” 3 ईसू तीहया फरीसी माणहू ने केदो, “खरला सासतर मे तमु नी भणया हू? के जतयार दावुद राजा अने तीना हाती ने भुक लागला ता तीहया हू करया? 4 तीहया भगवान ना तमभू मे जासत भेट चडावला रोटला खादा, अने नीसता भगवान ना पुंजारा ने सोडीन तीने अने तीना हाती ने रोटला खावा ताले नी हतु।” 5 नीता, मुसा नी लारे लीखली सासतर मे तमु नी भणया हू? के भगवान ना मंदीर ना पुंजारा अराम ना दाडा नो नेम तोडीन बी तीहया वण-गुनाळ्या ठेरया। 6 “मे तमने केम, जे आजे हारीक से तीहयो मंदीर गेथो बी मोटो से। 7 कदीम तमु सासतर मे लीखली आहयी वात हमजी जता के “मे माणहू मे गीण देखवा हीडु, जानवर ने मारीन बादा नी जोवती” ता वण-गुनाळ्या ने गुनाळ्या नी ठेरावता। 8 काहाके मनखया नो सोरो अराम ना दाडा नो मालीक से।” 9 अने अळतेण ईसू तां गेथो अगो जयो, अने भगवान ना भकृती ना घोर मे जयो। 10 तां एके माणेह हतो, तीनो हात हुक जेलो हतो। ईसू पोर गुनो लगाडवा करीन फरीसी माणहू तीने पुछ्या, “अराम ना दाडे कोयने वास करवा तालेत से हू?” 11 ईसू तीमने केदो, “कदीम तमारु एकीत गाडरु हय, अने तीहयु खाडा मे पड जाय, ता तमारी मायन एवु कोय से, जे अराम ना दाडे तीने धरीन नी नीकाळे? 12 माणेह ते गाडरा गेथो घणो मोगो से। एतरे अराम ना दाडे भलाय करवा तालेत से।” 13 ता तीहयो ते माणेह ने केदो, “तारो हात नाम्बो कर।” अने तीहयो आहफा नो हात नाम्बो करयो, अने तीहयो हात वास हय जयो। अने बीजा वारला हात ने तेवो हय जयो। 14 एतरे फरीसी पंथवाळा बारथा नीकाळीन ईसू ना वीरोद मे आहयो वीचयार करया आमु आने कीसम करीन माणहू? 15 ईसू आहयु जाण ज्यो अने तां गेथो चाल पड्यो। अने घण डेरका माणहू ईसू पसळ चाल पड्या। तीहयो आखा ने आरगो करतो हतो। 16 बाखीन तीहयो तीमने आहयु कीन चेतावतो हतो के “तमु मारु नाम लीन बीजा माणहू अगळ उजन्तो नी करजो।” 17 आहयु एतरे हयु के भगवान वगे गेथी वात केणया माणहू यसाया नी लारे जे मालीक केदलो हतो, तीहयु पुरु हये: 18 आहयो मारो चाकरयो से, आने मे टाळलो से; आहयो मारो घणो मोंगाळ्ळो से, मे आनी पोर घणो खुस से। मे आनी मे मारी आत्मा भर देही। अने आहयो आखा देस ना माणहू ने हाचलीन नीयाव नी खुस-खबर करहे। 19 तीहयो नी झगडो करे, अने नी धूम मचाडहे; अने नी हाट मे कोय बी आनो बोल नी हमळे। 20 आहयो कचरायली वाहण ने नी तोडे। अने ओलायतला दीवा ना बापळ्या ने आंगीत नी ओलव। 21 जतयार लग आहयो हाचलीन नीयाव करीन जीक नी आपां, तां लंग पासो नी सोडे। 22 ततयार आखा देस ना माणहू आना नाम नी आह करहे। 22 अळतेण माणहू एक आंदळा माणेह ने ईसुनां लाया, तीहयु गुंगु बी हतु। अने भुत लागलु हतु। ईसू तीने आरगो करयो। अने तीहयो बोलवा अने देखवा बाज जयो। 23 आखा माणहू वहरायन ईसू ना बारा मे केवा बाज जया, “आहयो दावुद नी अवलयात हयवा जोवे हू?” 24 पण आहयी वात हमळीन फरीसी पंथवाळा केदा, “आहयो ते भुत ना मुखी बालजबुल नी मदत सी भुत ने नीकाळे।” 25 ईसू तीमना वीचयार जाणीन तीमने केदो, “जे राज मे बेरजाव पड जाय तीहयु कदी नी टेके। एमेत तीहयु घोर नीता हेर बी नी टेके, जीनी मे बेरजाव पड जाय। 26 कदीम भुतडोत आहफा ना वीरोद मे हय जासत ता तींग राज कीकम टेकलु रेहे? 27 अने कदीम मे भुतडा नी मदत सी भुत ने काडु ता तमारा सोरा कोयनी मदत सी भुत काडे? एतरे तीहया तमारो नीयाव करहे। 28 पण



कदीम मे भगवान नी जीव आत्मा नी ज्योरे भुतडा ना जोमु ने काडु, ता जाण लेवो के भगवान नु राज तमारी वच मे आय जेलु से। 29 कोय बी माणेह काना बी जोर वाळा माणेह ना घोर मे भरायन हमान नी लुट सके जतयार तक तीहया ते जोर वाळा माणेह ने बांद नी लेय। अने जतयार तीहयो ते जोर वाळा ने बांद लेय, ततयार तीहयो तीना घोर मे भरायन हमान लुट सके। 30 “जे मारी हाते नी हय, तीहयो मारा वीरोद मे से, अने जे मारी हाते भगवान गेथा सेटा हयला माणहू ने भेडा नी करे, तीहयो तीमने रीवाण्या-तीवण्या कर रयो।” 31 एतरे मे तमने केम, माणहू ने आखी भाती ना पाप नी लेदे माफी जड जहे; आंया लग के भगवान नो जबराण वाक काडे तीने बी माफी जड जहे, पण भगवान नी चोखली आत्मा नो वाक काडे ता तीने माफी नी जडे। 32 जे कोय मनख्या ना सोरा ना वीरोद मे कंय केवडे, तीने माफी जड जहे। पण चोखली आत्मा ना वीरोद मे कंय केवडे, तीने माफी नी जडे। आहयी कळी मे बी माफी नी जडे, अने आव्वा वाळी कळी मे बी माफी नी जडे। (aiōn g165) 33 कदीम एक झाड वारु हय, ता तीना फोळ बी वारु रेहे, अने कदीम एक झाड खोडलु रय, ता तीनु फोळ बी खोडलुत रेहे, काहाके एक झाड नी ओळखाण तीना फोळ सी हये। 34 ए गडहा ना सोरा! तमु बुरा हयन बी वारली वात किसम की सके? जे तमारा मन मे भरलु से, तीहयुत तमारा मोडा मे गेथु आवे। 35 वारलु माणेह आहफा ना वारला मन ना खजाना मे गेथी वारली वात नीकाळे; अने खोडलो माणेह आहफा ना खोडला मन ना खजाना मे गेथी खोडली वात नीकाळे। 36 एतरे मे तमने केम, “नीयाव ना दाडे माणहू ने आहफाम नी एक-एक रीकामी वात नो लेखो आपु पडहे। 37 काहाके तमु आहफाम नी वात नी लारेत यण-गुनाळ्या अने गुनाळ्या ठेरहु।” 38 तीहयी टेमे थोडाक चोखली सासुतर हीकाडन्या, अने फरीसी पंथवाळा ईसु ने केदा, “मासुतर! आमू तारी लारे एक उजनती सेलाणी देखवा हय रया।” 39 पण ईसु तीमने केदो, “आहयी पीडी ना कुहरया अने छीनाळ्या माणहूत एक सेलाणी देखवा हीडे, पण भगवान वगे गेथी वात केणया माणेह योना नी सेलाणी ने सोडीन कानी बी सेलाणी आमने नी देखाव पडे।” 40 जीसम योना तीन दाडा मे अने तीन रात मे राकस माखला ना पेट मे रेलो, तेमेत मनख्या नो सोरो धरती मे रेहे। 41 नीयाव ना दाडे नीनवे हेर ना माणहू आहयी पीडी ना माणहू हाते जीवता हयहे, अने आमने गुनाळ्या ठेरावहे। काहाके तीहया योना नी लारे भगवान नी केदली वात हमळीन, पापु भणी गेथु मन फरीवीन भगवान गवा वळला हाता, अने देखो, आंजे ते योना गेथो बी घणो मोटो से। 42 नीयाव ना दाडे दखणाव देस नी राणी आहयी पीडी ना माणहू हाते जीवती हय जहे, अने आहयी पडी ना माणहू ने गुनाळ्या ठेरावहे; काहाके तीहयी सुलेमान राजा नी अक्कल वाळी वात हमळवा करीन धरती नी काकड गेथी आवली, अने देखो, आंजे ते सुलेमान राजा गेथो बी मोटो से! 43 “जतयार वीटळळी आत्मा माणेह मे गेथी नीकळी जाय, ता तीहयी अराम करवा करीन, हुकला जागा मे, जागो होदती रय; पण तीने अराम नी जडे। 44 ता तीहयो केय ‘जा गेथो नीकळळो से, तांत मारा तीहया घोर मे पासो जही।’ अने भुतडा नो वीटळळो जोम पासो आवे, ता तीने तीहयु घोर हनुलु, झाटकीन बारलु अने चापड करीन घटाळु करलु देखाव पडे। 45 ता तीहयी वीटळळी आत्मा पासी जतर रय अने जायत तीनी हाते बीजी हात कुहरयाण वीटळळी आत्मा ने बी ली आवे। अने तीहया माणेह मे भरायन तांत रेवा बाज जाय। अने तीहया माणेह नी पेले गेथी बी जादा वेला हय जाय। आवीत वेला आहया पीडी ना माणहू नी बी हयहे, जे कुहरया से।” 46 ईसु घोर मे माणहू ने हीकाडवा बाज रयो हतो, तीहयीत टेमे तीनी आयहू अने भाय आया। तीहया बारा उबा हय रेला, अने ईसु ने भेटवा हीडता हाता। 47 कानो आवीन ईसु ने केदो, “देख! तारी आयहू अने भाय बारथा उबा हय रया, तीहया तारी हाते वात करवा हीडे।” 48 ईसु तीमने केदो, “कोय से मारी आयहू? अने कोय से मारो भाय?” 49 अने आहफा ना चेला भणी हात नो अनसरो करीन तीहयो केदो, “देखो! आहया से मारा भाय अने मारी आयहू। 50 काहाके जे कोय मारा हरग वाळा बाह नी मरजीन अनसारे जीवे, तीहयोन-तीहयो मारो भाय, अने मारी बेनेह, अने मारी आयहू से।”

**13** तीहयात दाडे ईसु घोर मे गेथो नीकळीन दरया धेडे जीन बह ज्यो। 2 अने दरया धेडे ईसुन्यां घणा ढेरका माणहू आय लागया अने तीहयो ढुंड्या पोर चडीन बह ज्यो, अने आखा माणहू दरया धेडे उबा हय जया। 3 तीहयो दाखला ना लारे तीमने वात हीकाड्यो। अने तीहयो एक दाखलो केदो, “हमळो! कानो कीरसाण बीज वाक्वा ज्यो। 4 वाक्वा-वाक्वा मे थोडाक बीज वाट धेडे पड्या,

अने चडा आवीन तीने खाय जया। 5 थोडाक बीजडा चाफरया वाळा जागा मे पड्या तां उठळो कादो हतो; एतरे तीहया छोटा उगी आया; अने मुड्या उठ्ठे नी जया। 6 एतरे दाहडु उगीन तोप लागयो ता तीहयु धान चीमायन हुक ज्यु। 7 थोडाक बीज काटा वाळा झाटवा मे पड्या, अने उग्या पण कटाळ्या झाटवा तीहया रोपा ने डाव देदा। 8 थोडाक बीजडा वारली जागा मे पड्या अने उगीन मोटा हयन काना होव गुणा, अने काना साट गुणा, अने काना तीस गुणा फोळ लाया।” 9 जीनी पांह हमळवा ना कानटा हय तीहयो हमळ लेय। 10 ईसुन ना चेला हाते आवीन तीने केदा, “तु काहा माणहू ने दाखला मे हीकापण अपे?” 11 ईसु तीमने जपाप आय्यो, “मे आनीन करीन दाखला मे देखाडु काहाके हरग राज ना बारा मे जाणवा नी हमज तमने भगवान आपलो से, पण हीय्या माणहू ने नी आय्यो। 12 काहाके जीनी पांह थोडाक आपली अक्कल से, तीनेत आणहे अने तीना पांह ढेरत अक्कल हय जहे। पण जीनी पां कंय बी नी हय, तीनी पांह गेथी तीहयी अक्कल बी मांग लेहे।” 13 मे तीमने दाखला मे हीकाडु काहाके हीय्या देखता जीन बी नी देखे, अने हमळता जीन बी नी हमळे अने नी हमजे। 14 यसायो आहयी बी वात भगवान वगे गेथी केदलो हतो, तीहयी वात तीहया माणहू मे तेम ने तेम पुरी हय री: तमु हमळहु, अने हमळ्यात करह, पण तमने थोडीक बी नी हमजाये; अने तमु देखहु, पण तमने पल्ले नी पडे। 15 काहाके आहया आहफाम नु मन काठु कर लेदला से। आहया मन बेरा हय जेला से। अने आहया आहफाम ना डोळा मीच लेदला से। आहया ईनीन करते आसम करया काहाके ईमने कंय बी नी देखावा जोवे, अने ईमने कंय बी नी हमळाववा जोवे, अने ईमना मन ने कंय बी पल्ले नी पडवा जोवे, अने कदी मारी भणी नी वळवा जोवे, काहाके मे ईमनो छुटकारो कर देही। 16 पण जुगाळा से तमारा डोळा, काहाके हीय्या देखे, अने जुगाळा से तमारा कानटा, काहाके हीय्या हमळे! 17 मे तमने हाचलीन केम, के ढेरत भगवान वगे गेथी वात केणया माणहू अने नीयाव करन्या हेर करया के, जे वात तमु देखो, देख्या पण नी देखाय; अने जे वात तमु हमळो, हमळ्या, पण नी हमळ्या। 18 हाव तमु कीरसाण ना दाखला नो मतलब हमजो: 19 बीज वाक्वा नी टेमे जे बीज वाट धेडे पड्या, तीहया आहयी सेलाणी देखाडे के कदीम कोय भगवान ना राज ना बोल हमळे, बाखीन हमजे जे, ता तीना मन मे जे वेरायलु से, तीने कुहरयो भुतडो आवीन लीतली रय। 20 चाफरया वाळी जागा मे वाळा बीज तीहया माणेह नी सेलाणी से: तीहयो भगवान नो बोल हमळतेत खुस हयन मानीन आवरे; 21 पण तीनी मे मुड्या उंडा नी हयवा सी तीहयो थोडाक दाडा लग भरहो करे, पण भगवान ना बोल नी लेदे तीनी पोर दुख अने वेला आय पडे, ता तीहयो ततयास्त भरहो सोड देय। 22 जे बीज झाटवा वाळी जागा मे पड्यु तीहयु ते माणेह नी सेलाणी से, जे भगवान ना बोलु हमळे ते खरो, पण तीने कळी मे वाळी जीवायन नी फीकर अने धन नी लालच भगवान ना बोलु ने पाळीन चालवा नी देय, अने तीहयो जीवायन फोळ नी लावे। (aiōn g165) 23 वारली जागा मे पडलु बीज तीहया माणेह नी सेलाणी से: जे भगवान ना बोलु हमळे, अने हमजे, अने फोळ लावे। कानो होव गुणा फोळ लावे, कानो साट गुणा फोळ लावे, अने कानो तीस गुणा फोळ लावे। 24 ईसु तीमनी अण्ड एक अळी दाखलो केदो, “हरग नु राज तीहया माणेह नु हरकु से, जे आहफा ना खेतर मे वारलु बीज वेर्यो। 25 पण जतयार माणहू हुक्वा बाज रेला, ता तीनो वेरी आयो, अने गाम मे जंगली बीज ने वेरीन जत रयो। 26 जतयार हुका फुट्या अने उंबया नीकळ्या ता जंगली बीज देखाव पड्या।” 27 एतरे पावरया मालीक ना घोर आवीन मालीक ने केदा, “मालीक तु तारा खेतर मे वारलु बीज नी वेर्यो हु? ता तीनी मे जंगली बीज कीकम उग आया?” 28 मालीक तीमने केदो, “आहयु काना वेरी नु काम से।” ता पावरया तीने पुख्या, “तारी मरजी हय ता आमू जायत जंगली बीज ने उखड दीया?” 29 मालीक केदो, “नी ईसम ना करो नीता कंय मायन जंगली बीज ना झाटवा हाते, गम बी नी उखडी जाय। 30 वाडणी आवते लग भेळात वदवा देवो। वाडवा नी टेम पोर वाडवा वाळा ने केही, ‘पेले जंगली बीज ना झाटवा भेळा करो अने धपाडवा करीन हीमना पुळा बांदो। अने अळतेण गम ना दाणा ने मारी मोहटी मे भेळा करो।’” 31 ईसु तीमने एक अळी दाखलो हमळ्यायो, “हरग नु राज राय ना दाणान तेवु से, जीने लीन कानो माणेह आहफा ना खेतर मे वेर देदो। 32 तीहयु ते बीजा आखा बीज मे गेथु नातु रय, पण उगीन वदीन वाडी ना भाजी-पाला ना झाटवा गेथु मोटु हय जाय, अने एवु झाटवु बण जाय के हरग ना चडा आवीन तीना डाळ्या पोर पोतरा बांदीन रेवा बाज जाय।”

33 ईसू तीमने अळी एक दाखलो हमळावो, “हरग नु राज तीहया खमीर हरकु से, ज्जिने लीन कानी बयर तीन कागणी लोट मे भेसकीं अने आखो लोट खमीर वाळो हय ज्यो।” 34 ईसू आखी वात दाखला नी लारेत माणहु ने हमजाडतो हतो। अने दाखला वगर कंय बी नी केतलो। 35 भगवान वो गेथी वात केणया माणहु नी लारे जे केदलु तीहयु पुरु करवा नी करतेत ईसू दाखला नी लारे वात करतो हतो: जेम भगवान केदलो, मे दाखलो केवा करीन मारु मोडु उगाडही; अने कळ घडायली तां गेथा पेलना वारा नी हतायली वात उजनी करही। 36 ईसू माणहु ने वळाय दीन पासो घोर आयो। तीना चेला तीनीनां आवीन केदा, “खेतर मे वाळा जंगली बीज ना दाखल नु मतलब हू हये तीहयु आमने हमजाड दे।” 37 ईसू तीमने केदो, “वारलु बीज वेरन्यो करिसण, मनखया नो सोरो से; 38 अने खेतर आहयी कळी से: वारलु बीज भगवान ना राज ना माणहु हय; अने जंगली बीज कुहरया भुतडा ना माणहु से; 39 अने वेरवा वाळो वेरी भुतडो से; वाडणी कळजुग नु खतुतम हयणु से; वाडणया हरगदुत से। (aiōn g165) 40 जीसम माणहु जंगली बीज ना झाटवा ने भेळा करीन आकटु मे धपाड देय, तेमेत आहयी कळजुग खतुतम हयहे। (aiōn g165) 41 मनखया नो सोरो हरगदुत ने मोकलहे अने तीहया तीना राज मे गेथा आखा पाप करनया ने अने गलत काम करनया माणहु ने भेळा करहे, 42 अने तीमने आकटु नी दरया मे धकली देहे; अने तीहया माणहु तीहयी आकटु नी भाटी मे ढोळो-ढोळो अने फुकु-फुकु रडहे 43 तीना वारा मे धरमी माणहु आहफा ना बाह ना राज मे दाडान तेम बळवहे। जीना कानटा हय तीहयो हमळी लेय।” 44 “हरग नु राज खेतर मे खोवायला धन ने तेवु से, जे काना माणहु ने जड्यु अने तीहयु माणहे हताड देदु अने तीहयु खुस हय जाय अने आरु कंय वेचीन तीहया खेतर ने वेचातु लेदो।” 45 “अळी हरग नु राज एक वेपारीन तेवु से जे वारला मोती नो होदवाळया हतो। 46 जतयार तीने एक मोगलो मोती जड्यो ता तीहयो जायन आहफा नु आरु कंय वेच देदो अने तीने वेचातु ली लेदो।” 47 “अळी हरग नु राज तीहयी मोदली जाळ ने तेवु से तीहया दरया मे नाख देदा, अने आखी भाटी ना माळला हापकी लायो। 48 अने जतयार जाळ भराय जी, ता काहरया तीनी जाळ ने धेडे हापकी लाया, अने बहीन वारु-वारु तां ठाहरा मे भेळा करया अने बगडला-बगडला माळला ने नाख देय। 49 कळ खतुतम हयवान टेमे बी एमेत हयहे। हरगदुत आवीन पाणी माणहु ने धरमी माणहु मे गेथा सेटा करहे, (aiōn g165) 50 अने तीमने आकटा ना खाडा मे नाखे। ता तीहया माणहु रडहे अने दात कळकावता रहे।” 51 हू तमु आहयी आखी वात ने हमज्या? 52 ईसू तीमने केदो, “एतरे जे बी चोखली सासुतर नो कायदो हीकाडन्यो हरग राज नो चेलो बणलो से, तीहयो तीहया घोर मालीक हरको से, जे आहफा ना घोर ना खजाना मे गेथो नवला अने जुल्ला चीज नीकाळे।” 53 जतयार ईसू आहया आखा दाखला की देदो, ता तां गेथो जत रयो। 54 अने ईसू आहफा ना हेर मे आवीन तीहया भगवान ना भक्ती ना घोर मे जायन माणहु ने हीकाडवा बाज ज्यो। के तीहया घबरायन केवा बाज जया, “अने आहयी अककल अने घणा जुदा-काम कां गेथा जड्या? 55 आहयो हुतार नो सोरो नी हय हू? अने हू आनी आयह नु नाम मरीयम अने तीना भाय नु नाम याकुब, अने यूसुफ अने सीमोन अने यहूदा आना भाय नी हय? 56 अने हू आखा बेनेह आपणी वच मे नी रेय? अळी आने आहयी आखी अककल अने जोर कां गेथो जड्यो?” 57 आनीन करता तीहयो ठोकर खादो, पण ईसू तीने केदो, “भगवान वगे गेथी वात करन्यो माणहे नी ईजजत तीना गाम ने अने घोरनया ने सोडीन आखी जागे हये।” 58 अने ईसू तां भरहो नी करया करीन जादा काम नी कर्यो।

**14** तीहयी टेमे चोवथा देस नो राजा हेरोद ईसू ना बारा मे हमळ्यो। 2 अने आहफा ना पावरया ने केदो, आहयो ते बपतीसमा आपणयो युहनना से। हीय्यो मरला मे गेथो जीवतो हय जेलो से, एतरे तीनी सी सकृती ना काम तीनी लारे हयतला से। 3 हेरोद राजा आहफा नो भाय फीलीपसु नी लाडी हेरोदीयास ना कारण, बपतीसमा आपणया युहनना ने धरीन बांद्यो, अने जेल मे बंद कर देदलो हतो; 4 काहाके बपतीसमा आपणयो युहनना तीने केदलो हतो, के हीने राखवा तारी जुगु ताले नी हय। 5 हेरोद राजा बपतीसमा आपणया युहनना ने मार नाखवा हीडतो हतो; ते बी माणहु ने देखीन बीहतो हतो, काहाके तीहया तीने भगवान वगे गेथो केवा वाळो माणहे मान्ता हता। 6 पण जतयार हेरोद नो पसदावारीन दाडो आयो, ता हेरोदीयास नी बेटी पोरणग अगळ नाचणु देखाडीन हेरोद ने खुस करी। 7

एतरे तीहयो हाम खायन वायदो कर्यो, जे कंय तु मांगहे, मे तने तीहयु आप देही। 8 तीनी आयह तीने पेले गेथी केदली हती। एतरे तीहयी केदी, मने हमणे थाळी मे बपतीसमा आपणया युहनना नु मुंडु मंगाड दे। 9 हेरोद राजा ने दुख लागयो, पण आहफा नी हाम अने हाते बहला माणहु ना कारण सी, हुकम आपीन केदो, हीने बपतीसमा आपणया युहनना नु मुंडु आप देवो। 10 अने सीपायडा ने मोकलीन तीहया जेल मे गेथु बपतीसमा आपणया युहनना नु मुंडु तोडाय देदो। 11 अने तीहया तीनु मुंडु थाळी मे ली आया, अने सोरी ने आप देदा, अने तीहयी ते मुंडु ने आहफी नी आयह ने आप देदी। 12 अने युहनना ना चेला आवीन तीनु घोड ने ली जायन तीने गाड देदा, अने जायन तेने खबर करया। 13 ईसू युहनना नी मोत नी खबर हमळीन हुंड्या मे बपतीसमा गेथो एक हुनननन जागा भणी जत रयो। अने माणहु आहयु हमळीन हेर-हेर गेथा चालीन तीनी पसळ हय जया। 14 अने ईसू हुंड्या मे गेथो उतरयो, ता एक घणो मोटो माणहु नो मेळो देखयो; अने तीने तीहया माणहु पोर दया आय जी, अने तीहयो जे मांदला हता तीमने आरगा करयो। 15 जतयार हांती टेमे ईसू ना चेला तीनीनां आवीन केदा, आहयो जागो हुनकार से, अने दाहडु ढळ जेलु से। माणहु ने वळाय दे, अने आहया गाम मे जायन आहफा वाटु खाणु वेचातु ली लेय। 16 ईसू चेला ने केदो, हीमने जवा जरुडी नी हय, तमु हीमने खावा नु आपो। 17 पण चेला केदा, अमारी पांहा पांच रोदला अने बे माळला सोडीन बीजु कंय बी नी हय। 18 ईसू केदो, हीयया रोदला अने माळला मारीनां लावो। 19 ईसू माणहु ने चारा पोर बहवा करीन केदो, तीहया पांच रोदला अने बे माळला हात मे धरीन हरग भणी भाळीन तु घणो वारु से केदो। अने रोदला भांगीन चेला ने आपयो, अने चेला माणहु ने आपया। 20 आखा माणहु जायन आफरी जया, अने बचला रोदला ना टुकडा सी बारे चारली भराय जया। 21 अने खाणु खावा वाळा मे, बयरा अने सोरा ने सोडीन पांच हजारा अदमडा हता। 22 अने ईसू ततयास्त आहफा ना चेला ने केदो, के तमु हुंड्या मे बहीन दरया नी हेली धेडे जत रेवो; तांहा तक मे माणहु ने वळाय देम। 23 ईसू माणहु ने वळाय दीन एखलो बहीन वीनूती करवा करीन बडा पोर जत रयो। अने हांतो, तां तीहयो एखलो हतो। 24 तीहयी टेमे लग हुंड्यु हेरे नामबे जत रेलु हतु अने दरया नी वच मे झलक सी डुलकी रसु हतु, काहाके वाहळु अगळ नु हतु। 25 राते तीने बजे गेथो छोव बजे ईसू दरया ना पाणी पोर चालतो जायन चेला भणी आयो। 26 जतयार चेला ईसू ने दरया पोर चालतलो देखया, ता, तीहया घबराय जया, अने केदा, आहयो ते कानो भुत से, अने तीहया बीहीन आड पड्या। 27 ईसू ततयास्त तीमने केदो, हीममत राखो! मेत से, बीहो ना। 28 पतरस केदो, “ए मालीक! कदीम तुत से, ता मने पाणी पोर चालीन तारीनां आव्वा नो हुकम आप।” 29 ईसू केदो, आव। अने पतरस हुंड्या मे गेथो उतरीन पाणी पोर चालतो जायन ईसू भणी जवा बाज जयो; 30 पण तीहयो जयारे आवतलु वाहळु देखीन बीह ज्यो, अने ततयास्त पाणी मे डुबवा बाज जयो, अने आडवा बाज जयो, “ए मालीक! मने बचाड।” 31 ईसू ततयास्त तीने हात अगो करीन धर लेदो, अने केदो, एक म भरहवा! तु सणका काहा कर्यो? 32 जतयार तीहया हुंड्या मे चड जया ता वाहळु थांग ज्यु। 33 आहयु देखीन हुंड्या मे वाळा माणहु ईसू नी भक्ती करीन केदा, तु हाचलीन भगवान नो बेदो से। 34 अळतेण तीहया दरया पार हेली धेडे गनुतेसरत हेर मे पुरया। 35 तां वाळा माणहु ईसू ने ओळखी लेदा, अने आडे-धेडे ना आखा गाम मे आनी खबर फेलाय देदा। तीहया आखा मांदला ने ईसूनां ली आया। 36 अने तीनी पांहा वीनूती करया के तु आमने तारा लुगडा नो सेडो एतरोत छीमवा दे। अने जेतारा तीने छीमया, तीहया आखान-आखा आरगा हय जया।

**15** यस्सलेम ना थोडाक फरीसी पंथवाळा अने कायदा हीकाडनया ईसूनां आवीन केदा, 2 तारा चेला डायला पुडारया नी रीती-भाती काहा नी पाळता? हीयया हाथ धोया वगर रोदला काहा खाय? 3 ईसू तीमने केदो, तमु आहफाम नीत रीती-भाती पाळवा करीन भगवान नो हुकम काहा तोडो? 4 भगवान केदलो हतो, “तमु आहफा ना आयह-बाहा नी ईजजत करजो अने जे कोय आहफा ना बाह ने नीता आयह ने गलत बोल केय, ता तीने मार नाखो।” 5 पण तमु केय, कदीम कोय आहफा ना आयह-बाहा ने केय जेतरो बी तारो फालदो मारी सी हयतो हतो, तीहया आरु भगवान ने भेट अपाय जेलु। 6 ईसू मतलब आहयु नी हय, के आयह-बाहा नी ईजजत नी करवा ज्यो। एमेत तमु तमारा डाह-डाहा नी रीती-भाती नी करते, जे तमु बणावला से; भगवान ना बोलु ने टाठ देवो। 7 ए ढोंगडा

करन्या! यसायो तमारा बारा मे भगवान पतेर गेथी आहयी वात वारलते केलदो से, 8 आहया माणहु मोडे-मोडे मारी ईज्जत करे, पण आमनु मन मारी गेथु घणु सेटु से। 9 आहया अमथात मारी भक्ती करे; काहाके तीमनी हीकापण नीसती माणहु ना हीकाडला नेम से। 10 अने अळतेण ईसु माणहु ने आहफान तां बोलावीन केदो, हमळो अने हमजो। 11 जे मोडा मे जाय, तीहयु माणहु ने नी वीटाळे, पण जे गलत बोलु माणहु मे गेथा नीकळे, तीहयात बोलु तीमने वीटाळ देय। 12 अळतेण चेला आर्वीन ईसु ने केदा, तारी आहयी वात हमळीन फरीसी माणहु ने वारु नी लाग्यु, आहयी वात तने मालम से हु? 13 ईसु चेला ने केदो, जे रोपो मारो हरग वाळो बाह नी चोपयो, तीने उखडीन नाख देहे। 14 हीमने रेवा देवो; हीयया आंदळानेत वाट देखाडे। कदीम एक आंदळो, बीजा आंदळा ने वाट देखाडे ता बेम जाण खाडा मे पड जहे। 15 आहयी वात हमळीन पतरस केदो, आमने दाखला ने हमजाड दे। 16 ईसु केदो, तमने हजु बी नी हमजायतु हु? 17 तमने आहयु नी मालम हय हु? के, जे खाणु मोडा मे हयत भराय, तीहयु पेट मे जत रेय, अने डील मे गेथु बारथु नीकळी जाय? 18 पण जे मोडा मे गेथु नीकळे, तीहयु मन मे गेथु नीकळे, अने आहयत माणहु ने वीटाळ देय। 19 काहाके गलत वीच्यार, हतया, बीजी बयर ने राखवा, छीनाळ, चोरी, झुटी गवाय देवा, वाक काडवा ना आहया आखा वीच्यारु माणहु ना मन मे गेथात नीकळे। 20 आहयात माणहु ने वीटाळ देय। पण हाथ धोया वगर खाणु खावा सी माणेह नी वीटळे। 21 ईसु तां गेथो नीकळीन सुर अने सेदा परगणा भणी चाल पड्यो। 22 तीहया परगणा नी कनानी जाती नी एक बयर आयी अने आडी-आडीन केका बाज जी, “ए मालीक! दावु नी अवलयात! मारी पोर गीण कर। मारी सोरी ने भुत णण-जबर वेला पाड रयो।” 23 पण ईसु तीने कंय नी केदो। अने ईसु ना चेला ईसुनतां आर्वीन वीनती करया, हीनी वात मानीन हीने वळाय दे, काहाके हीययी आडती-आडती अमारी पसळ आय री। 24 पण ईसु केदो, भगवान मने ईसरायली जाती ना माणहन तां एतरोत मोकलो से, जे खोवायला गाडरान तेम से, अने भगवान गेथा सेटा हय जेला से। 25 पण तीर्थी बयर आर्वीन ईसु ना पोगे पडीन तीने केदी, “ए मालीक! मारी मदत कर।” 26 पण ईसु दाखलो कीन तीने जपाप आप्यो, सोरा पांह गेथो रोटलो हापकीन कुतरा अगळ नाखवा वारु नी हय। 27 तीर्थी केदी, होव, मालीक! पण ते बी मालीक नी थाळी मे गेथु टेबल पोर गेथु हेटु पडलु खाणु ते कुतरा खाय लेय। 28 तीनी वात हमळीन ईसु केदो, “ओ बयर! तारो भरहो घणो मोटो से, तारी मरजी पुरी हये।” अने तेतरी घडी तीनी बेटी वारु हय जी। 29 ईसु तां गेथो जत रयो, अने गलील जीला नी दरया धेडे पुरीन एक बडा पोर चडीन बह ज्यो। 30 अने मेळान-मेळा माणहु तीनीनतां आववा बाज जया। तीहया लंगडा, लुल्ला, आंदळा, गुंगा, अने हेतत बीजी मंडवाड मे पडला माणहु ने ईसु ना पोगु अगळ हाते लावीन मेक देदा, अने ईसु तीमने आरगा करतो रयो। 31 अने जतयार माणहु देखया, गुंगा बोले, पांगळा वारु हये, लंगडा चाले, अने आंदळा देखे, आहयु आखु देखीन माणहु चकराय जया, अने तीहया ईसरायली जाती ना भगवान ना गुण गाववा बाज जया। 32 ततयार ईसु आहफा ना चेला ने हाते बोलावीन केदो, मने आहया माणहु पोर गीण आवे। आहया तीन दाडा ना मारी भेळता री रया, अने ईमनी पांह खावा जुगु कंय बी नी हय। मे ईमने भुकला नी वळाववा हीडतो। कदी आहया थाक जहे अने वाटयेत थाकीन पड जहे। 33 चेला तीने केदा, आहयी उजाडी जागा मे आहया माणहु ने खवाडवा करीन एतरा हेरका रोटला कां गेथा लावया? 34 ईसु तीमने पुड्यो, “तमारी पांह केतरा रोटला से?” तीहया केदा, “हात रोटला अने थोडाक झीनला माखला।” 35 अने माणहु ने भोयमे बहाड देवो, करीन ईसु चेला ने हुकम आप्यो। 36 अने तीहयो हात रोटला, अने माखला हात मे लीन रोटला अने माखला जुगु भगवान ने तु घणो वारु से केदो, अने तीहयो माखला अने रोटला भांगी-भांगीन चेला ने आपतो ज्यो, अने चेला माणहु ने आपता जया। 37 आखा खायलीन आफरी जीया अने चेला बचला टुकडा सी हात चार्या भरीन चुरटया। 38 खाणु खावा वाळा मे बयरा-सोरा ने सोडीन च्यार हजार अदमडा हाता। 39 ईसु माणहु ने वळाय देदो, अने तीहयो हुंड्या मे बहीन मगदन परगणा मे पुग्यो।

**16** फरीसी पंथवाळा अने सदुकी पंथवाळा ईसुनतां आया, अने तीने पारखवा करीन तीहया हरग मे गेथी कानी सेलाणी देखाड। 2 पण ईसु केदो, “हाती टेमे तमु केवो, सीजन वारु रेहे, काहाके हरग रातु से। 3 अने हवारे तमु केवो, ‘आज आंजी आवहे काहाके हरग मे रातलु वादळु सवायलु से, कदीम तमु हरग नी सेलाणी देखीन आहयु जाण लेवो के हु हयवा वाळु से, ता तमु आहया दाडा मे हय

रेली सेलाणी काहा नी ओळखो? 4 आहयी पीडी ना कुहरया अने छीनाळ्या माणहु एक सेलाणी मांग रया, पण आमने धरमी योना नी सेलाणी वगर कानी बी सेलाणी नी जडे। आहयी वात कीदीन ईसु तीमने सोडीन जत रयो।” 5 दरया नी हेली धेडे जवा नी टेमे चेला रोटलो लेवा भूल जेला हाता। 6 पण ईसु तीमने हुकम आपीन केदो, चेतनी रेवो! अने फरीसी माणहु अने सदुकी माणहु ना खमीर सी बचीन रेवो। 7 ता तीहया-तीहयात केवा बाज जया, आपणु रोटला नी लाया, एतरे आहयो ईसम केय। 8 ईसु तीमना वीच्यार जाणीन तीमने केदो, “ए कम भरहया! तमु आहयु काहा वीच्यार कर रया, के ‘आपणु रोटला नी लाया, एतरे आहयो आसम केय?’” 9 तमु हजु लग नी हमजया हु? मे तीहया पांच हजार माणहु ने पांच रोटला हेरका करीन आफरीन खवाड्यो तीहयु तमने मालम नी हय हु? अने तीर्थी टेमे तमु केतरा चारया टुकडा चूटीन भरवा? 10 मे तीहया च्यार हजार माणहु ने हात रोटला वदाडीन, आफरीन खवाड्यो, ता तमु तीर्थी टेमे केतरा चारया टुकडा चूटीन भरला? 11 तमु काहा नी हमजता के मे तमने रोटला ना बारा मे आहयु नी केदो, पण मे ते फरीसी माणहु अने सदुकी माणहु ना खमीर गेथा चेतनी रेवो करीन केदलो? 12 ता चेला हमजी जया के ईसु रोटला ना खमीर गेथा नी, बाखीन फरीसी माणहु ना अने सदुकी नी हीकापण गेथा चेतनी रेवा करीन हुकम आपीन केदलो हातो। 13 ईसु केसरया फलीपुस हेर मे आहफा ना चेला ने पुख्यो, माणहु मनखया ना सोरा ने हु केय? 14 तीहया केदा, “थोडाक माणहु केय, ‘बपतीसमा आपण्यो युहनो से, थोडाक माणहु केय एलीया से, अने थोडाक माणहु केय, यीम्या से नीता ता भगवान वगे गेथो केवा वाळा काना माणहु मायन कानो एक से।” 15 आहयु हमळीन ईसु केदो, पण तमारा वीच्यार सी मे कोय से? केवो? 16 सीमोन पतरस केदो, तु मसी से, तु जीवतो रेणया भगवान नो सोरो से। 17 ता ईसु सीमोन ने केदो, ए सीमोन, योना ना सोरा! तु जुगाळो से, काहाके आहयी वात डील अने लोय मे रेणयो कानो माणेह नी, बाखीन मारो हरग वाळो बाह तारी पोर उजन्ती करलो से। 18 एतरे मे बी तने केम, “तु पतरस से, अने मे अहया दगडा पोर मारी मंडळी बणावही अने पताळ नो झापला ने आनी अगळ टेकाये नी।” (Hades g86) 19 मे तने हरग राज ना कुचया आपही। अने तु धरती पोर जे कंय बांदही, तीहयु हरग मे बी बंदाय जहे; अने जे कंय धरती पोर उगाडहे तीहयु हरग मे बी उगाडी जहे। 20 ततयार ईसु आहफा ना चेला ने हुकम आप्यो के तमु कोयने बी नी केजो के हीययो मसी से। 21 तीर्थी टेमे गेथो ईसु आहफा ना चेला ने आहयु हमजाडवा बाज जयो के मने यस्सलेम जवा नु से; तां डायला पुडारी, अने भगवान ना डायला पुंजारा, अने युहदी धरम हीकाडनया मने वेला पाडहे अने मने मार नाखहे। पण मे तीसरा दाडे पासो जीवतो हय जही। 22 पतरस ईसु ने आंण्ये ली ज्यो अने तीने आहयु कीन वड्यो, ए मालीक! तारी हाते भगवान आसम नी करे तारी पोर आसम कदी नी हये। 23 पण ईसु पासो वळीन पतरस ने केदो, ए भुतडा! मारीनतां गेथो सेटो जत रे! तु मारी वाटये अडचन बण रयो। काहाके तु भगवान नी वात पोर नी, पण माणहु नी वात पोर मन लगाडे, 24 अळतेण ईसु आहफा ना चेला ने केदो, जे कोय मारी पसळ आववा हीडे, तीहयो आहफा ने वीहरी जवा जोवे, अने आहफा नु कुम्स उचलीन मारी पसळ आवे। 25 काहाके जे आहफा ने बचाडहे तीहयो आहफा ने खोय देहे अने जे कोय मारी जुगु, आहफा नो जीव खोय देहे, तीहयो तीने बचाडहे। 26 कदीम माणेह आखी कळजुग ने हात कर लेय अने आहफा नो जीव खोय देय तीहयु हु काम नु? तीहयो आहफा नो जीव बचाडवा करीन आहफा ना जीव नी अवजी पोर हु आपुहे? 27 काहाके मनख्यान बेटो आहफा ना हरवातु नी हाते आहफा ना बाह नी बडाय भेळ आवहे, अने तीहयो आखा माणहु ने तीमना काम ना अनसारे फोळ आपहे। 28 मे तने हाचलीन केम, आजे हारीक थोडाक आसवा माणहु बी हजुर से। जे ततयार लग नी मरे जतयार लग मनख्यान बेटा ने तीना राज मे आवतलो नी देख लेय।

**17** छोव दाडा हय जया अने अळतेण ईसु, पतरस, याकुब अने तीना भाय युहनना ने तीनी हाते हुनकार जागा मे उचला बडा पोर ली ज्यो। 2 अने तां तीमनी अगळेत ईसु नो सीको बदली ज्यो। अने तीनु मोडु दाडुन तेम पपलवा बाज ज्यु, अने तीना लुगडा वीजाळान तेम उजळा हय जया। 3 तीर्थीत टेमे ईसु ना चेला ने मुसो अने एलीया तीनी हाते वात करतला देखाव पड्या। 4 ता पतरस ईसु ने केदो, मालीक! आंया रेवा आपणी जुगु वारु से! तारी मरजी हय ता मे आजे

तीन तमबु बणाय देम, एक तारी ज़गु एक मुसा ज़गु अने एक एलीया ज़गु। 5 तीहयो केबाज बाज रयो हतो तीहयीत टेमे पततलु वादळु आवीन तीमने वाक लेदु अने हरग मे गेथी आसम अवाज आवी, आहयत मारो मोंगाळळो सोरो से। मे आनी पोर घणो खस से, आनीत वात हमळो! 6 आहयी वात हमळीन चेला मोडा ना भरहे पड ज्या, अने जबर बीही ज्या। 7 ता ईसु तीमनी हाते आवीन तीमने छीम्यो अने केदो, “उठो, बीहो ना।” 8 जतयार तीहया उचु भाळ्या, ता ईसु ने सोडीन तीमने कोय नी देखाव पड्यु। 9 अने जतयार ईसु बडे गेथो उतरवा बाज रयो हतो, ता तीमने हुकम आपीन आहयु केदो, जतयार लग मनखया नो सोरो मरया-हरया मे गेथो जीवतो नी हये, ततयार लग जे कंय तमु आजे देखला से, तीहयु कोयने नी केजो। 10 एतरे तीना चेला ईसु ने पुळ्या, चोखली सासतर ह्रीकाडन्या आहयु काय के पेले एलीया नो आववु उक्यालु से? 11 ता ईसु केदो, एलीया हालीन आखु कंय हद्वार करवा आबवो। 12 पण मे तमने की देम, के एलीया आय लागलो से। पण माणहु तीनी हाते जेम गम्यु तेवो वेववार करया। तेमेत मनखया नो सोरो बी तीमना हाते दुख झेलहे। 13 ता चेला आहयु हमजया के ईसु तीमने बपतीसमा आपणया युहनना ना बारा मे केदो। 14 अने जतयार ईसु माणहु ना मेळान तां पुरायो, ता एक माणेह ईसुनतां आयो, अने ईसु अगळ मांडा टेकीन केदो, 15 “मालीक! मारा सोरो पोर गीण कर। हीने फेपर आया करे। हीययो घण-जबर वेला करया करे; अने वळ-वळीन आकतु मे अने पाणी मे पड जाय। 16 मे हीने तारा चेलानतां लावलो, पण तीहया हीने आरगु नी कर सक्या।” 17 ईसु केदो, वण-भरभड्या अने पीनेळळी पीडी ना माणहु! कासु लग तमारी हाते रेही अने मे तमने कां लग वेठतो रेम? हीयया सोरा ने मारिन्तां ली आबो। 18 ईसु ते भुत ने वड्यो, अने तीहयो भुत तीना सोरा मे गेथो नकळी ज्यो। अने तीहयु सोरु तेरी घडी आरगु हय ज्यु। 19 अळतेण चेला एखलात ईसुनतां आवीन पुळ्या, अमारी सी भुत काहा नी नीकळ्यो? 20 ईसु तीमने केदो, तमारी पांह भरहो कमतो से; एतरे तमारी सी भुत नी नीकळ्यो। मे तमने हाचलीन केम, कदी तमारो भरहो राय ना दाणा बराबर बी हतो, ता तमु आहया बडा ने बी केता के आजे गेथो हरकीन सेटो हय जा, ता आहयो बडो बी हरकीन सेटो हय जतो; अने तमारी जगु कंय बी नी हय सके ईसम नी रेतु 21 पण आवा भुत वीनती अने उपाह करया वगार नी नीकळो। 22 जतयार तीहया भेळा हयन गलील जीला मे आया, ता ईसु आहफा ना चेला ने केदो, मनखयान बेटो माणहु ना हात मे धोका नी धरायवा वाळो से। 23 तीहयो तीने मार नाखहे, पण तीहयो तीसरा दाडे जीवतो हय जहे। आहयु हमळीन चेला घणा दुखी हय ज्या। 24 जतयार तीहया कफनरुहम हेर मे आया, ता मंदीर नो फाळो लेवा वाळा पतरस ने तां आवीन पुळ्या, “हू तमारो मासतर मंदीर नो फाळो नी आपे?” 25 पतरस केदो, “होव, आपतलो।” जतयार पतरस घोर आयो, ता ईसु तीने पुछते-पुछते पेलेते तीने केदो, “ए सीमोन! तु हू हमजे? आहयी कळी ना राजा कोय पांह फाळो अने करजो लेय? आहफा ना सोरा पांह के बीजा पांह?” 26 पतरस केदो, पारका माणहु पांह, ततयार ईसु तीने केदो, ता ते बेटा ने फाळो आपवा नी पडे। 27 पण ते बी आपणु हीयया माणहु ने टोकर नी खवाड्या, एतरे तु दरया धेडे जायन गळी नाख, अने जे माछली गळी ना काटा मे पेले वळगहे तीने धर लेजे, अने तीनु मोडु उगाडजे, ता तीनी मे तने एक सीकको जडहे। अने तीहया सीकका ने लावीन मारी जगु अने तमारी जगु फाळो भर देजे।

**18** तीहयी टेमे चेला ईसुनतां आवीन पुळ्या, हरग राज मे आखा सी मोटु कोय से? 2 ईसु एक नान्लु सोरु ने बोलायो अने तीने तीमनी वच मे उबो करयो, 3 अने केदो, मे तमने हाचलीन केम, कदी तमु नी फीरो अने सोरान तेम नी बणो, तां तक हरग राज मे नी भराय सके। 4 एतरे जे कोय बी आहफा ने आहयु नान्लु सोरुन तेम नीचळो बणावहे, तीहयो हरग राज मे आखा करते मोटो रेहे। 5 अने जे कोय बी मारा नामे आवु नान्लु सोरु नो आव-भाव करे तीहयो मारोत आव-भाव करे। 6 जे कोय मारी पोर भरहो करवा वाळा आहया नान्ला मेना एक जगु बी पाप नो जपाप बणे, तीनी जगु आहयुत वार से के तीना गळा मे घट्टी नो मोटलो पोड बांदीन दरया मे नाख देवा जोवे। 7 आहयी कळी ना माणहु जगु घणी दुख नी वात से, जे भगवान ना माणहु ने पाप मे पाडवा नो जपाप बणे। पाप मे पडवा नी पारख ते आया करहे, पण तीहया माणेह जगु बी घणी दुख नी वात से, जे बीजा जगु पाप नो जपाप बणे। 8 कदीम तमारो हात नीता तमारो पोग तमारी जगु पाप नो जपाप बणे! ता तीने तोडीन नाख देवो। वारु आहयुत से के तमु लुल्ला नीता लंगडा

हयन बी अमरकाय अने जलमकी जीवाय हात कर लेवो, नीता कंखर मायन आसम नी हय जाय के बेम हात अने बेम पोप रीन बी, तमु नी ओलायवा वाळी आकूठी मे नखाय जावो। (aiōnios g166) 9 अने कदीम तमारो डोळो तमारी जगु पाप नो टोकर बणे, ता तीने काडीन नाख देवो। वारु ते आहयुत से के तमु काणया हयन बी, अमरकाय जीवाय हात कर लेवो, नीता कंखर मायन आसम नी हय जाय के तमारा बेम डोळा हयन बी, तमु नरक-आकूठी मे नखाय जावो। (Geenna g1067) 10 चेतीन रेवो! जे मारी पोर भरहो करे, तीमनी मे जे नान्ला से, तीमने बी तमु हेता नी हमजजो। काहाके मे तमने देखाडु के हरग मे आमना हरगदुत आमनी जगु मारा बाह नी अगळ वीनती करवा नी लेदे हमेसा हजुर रेय। 11 मनखया नो सोरो खोवाय जेला से, तीमने होदवा करीन आवलो से। 12 तमरो हू वीचयार से? मान लेवो कदीम कोयना एक होव गाडरा हय, अने तीमनी मेतु एक खोवाय जाय, ता तीहयो एक कम होव गाडरा ने बडी पोर रेवा दीन, तीहयु खोवायलु गाडरु ने होदवा नी जाय हू? 13 अने कदीम तीहयु जड जाय ता मे हाचलीन केम, के तीहयो तीहया एक कम होव गाडरान करते एतरो खस नी हये, जेतरो खस आहया जडलु गाडरुन करता हयहे। 14 आसमेत तमारा हरग वाळा बाह नी आहयी मरजी से के तीनी पोर भरहो करे तीमनी नान्ला मे गेथो एक बी भगवान गेथो सेटो हयवा नी जोवे। 15 कदीम तारो भाय तारा वीरोद मे पाप करे, ता तीने एखलो ली जायन ईसम पाप नी करवा जोवे, करीन हमजाड देवो, अने कदीम तीहयो तमारी वात मानीन भगवान वगे वळ जाय, ता तमु तमारा भाय ने बचाड लेदा केवाये। 16 कदीम तीहयो तमारी वात नी माने, ता अळी एक नीते मे जणा ने हाते ली जावो, काहाके बे नीता तीन गवा नी लारे तीहयी आखी वात पुरी हय जाय। 17 कदीम तीहयो तीमनी बी नी हमळे, ता मंडळी ने की देवो, अने कदीम तीहयो मंडळी नी बी नी हमळे, ता तीने आडजात्या नी अने फाळो लेवा वाळान तेम हमजो। 18 मे तमने हाचलीन केम, तमु जे धरती पोर बांदहु तीहयी हरग मे बी बंदायहे, अने जे करु धरती पोर छोडहु तीहयु हरग मे बी छुट्टे। 19 अळी मे तमने हाचलीन केम, कदीम धरती पोर तमारी मे बे जणा एक-मनया हयन कंय बी मांगहे, ता तीहयु तीमने मारा हरग वाळा बाह वगे गेथु जडहे, 20 काहाके जां बी बे जणा नीता तीन जणा मारा नाम सी भेळा हये, तां हारीक मे तीमनी वच मे हजुर रेम। 21 ता पतरस हाते आवीन ईसु ने केदो, मालीक! कदीम मारो भाय मारा वीरोद मे गुनो करतोत जाय, ता तीने मे केतरी कावा मार्फी आपु? हात कावा लग मार्फी आपु हू? 22 ईसु तीने केदो, “मे तने आहयु नी केतो, के हात काव पण हात कावा ना सतुतर गुणा तक।” 23 एतरे हरगे नु राज तीहया राजा हरकु से, जे आहफा ना पावरया नो लेखो लेवा हीडयो। 24 जतयार तीहयो लेखो लेवा बाज ज्यो, ता एक जणा ने तीनी अगळ लायो जे करडो स्प्या नो करजा वाळो हतो। 25 जतयार तीनी पांह करजो छुटवा जगु कंय नी हतु, ता तीनो मालीक केदो, “आने अने आनी लाडी अने सोरा ने अने जे कंय आनु से आखु वेच देवो, अने तीहयो करजो छुटे।” 26 आहयु देखीन तीहयो पावरयो पडीन तीने वांद्यो, अने केदो, “ए मालीक, दम धर, मे आखु कंय छुट देही। 27 ततयार तीहया पावरया नो मालीक तीनी पोर गीण करीन तीने सोड देदो, अने तीनो करजो माफ कर देदो।” 28 पण जतयार तीहयो पावरयो बारो नीकळ्यो, ता तीना हाती पावरया मेनो एक तीने भेट्यो, जे तीनी पांह होव दीनार करजो लेदलो हतो; तीहयो तीने धर लेदो अने गळु चमदीन केदो, “जे कंय तु मारी पांह गेथो करजो लेदलो से तीहयो आप दे।” 29 ता तीहयो पावरयो तीना हाती पावरया ना पोग पडीन वीनती करवा बाज ज्यो; दम धर मे आखु भर देही। 30 पण तीहयो पावरयो नी मान्यो, अने तीने ली जायन जेल मे कुंड देदो; के तीहयो जतयार तक करजो नी छुट जाय तांह तक तीहयो तांत रेय। 31 तीना हाते वाळा बीजा पावरया आहयु देखीन घणा नराज हय ज्या अने जायन हू-हू हयु तीहयु आखु तीमना मालीक ने देखाड देदा। 32 ततयार तीनो मालीक तीने बोलावीन केदो, “ए रीत काचर्या, तु जे मारी पांह वीनती करयो, ता मे ते तारो पुरो करजो माफ करयो।” 33 एतरे जेम मे तारी पोर दया करयो, तेमेत हू तने तारा हाते वाळा पावरया पोर दया नी करवा जोवे हू? 34 अने तीनो मालीक खीजवायन तीने डंड आपवा वाळा ना हात मे होप देदो, के जतयार तक तीहयो आखो करजो छुटी नी जाय, तांह तक तीना हात मे रेया। 35 “आहयीत रीते कदीम तमारी मायन आखा आहफा ना भाय ने मन सी माफ नी करे, ता मारो बाह जे हरग मे से, तमारी हाते बी आसमेत करहे।”

**19** आहयी वात कीदनी ईसु गलील जोडला मे गेथो जत रयो, अने यरदन नंदी ना हेरली धेडे युहय्या देस मे पुग्यो। 2 एक घणो मोटो माणहु नो मेळो ईसु पसळ चाल पड्यो, अने ईसु माणहु ने आरगा करयो। 3 फरीसी दलवाळा ईसुनतां आया, अने तीनी पारख करता जायत, आहयी वात पुछ्या, “काना बी कारण सी आहफा नी लाडी ने सोडवा ताले से हु?” 4 ईसु केदो, “तमु चोखली सासतर मे नी भणया हु, भगवान सुरु गेथोत तीमने एक बयर अने एक अदमी करीन बणायो। 5 अने भगवान केदलो, के आहया कारण सी, अदमी आहफा ना आयह-बाहा गेथो अलग हय जहे, अने तीनी लाडी हाते रेहे, अने तीहया बे एक डील हय जहे। 6 एतरे हमणे गेथा तीहया बे नी, पण एक डील से: एतरे जीमने भगवान जोडलो से, तीमने माणहु अलग नी करवा जोवे।” 7 तीहया ईसु ने पुछ्या, “ता मुसो हुका सोडवा नी चीटडी आपीन लाडी ने सोडवा नो मे आपल्यो?” 8 ईसु तीमने केदो, “तमारा मन नी ठटाय जाणीन मुसो तमारी जुगु लाडी सोडवा नो हुकम लीखीन आप्यो। पण सुरु गेथोत ईसम नेम नी हतो। 9 पण मे तमने केम, छीनाळु ने सोडीन काना बीजा बोना सी, जे आहफा नी लाडी ने सोडे, अने कानी बीजी बयर हाते वेवा करे, तीहयो बी छीनाळु करे।” 10 चेला ईसु ने केदा, “कदीम अदमी नो बयर नी हाते मेळ एपेत से, ता वेवा नी करवा वास से।” 11 ईसु तीमने केदो, “आखा आहयु बोल आवरी नी सके। पण भगवान जीने दान आपलो से, तीहया एतरात वेवा करया वगर जीववा नी वात ने हमजी सके। 12 काहाके थोडाक माणहु ईसम से जे आयह नी कोख मे गेथात हीजडा जणायला से, अने थोडाक माणहु ईसम से, जीमने बीजा माणहु हीजडा बणाय देदला से। अने थोडाक माणहु ईसम से जे हरग ना राज नी करता वेवा करे वगर जीववा करीन वात ठाण लेदला से। इमने वेवा करे वगर जीववा नी ताखत जडली से, तीमने सडलो रेवा जोवे।” 13 तीहयी टेमे माणहु आहफा-आहफाम ना सोरा-सोरी ने ईसुनतां आनीन करते लाया के तीहयो तीमनी पोर हात मेलीन वीनूती करे करीन, पण सोरा ने हु करवा लाय रया करीन तीना चेला माणहु ने वड्या। 14 बाखीन ईसु केदो, “सोरा ने मारीनतां आववा देवो, अने हीमने ना रोको, काहाके हरग नु राज हीमनी हारका नु से।” 15 अने तीहयो सोरा पोर हात मेकीन तीमने संयबरकत आप्यो अने तां गेथो जत रयो। 16 एक जणो ईसुनतां आवीन केदो, “ए मासतर! अमरकाय जीवाय हात करवा करीन मे कानु भलु काम करु?” (aiōnios g166) 17 ईसु तीमने केदो, “तु मने भलाय ना बारा मे काहा पुछे? भलो ते एकीत से, जे भलाय करे। कदीम तु जीवाय हात करवा केय ता हुकम मान।” 18 तीहयो ईसु ने पुछ्यो, “काना हुकम पाळु?” ईसु केदो, “हतया नी करजे; छीनाळु नी करजे, चोरी नी करजे, झुटी गवाय नी देजे। 19 ‘आहफा ना आयह-बाहा नी ईजजत करजे’ अने ‘जेम तु आहफा ने मोग करे तेभेत तारा हाते वाळा ने बी मोग करजे।” 20 तीहयो जुवान्यो ईसु ने केदो, “मे आहया आखा हुकम ने पाळलो से। मारी मे अळी कानी वात नी कसर से?” 21 ईसु तीहया जुवान्या ने केदो, “कदीम तने पुरो पक्को बणवा हय ता, जा! तारु आखु धन वेचीन गरीब ने आप दे, अने हरग मे तने मेल्लु धन जडहे। अने अळतेण आवीन मारी पसळ चाल।” 22 आहयु हमळीन तीहयो जुवान्यो घणो होहवायन जत रयो, काहाके तीहयो घणो मालदार हतो। 23 ता ईसु आहफा ना चेला ने केदो, “मे तमने हाचलीन केम, मालदार जुगु हरग राज मे भरायवा काठु से।” 24 मे अळी केम “के होय ना डुचा मे हयन उटडा ने सरकवा नु सरल से, बाखीन मालदार ने भगवान ना राज मे भरायवा घणु काठु से।” 25 आहयु हमळीन चेला घणा वहराय जया अने केदा, “ता कोयने छुटकारो जडहे?” 26 ईसु तीमनी भणी भाळीन केदो, “माणहु जुगु ते आहयु, नी बणे एवु से। पण भगवान जुगु आखु कंय बण जाय।” 27 ता पतरस ईसु ने केदो, “देख, अमु अमारु आखु कंय सोडीन तारा चेला बण जेला से। ता, आमने हु जडहे?” 28 ईसु आहफा ना चेला ने केदो, “मे तमने हाचलीन केम, के नवली की मे जतयार मनख्या नो सोरो पासो आवीन आहफा नी बडाय सी भरायन राजगदी पोर वटडे, ता तमु बी बारे राजगदी पोर बहीन ईसरयात ना बारे कुळी नो नीयाव करहु, काहाके तमु मारी वात मानीन, मारी पसळ चालवा बाज रया।” 29 अने जे मारा नाम ना लेदे आहफा ना घोर ने नीता आहफा ना सरगा भाय ने अने बेनेह ने अने आयह-बाहा ने सोरा-सोरी ने, नीता खेतार वाडी मारा नाम नी करते सोड देदलो से, तीहयो होव गुणा हात करहे, अने तीहयो अमरकाय जीवाय नो हकदारयो हय जहे। (aiōnios g166) 30 पण घण डेरका माणहु जे पेला से तीहया पाखला हय जहे, अने जे पाखला से तीहया पेलना हय जहे।

**20** हरग नु राज तीहया घोर ना मालीक हरकु से, जे आहफा नी अंगुर नी वाडी मे दाडक्या लगाडवा करीन हबारे नीकळ्यो। 2 तीहयो दाडक्या हाते एक दाडा नी दाडकी एक चांदी नो सीकको ठेरायो अने तीमने अंगुर नी वाडी मे मोकल्यो। 3 दाडा नी नवेक बजे बरो नीकळ्यो, अने तीहयो हाट मे ढेरत माणहु ने रीकामा उबा हय रेला देखीन, 4 तीमने केदो, “तमु बी मारी अंगुर नी वाडी मे जावो, मे तमने तालेत दाडकी आपही।” 5 अने तीहया बी वाडी मे काम करवा करीन जत रया। अळी माथे दाडे अने मांण्णीक दाडे बी तीहयो एपेत दाडक्या होदवा करीन ज्यो। 6 अने तीहयो दाहडु बुडवा सी एक घंटो पेले अळी तीहयो बरो नीकळीन ज्यो अने अळी तां बीजा ने उबा हय रेला देखीन तीमने केदो, “तमु आजे हारीक आखो दाडो रीकामा काहा उबा हय रया?” 7 तीहया तीने केदा, “आमने कोय नी दाडक्या लगाडया करीन अमु आजे हारीक उबा हय रया।” तीहयो तीमने केदो, “तमु बी मारी अंगुर नी वाडी मे काम करवा जावो।” 8 हांती टेमे अंगुर नी वाडी नो मालीक आहफा ना मूनीम ने केदो, “दाडक्या ने बोलाव” अळतेण पसळ वाळा ने लीन, पेले आववा वाळा तक, आखा ने दाडकी आप दे। 9 जतयार तीहया दाडक्या आया, जे एक घंटो दाडु बुडवा मे री रेलुन लगाडला, ता तीमने एक-एक दीनार आप्यो। 10 जतयार जे पेले दाडक्या आवला ता तीहया हमजी रया हता, के आमने वदु जडहे, बाखीन तीमने बी एक-एक दीनार आप्या। 11 जतयार तीहया ली लेदा, ता लीन तीहया आहयु केता जायत मालीक नी वीरोद करवा बाज जया। 12 तीहया केदा, “आहया पाखला दाडक्या एक घंटो काम कर्या। ते बी तु अमारी बराबर दाडकी आप्यो, पण अमु आखो दाडो तोप मे काठी मेहनत करी।” 13 तीहयो तीमनी मेना के ने आहयु केदो, “भाय! मे तमारी हाते गलत नीयाव नी करतो, तमु मारी हाते एक दाडो दीनार नी बोली नी करया हु? 14 तारी दाडकी ले अने जत रे, मे आहया पाखला दाडक्या ने बी तारीन तेतरु आपवा हीडु। 15 हु आहयु वारु नी हय के मारा धन ने मारी मरजी सी वापर? तमु मारी भलाय ने देखीन मारी पोर काहा कुहराय रया? 16 आहयीत रीते जे पसळ से, तीहया अगळ हय जहे, अने जे अगळ से, तीहया पसळ हय जहे।” 17 ईसु यस्सलेम नी वाट्ये अगो जवा बाज रयो हतो। ता बारे चेला ने अगळ ली जायत तीहयो चालतो-चालतो तीमने केदो, 18 “देखो, आपणु यस्सलेम जवा बाज रया। मनख्या नो सोरो डायला पुंजारा ना अने चोखली सासतर हीकाडन्या ना हात मे धराय देहे। तीहया तीने मारवा नी सजा हमळवाहे, 19 अने आडजात्या माणहु ना हात मे होप देहे, जीनी सी तीहया माणहु तीनी हाही उडाडहे, अने तीने चापका देहे अने कुस्स पोर चडावहे; बाखीन तीसरा दाडे तीहयो जीवतो हय जहे।” 20 जतयार जबदी ना सोराम नी आयह आहफा ना सोराम नी हाते ईसुनतां आवीन वांदी अने तीनी पांढ कंय मांगवा बाज जी। 21 ईसु तीने हुकम आपीन केदो, “हु जोवे?” तीहयी केदी, “आहया मारा बे सोरा से। तु कीदे, के तारा राज मे एक तारी जमणी धेडे अने एक तारी डखरी धेडे बहे।” 22 ईसु जपाप आप्यो, “तमु नी जाणता के तमु हु मांगवा बाज रया। जे दुख नो पीयालो मे पीवा वाळा से, तीहयो दुख नो पीयालो तमु पी लेहु हु?” तीहया केदा, “होव मालीक।” 23 एतरा मे ईसु तीमने केदो, “हाचलीन तमु तीहयो दुख नो पीयालो ते पी लेहु, पण तमने मारी जमणी धेडे, नीता डखरी धेडे बहाडवा नो हक मारी पांढ नी हय, मारी जमणी धेडे अने डखरी होड नो जागो, तीहया माणहु जुगु से, जीमनी वाटु मार बाह तीयार करलो से।” 24 जतयार दह चेला आहयी वात हमळ्या, ता तीहया बेम भाय पोर रीहयाय जया। 25 ईसु आहफा ना चेला ने हाते बोलावीन केदो, “तमु जाणो के आखा देस ना माणहु पोर राज करन्या मुख्या, आहफा ना असामी पोर राज करे, अने तीहया हक राखवा वाळा पोर अळी बीजा मोटला माणहु हक जमाडे। 26 पण तमारी मे आवा हक नो कायदो नी रेवा जोवे। जे तमारी मे मोटो बणवा हीडे तीहयो तमरो पावर्यो बणवा जोवे। 27 अने तमारी मे डायलो बणवा हीडे, तीहयो तमरो पावर्यो बणवा जोवे। 28 काहाके मनख्या नो सोरो बी आहफा नी चाकरी कराववा करीन नी, बाखीन चाकरी करवा करीन अने ढेरत जणा ने सोडाववा करीन आहफा नो जीव आपवा आवलो से।” 29 जतयार तीहया यरीहो हेर गेथा जवा बाज रया हता, ता एक मोटलो माणहु नो मेळो ईसु पसळ-पसळ चाल पड्यो। 30 अने तां हारीक रोहा धेडे बे आंदळा बह रया हता। जतयार तीहया आहयु हमळ्या के ईसु तीमनी अगळ मायन जवा बाज रयो, ता तीहया आडी-आडीन केवा बाज जया, “ए मालीक! दावदु नी अवलयात! अमारी पोर गीण कर।” 31 माणहु तीहया आंदळा ने होगा री जावो करीन वड्या,

पण तीहया अळी बी ज्योरेत आडीन केदा, “मालीक! दावूद नी अवल्यात! आमारी पोर गीण करा।” 32 ईसू उबो रीन तीमने बोलायो अने केदो, “तमने हू जोवे? मे तमारी जुगु हू करु?” 33 तीहया केदा, “ए मालीक! आहयू के आमू देखवा बाज जीया।” 34 ईसू गीण करीन तीमना डोळा छीम्यो, अने तेतरी घडी तीहया देखवा बाज ज्या, अने तीहया ईसू पसळ चाल पड्या।

**21** जतयार ईसू अने तीना चेला यस्सलेम नी हाते पुग्या अने जेतुन बडा पोर वाळा बेतफनो गाम आय लाग्या, ता ईसू बे चेला ने आहयू कीन मोकल्यो, 2 “तमू अगळ ना गाम मे जावो। तां पुगतेत तमने एक गदडी बांदली अने तीनी हाते पाठडू गदडू बी देखाव पडहे। तीने सोडीन मारिन्तां ली आवो। 3 कदीम कोय तमने कंय केय, ता तीने तमू आहयू की देजो, “मालीक ने आहया जोय रया।” अने तीहयो आमने छोटोत पासो ली मोकल्ले।” 4 आहयू आनीन करते ईसम हयू के भगवान भणी गेथो केणया नू आहयू केवा नू पुरु हय जाय: 5 “सीयोन हेर मे रेवा वाळा माणहू ने केवो, देख, तारो राजा तारिन्तां आव्वा बाज रयो; तीहयो नीचळो से, तीहयो गदडू पोर बह रयो; हाव, गदडू नू बचचू पोर बह रयो।” 6 चेला जायत जेम ईसू तीमने केदो तेम ने तेम कर्या। 7 गदडू ने अने तीनु बचचू ने ली आया, अने तीहया तीहयू गदडू ने आहफा ना लुगडा ओडाड देदो, अने ईसू तीनी पोर बहीन ज्यो। 8 अने घणा ढेरका माणहू ईसू नो आव-भाव करवा करीन आहफा ना लुगडा वाट पोर आथरी देदा। अने थोडाक माणहू झाड ना डाव्या वाडीन वाट पोर आथरी देदा। 9 ईसू नी अगळ-अगळ जता जीन अने पसळ-पसळ आवता जीन माणहू ईसम की रया हाता, “दावूद नी अवल्यात ने होसनना! बरकत वाळो से तीहयो, जे भगवान मालीक ना नाम सी आवे। आखा मे उचा हरग मे रेवा वाळा नी होसनना!” 10 जतयार ईसू यस्सलेम मे आयो, ता आखा हेर मे हलड मच जी, अने माणहू केवा बाज ज्या, “आहयो कोय से?” 11 अने माणहू केता हाता, “आहयो गलीली जिला नो नासत हेर वाळो भगवान वगे गेथी वात केणयो माणेहू ईसू से।” 12 ईसू मंदीर मे मोग ज्यो अने तां गेथा आखा वेचवा वाळा अने लेवा वाळा ने बारथा काड देदो। तीहयो पयहा ना अदला-बदली करनया ना टेबलया ने अने पारवा वेचवा ना पाटला ने उथलाय देदो। 13 अने तीमने केदो, “खरली सासतर मे लीखलु से, ‘मासू घोर वीन्ती नू घोर केवायहे, पण तमू ईने चोटटा नू घोर बणाय रया।’” 14 मंदीर मे आंदळा अने लंगडा ईसून्तां आया, अने तीहयो तीमने आरगा करयो। 15 जतयार भगवान ना डायला पुंजारा अने चोखली सासतर हीकाडनया मासतरया ईसू ना भारी जुदा-काम देख्या, अने सोरा ने मंदीर मे आहयू केतला हमळ्या, “दावूद नी अवल्यात ने होसनना!” ता तीहया रीहवाय ज्या। 16 अने तीहया ईसू ने केदा, “आहया हू केवा बाज रया तीहयू तु हमळी र्यो हू?” ईसू तीमने केदो, “होव, हमळी र्यो, पण तमू आहयू कदी नी भणया हू ‘सोरा अने दूत पीता नानल्ला सोरा ना मोडे तु आहफा नू राण गवाडलो से?’” 17 एतर कीडीन ईसू तीमने सोडीन हेर मे गेथू नीकळीन बेतनया जत रयो अने आखी रात तां रयो। 18 बीजा दाडे हवारे वेगोत जतयार ईसू पासो हेर मे आव्वा बाज रेलो ता तीने भुक लागी। 19 तीहयो वाट धेडे गुलर नू झाड देखीन तीनी हाते आयो, तीने तीनी मे पान्टा वगर कंय नी जड्यु, अने तीहयो तीहया गुलर ना झाड ने केदो, “तारी मे अळी कदी फोळ नी लागवा जोवे।” अने तेतरी घडी तीहयू गुलर नू झाड हूक ज्यु। (aiōn g165) आहयू देखीन चेला वहराय ज्या अने केदा, “आहयू गुलर नू झाड ततयास्त कीसम हूकाय ज्यु?” 21 ईसू तीमने केदो, “मे तमने हाचलीन केम केदीम, तमारो भरहो हय अने तमू सणका नी करो, ता मे गुलर ना झाड ने जीसम केदो तेमेत हय ज्यु, तेमेत तमू केहू, ते बी तेमेत हय जहे। पण कदीम तमू आहया बडा ने केहू, अजे गेथो हरकीन दर्या मे पड जा, ता आहयो बडो तमारी वात मान लेहे, अने तेमेत हय जहे। 22 अने तमू जे कंय वीन्ती करीन भरहा सी मांणहू, तीहयू तमने आखू जड जहे।” 23 जतयार ईसू भगवान ना मंदीर मे जीन हीकापण आपलो हतो, ता डायला पुंजारा अने डायला पुडारया ईसून्तां आवीन केदा, “तु काना हक सी आहयू आखू करवा बाज रयो? कोय तने हक आपयो?” 24 ईसू तीमने केदो, “मे बी तमने एक सवाल पुछू, कदीम तमू मने तीनो जपाप आप देदा, ता मे बी तमने की देही के मे काना हक सी आहयू आखू करवा बाज रयो। 25 बपतीसमा आपणया युहन्ना ने बपतीसमा आपवा नो हक कां गेथो जडलो, भगवान वगे गेथो जडलो के माणहू वगे गेथो जडलो?” आहयी वात हमळीन तीहया वीच्यार करया के कदीम आमू केहू के भगवान वगे गेथो हक जडलु से, ता हीययो केहे के तीनी पोर भरहो काहा

नी कर्या? 26 पण कदीम आमू केहू, “माणहू वगे गेथो जडलो से, ता आहया माणहू नो धाक से; काहाके आहया आखा माणहू बपतीसमा आपणया युहन्ना ने भगवान वगे गेथी वात केणयो माणेहू मने।” 27 एतरे तीहया ईसू ने जपाप आप्या, “कय जाणू, आमू ने नी मालम हय?” एतरे ईसू तीमने केदो, “ता मे बी तमने नी केतो के मे काना हक सी आहयू आखू करु।” 28 तमारो हू वीच्यार से? काना अदमी ना बे सोरा हाता। तीहयो पेलतान तां जीन हुकम आपीन केदो, “सोरा जा, आज अंगूर नी वाडी मे काम कर।” 29 पण सोरो जपाप आप्यो, मे नी जाम, पण अळतेण तीना मन मे अंगूर नी वाडी मे जवा नो वीच्यार आय ज्यो अने तीहयो अंगूर नी वाडी मे जत रयो। 30 अळतेण बाह बीजा सोरा नी तां जीन ईसमेत केदो, तीहयो केदो, “होव बाह, मे अंगूर नी वाडी मे जही। पण तीहयो अंगूर नी वाडी मे नी ज्यो। 31 हमणे तमू केवो, आहया बे जाण मायन कोय बाह नी मरजी पुरी करयो?” तीहया ईसू ने केदा, “पेलनो सोरो बेहान नी मरजी पुरी करयो।” एतरा मे ईसू तीमने केदो, मे हाचलीन केम, फाळो लेणया अने रंड्या तमारी गेथा पेले भगवान ना राज मे जहे। 32 बपतीसमा आपणयो युहन्ना तमने धरम नी वाट देखाडवा आयो, अने तमू तीनी पोर भरहो नी कर्या, बाखीन फाळो लेणया अने रंड्या तीनी पोर भरहो कर्या। आहयू देखीन अळतेण बी तमू पाप भणी गेथा वळीन भगवान वगा हयन तीनी वात पोर भरहो नी कर्या। 33 एक बीजो दाखलो हमळो: कानो कीरसाण अंगूर नी वाडी लगाड्यो, तीना च्यारो-मेर वाड बांदयो, अने तीहयी वाडी मे अंगूर नो रोह काडवा करीन एक खाडो खोदीन हळावो बणयो, अने वाडी मे एक पक्को माळो बणायो। अळतेण तीहयो अंगूर नी वाडी ने बीजा कीरसाण ने साजा मे आपीन ढैत नान्मे बीजा देस मे जत रयो। 34 अंगूर नी मेर भेळी करवा नी टेम आयी, ता तीहयो वाटो लेवा करीन कीरसाण ने तां आहफा ना पावरया ने मोकल्यो। 35 बाखीन तीहया कीरसाणया तीहया पावरया ने धरीन काना ने टोक्या; अने काना ने दगडाट्या, अने काना ने मार नाख्या। 36 अळतेण एक कावा अळी तीहयो पेले गेथा ढेरका पावरया ने मोकल्यो अने तीहया कीरसाणया तीमनी हाते तेवोत वेवहार कर्या। 37 आखरी कावा तीहयो आहफा ना बेटा ने आहयू वीच्यारिनी मोकल्यो के तीहया मारा बेटा नी ईज्जत करहेन करहे। 38 पण तीहया कीरसाणया जतयार मालीक कीरसाण ना बेटा ने देख्या ता एक-बीजा ने केदा, “आहयो ते वारिसदार से। आवो, आपणु आने मार नाख्या अने आनी जागा पोर कबजो कर लेता।” 39 तीहया तीने धर लेदा अने अंगूर नी वाडी मे गेथा बारथा नीकाळीन मार नाख्या। 40 अळतेण ईसू तीमने पुख्यो, “जतयार अंगूर नी वाडी नो मालीक पासो आवहे, ता तीहयो ते कीरसाणया नू हू करहे?” 41 तीहया ईसू ने केदा, “तीहयो ते कुहरया ने मारीन खतूतम कर नाखे, अने आहफा नी अंगूर नी वाडी बीजा कीरसाण ने साजा मे आप देहे, जे टेमे-टेमे अंगूर नी मेर नो वाटो आप्या करहे।” 42 ईसू तीमने केदो, “तमू खरला सासतर मे आहयू कदी भणया नी हू: ‘जे दगडा ने राज-मीसतरया रीकामो हमजीन बारथो नीकाळ देदा, तीहयो दगडोत घोर ना पाया ना, खणे वाळो दगडो बण ज्यो? आहयू ते मालीक वगे गेथू हयू, आहयू ते आमारी नीगा मे सेल-भातयु से।’” 43 एतरे मे तमने केम, भगवान, हरग नू राज तमारा हात मे गेथू हापकी लेहे अने राजय ना माणहू ने आप देहे जे भगवान ना राज ना कायदा पाळीन जीवहे। 44 “जे आहया दगडा पोर पड जहे, तीहयो टुकडा-टुकडा हय जहे, अने जीनी पोर आहयू दगडो पडहे, तीने टळ देहे।” 45 डायला पुंजारा अने फरीसी पंथवाळा वाळा आहयो दाखलो हमळीन हमज ज्या के ईसू आहयू तीमनात बारा मे की रयो। 46 करीन तीहया ईसू ने धरवा नी कोसीत ते कर्या बाखीन तीमने माणहू नी बीक हती, काहाके माणहू ईसू ने भगवान वगे गेथो केवा वाळो हमजता हाता।

**22** ईसू अळी तीमने दाखला हमळाववा बाज ज्यो। तीहयो केदो, 2 हरग नू राज तीहया राजा हरकु से, जे आहफा ना सोरा ना वेवा मे पंगत बहाड्यो। 3 राजो आहफा ना पावरया ने नेवत आपला माणहू ने बोलाववा करीन मोकल्यो, बाखीन तीहया आववा नी हीडता हाता। 4 राजो नेवत आपला माणहून तां अळी बीजा पावरया ने आहयू केतो जायत मोकल्यो, “नेवत आपला तीहया माणहू ने की देवो, देखो! मे मारी पंगत नू खाणू तीयार कर देदलो से। मारा बोळदया अने पाळळा जानवसू मराय नाखलो से। अने खाणू तीयार से; वेवा नी पंगता मे आवो।” 5 पण तीहया आहयी वात पोर धीयान नी देदा। कानो आहफा ना खेतर भणी जत रयो, अने कानो आहफा नू वेपार करवा जत रयो। 6 अने काना माणहू तीहया राजा ना पावरया हाते वारू वेवहार नी कर्या अने तीमने मार नाख्या। 7 आहयी

वात हमळीन राजा ने घणी रीह लागी। अने तीहयो आहफा ना सीपायडा। मोकलीन तीहया हतयारा ने मराय नाखयो अने तीमना हेर ने धपाड नाखयो। 8 अळतेण राजो आहफा ना पावरया ने केदो, “वेवा नी पंगात नी तीयारी ते हय जेली से, पण जीमने नेवतु आपलु हतु, तीहया आना लायक नी बणया।” 9 एतरे वाट ना चोवराया पोर जावो, अने जेतारा बी माणहु जड जाय, तीहया आखाम ने वेवा नी पंगात मे बोलाय लावो। 10 अने पावरया रोहा पोर जया, अने भला अने कुहरया आखा माणहु ने बोलावीन ली आया अने वेवा नो घोर तीहया माणहु सी भराय जसु। 11 राजो पोरणा ने देखवा करीन आयो, तां तीनी नीगा एक एस्वा माणेह पोर पड्डी, जे वेवा ना लुगडा नी पेरलो हतो। 12 तीहयो तीने केदो, भाय वेवा ना लुगडा पेरया वगर तु अत्रे केम आय लाकयो? तीहयो माणेह होगो हय रयो। 13 ततयारा राजो आहफा ना पावरया ने हुकम आपीन केदो, आना हात अने पोगु बांदीन अने बारथो अंदारला मे नाख देवो। तां तीहया माणहु रडहे, अने दात ककडावहे। 14 काहाके बोलावला ते ढेरेंत से, पण टाळला थोडाक से। 15 तीहयी टेमे फरीसी पंथवाळा जायन भेळा हयन वीच्यार काड्या के कीसम ईसू ने हीनी वात मे फसाडया। 16 पण तीहयो आहफा ना चेलाम ने हेरोद नी हाते तीनीन्तां आहयो केवा मोकल्यो, “ए मासतर आमू जाणया के तु खरलो से, अने भगवान नी वाट सचचाय सी हीकाडे, अने कोय नी परवाय नी करतलो, काहाके तु माणहु नु मोडु देखीन वात नी करतलो। 17 एतरे आमने देखाड तु हू सोचे? केसर ने फाळो आपवा वारु से के नी हया।” 18 ईसू तीमनी वात जाणीन केदो, “ए ढोंगडा करन्या, मने काहा पारखो? 19 फाळा नो सीकको मने देखाडो।” ता तीहया तीनीन्तां एक सीकको लाया। 20 तीहयो तीने पुछ्यो, “आहयो छाप अने नाम कोय नु से?” 21 तीहया तीने केदा, “केसर नो।” ततयारा तीहयो तीने केदो, “जे केसर नु से, तीहयो केसर ने आपो; अने जे भगवान नु से, तीहयो भगवान ने आपो।” 22 आहयो हमळीन तीहया घबराय जया, अने तीने रेवा दीन जत रया। 23 तीहया दाडे सदुकी पंथवाळा जे केता हता के मरला नु पासु जीणपु हयत नी, तीनी हाते आया अने तीने पुछ्या, 24 “ए मासतर, मुसो केदलो हतो के कदी कोय माणेह वण-अवल्यात मर जाय, ता तीनो भाय तीनी लाडी सी वेवा करीन आहफा ना भाय जुगु सोरा पयदा करे। 25 हाव अमारिन्तां हात भाय हता; पेलो वेवा करीन मर जयो, अने सोरा नी हयवा ना कारण आहफा नी लाडी ने आहफा ना भाय नी करते सोड ज्यो। 26 आहयी रीते बीजो अने तीसरो बी करयो, अने हातोव भाय लग आसमेत हयु। 27 आखान बाद मे आखरी मे तीहयी बयर बी मर जी। 28 एतरे पासु जीवता हयवा पोर तीहयी तीहया हातोव भाय मे गेथी कोयनी लाडी हयहे? काहाके तीहयी आखा नी लाडी बणली हती।” 29 ईसू तीमने जपाप आप्यो, “तमु चोखली सासतर अने भगवान नी सकृती ने नी जाणता; आना कारण सी भुल मे पड रया। 30 काहाके जीवता हयवा पोर वेवा नी हये पण हरग मे आखा हरगदुत ने तेम रहे। 31 पण मरला ने जीवता हयवा ना बारा मे हू तमु आहयो बोल नी भणया जे भगवान तमने केदो: 32 ‘मे अब्राहम नो भगवान, अने ईसाक नो भगवान, अने याकुब नो भगवान से?’ तीहयो मरला नो नी, पण जीवता नो भगवान से।” 33 आहयो हमळीन माणहु तीनी हीकापण सी घबराय जया। 34 जतयारा फरीसी पंथवाळा आहयो हमळ्या के ईसू सदुकी ना मोडा बंद कर देदो, ता तीहया एखटा हया। 35 तीमनी मे गेथु एक कायदा पाळवा वाळो तीने पारखवा नी करते तीने पुछ्यो, 36 “ए मासतर कायदा मे कानो हुकम आखा सी मोटो से?” 37 तीहयो तीने केदो, “तु तारा मालीक ने अने भगवान ने पुरा मन अने आहफा ना पुरा जीव अने आहफा नी आखी अकुकल नी भेळ मोंग कर। 38 आहयो आखा गेथो पेलो अने मोटलो हुकम से। 39 अने तीमनी तेम आहयो बीजो हुकम से के तु आपणा हाते वाळा सी आहफान तेम मोंग राख। 40 आखा कायदा अने भगवान वगे गेथा केणया माणहु ना कीतापया आहयात बे हुकम पोर टेकला से।” 41 जतयारा फरीसी पंथवाळा एखटा हता, ता ईसू तीमने पुछ्यो, 42 “मसी ना बारा मे तमु हू सोचो? तीहयो कोयनो सोरो से?” तीहया तीने केदा, “दावुद नो।” 43 तीहयो तीने पुछ्यो, “ता दावुद आत्मा मे हयन हीने मालीक हुका केय? 44 ‘मालीक, मारा मालीक ने केदो, मारी जमणी होड बह, जतयारा लग मे तारा वेरी ने तारा पोगु तळे नी कर देमा।’ 45 भलु, जतयारा दावुद हीने मालीक केय, ता हीययो हीनो सोरो केम केवायो?” 46 आना जपाप मे कोय बी एक वात नी की सक्यो। तीहया दाडे गेथा कोयने अळतेण तीने कंय पुसवा नी हीममत नी हयी।

23 तीहयी टेमे ईसू माणहु ने अने आहफा ना चेला ने केदो, 2 चोखली सासतर हीकाडन्या, अने फरीसी पंथवाळा मुसा नी गादी पोर हक लीन बह रया, 3 एतरे तीहया तमने जे कंय बी हुकम आपीन केय, तीहयो करता अने मान्ता रेवो; बाखीन तीमनीन तेम काम नी करजो। काहाके हीयया हुकम आपीन केय ते खरा, पण तेम करे नी। 4 तीहया एक भारी बोज ने जीने उचलवा काठु से, हीयया तीने बांदीन माणहु ना खांदा पोर मेल देय, बाखीन आहफा ते आंळी बी नी टेकवा हींडे। 5 हीयया आखा कामु माणहु ने देखाडवा करीन करे। हीयया देखाडवा करीन आहफाम ना सासतर ना तावीज चवडा करीन बांदे अने आहफाम ना लुगडा ना घुमचा नामबा कर देय। 6 हीमने पंगात मे पेल्लो जागो अने भगवान ना भक्ती ना घोर नो पेल्लो जागो गेयो। 7 हाट मे वारु से के अने माणहु अगळ गुरु केवाडवा हीमने वारु मगो। 8 “तमु ‘गुरु’ केवायवा करीन ना हकारो, काहाके तमारो एकती गुरु से, अने तमु आखान-आखा भाय से।” 9 धरती पोर वाळा ने कोयने “बाह” नी केजो, काहाके तमारो एकती बाह से जे हरग मे से। 10 तमु “मालीक” बी नी केवाडजो, काहाके तमारो एकती मालीक से जे मसी से। 11 जे तमारी मे आखान मोटो से, तीहयो आखा नो पावरयो बणो। 12 जे आहफा ने मोटो मानहे, तीने भगवान नानो कर देहे, अने जे आहफा ने नानो मानहे तीने भगवान मोटो कर देहे। 13 ए ढोंगडा करन्या चोखली सासतर हीकाडन्या अने फरीसी पंथवाळा! तमारी जुगु घणी दुख नी वात से! काहाके तमु ते माणहु ने हरग राज मे भरायवा सी रोके रया। तमु आहफा बी हरग राज मे नी भरायो, अने बीजा ने बी हरग राज मे नी भरायवा देवो। 14 ए ढोंगडा करन्या चोखली सासतर हीकाडन्या अने फरीसी पंथवाळा! तमु रंडायला बयरा ना घोर मे भरायत तीमने धोको दीन उग लेय, अने तीमना घोर ने उजाड देय, अने बीजा ने देखाडवा करीन नाम्बी-नाम्बी घणी वार लग वीन्ती करे। एतरे तमने नीयाव नो डंड भगवान वगे गेथो जादात जडहे। 15 ए ढोंगडा करन्या चोखली सासतर हीकाडन्या अने फरीसी पंथवाळा! तमारी जुगु घणी दुख नी वात से! काहाके तमु एक जणा ने तमारा पंथ मे लाववा करीन दरया पार करीन धरती ना बीजा खणे जावो। अने जतयारा तमारा पंथ मे आर्वीन चेलो बण जाय, ता तीने आहफा गेथो बी बे गुणा जादा गुनाळ्ळो बणाय देय, के तीहयो नरक-आकृती मे जाय। (Geenna g1067) 16 ए आंदळा अगळवाण्या! तमारी जुगु घणी दुख नी वात से! काहाके तमु केवो, “कदीम कोय भगवान ना मंदीर नी हाम खाय, ता तीनी कंय नी खरी हय, पण कदीम कोय मंदीर ना होना नी हाम खाय, ता तीनी वात खरली उतरी जाय।” 17 ए वण-अकलया आंदळा! कोय मोटु से? होनु मोटु के तीहयो भगवान नो मंदीर मोटो से? जीनी सी होनु चोखलु हय जाय? 18 तमु आहयो बी केवो, “कदीम कोय वेदी नी हाम खाय, ता तीनी कंय नी खरी हय, पण कदीम तीहयो वेदी पोर मेल्ली भेट नी हाम खाय, ता तीनी खरी उतरी जाय।” 19 ए आंदळा! कोय मोटु से? भेट मोटी से के तीहयी वेदी मोटी से? जीनी सी भेट चोखी हय जाय? 20 एतरे खास वात आहयी से के, जे वेदी नी हाम खाय, तीहयो ते वेदी पोर मेकायलु चीज नी बी हाम खाय केवाये। 21 अने जे भगवान ना मंदीर नी हाम खाय, तीहयी ते भगवान नी बी हाम खाय केवाये, जे आहफा ना मंदीर मे रेये। 22 अने जे हरग नी हाम खाय, तीहयो भगवान नी राजगादी नी अने तीहयी राजगादी पोर बहणया नी बी हाम खाय केवाये। 23 ए ढोंगडा करन्या चोखली सासतर हीकाडन्या अने फरीसी पंथवाळा! तमारी जुगु घणी दुख नी वात से! काहाके तमु पुदीना नो, सोप नो अने जीरु नो दसवो वाटो ते भगवान ने आपो, बाखीन मुसा नी लारे लीखली सासतर नी खास वात ने सोड देदा; होव, नीयाव, दया, अने भरहा नी खास वात ने टाळ देदा। तमु दसवो वाटो ते आप्या करजो, पण नीयाव नी, गीण नी, अने भरहा नी खास वात ने बी पाळयात करवा जेवे। 24 ए आंदळा अगळवाण्या! तमु मीचरया ने ते झारो, बाखीन उटडा ते ते गळ जावो। 25 ढोंगडा करन्या चोखली सासतर हीकाडन्या अने फरीसी पंथवाळा! तमारी जुगु घणी दुख नी वात से! काहाके तमु वाटका ने अने थाळ्या ने उपर-उपर ते वारु उजाळे, बाखीन मोय गेथा नी उजाळे, तेमेत तमारा मन हाय अने आहफात नु भुल करवा ना वीच्यार सी भरायलु से। 26 ए आंदळा फरीसी पंथवाळा! पेल्ले वाटका ने मोय गेथा उजाळ लेवो, ता उपर बी उजळी जहे। 27 ढोंगडा करन्या चोखली सासतर हीकाडन्या अने फरीसी पंथवाळा! तमारी जुगु घणी दुख नी वात से! काहाके जेम तमु ते मडाटया हरका से जे उपर-उपर चुना वेर पोताय करलु रेय, अने घटाळु देखाये, पण मोय मरला माणहु ना हाटका अने हडलु माह भरायलु रेय। 28 ईसम तमु बी उपर गेथा

माण्हू ने धरमी देखाव पडो, बाखीन तमारा मन मे दगो अने कुहराय भरायली से। 29 ए ढोंगडा करन्या चोखली सास्तर हीकाडन्या अने फरीसी पंथवाळा! तमारी जुग घणी दुख नी वात से! काहाके तम् भगवान वगे गेथा केणया माण्हू ना मडाटया हजाडे, अने धरमी माण्हू ना गाता बणावे। 30 अने केवो, “कदीम आमू अमारा आडा-बुडा नी टेमे जीवतला हाता, ता आमू भगवान वगे गेथा केणया माण्हू नु खून नी करवा करीन अमारा डाह-डाहा ने सात नी देता।” 31 ईसम कीन तमु आहफाम नीत वीरोद मे आहयी गवा दी रया के “आमू तीहया माण्हू नी अवल्यात से, जे भगवान वगे गेथा केणया माण्हू नु खून करला हाता।” 32 एतरे तमु तमारा आडा-बुडा ना पाप नी कसर पुरी कर लेवो। 33 ए गडहा अने जेहर वाळा गडहा ना बच्चा! तमु नरक कुंड ना डंड सी कीकम बचह? (Geenna 10:67) 34 देखो! मे तमारीनांत भगवान वगे गेथा केणया माणेह ने, अककल वाळो ने, अने मास्तरयाम ने मोकल। तमु तीमनी मे गेथा थोडाक ने मार नाखह अने थोडाक ने कुस्स पोर चडावह, अने थोडाक ने भगवान ना भक्ती ना घोर मे हडकाटह अने तीमने एक हेर गेथा बीजा हेर वेला पाडता फीरह। 35 करीन धरती पोर जेतारा बी धरमी माण्हू नु खून हय, तीहयू खून तमारा माथे पडहे। धरमी हाबील नु खून गेथू लीन बीरीकया ना बेटा जकर्याहा ना खून लाग, जीने तमु भगवान ना मंदीर अने वेदी नी वच मे मार नाखला हाता। 36 मे तमने हाचलीन केम, आहयू आखू आहयी पीडी ना माथे पडहे अने आमनेत डंड भगतवा पडहे। 37 ए यस्सलेम! ए यस्सलेम! तु भगवान वगे गेथा केणया माण्हू ने मार नाखे अने जे माण्हू ने भाव्यान तारीनतां मोकले तीमने बी दगडाटीन मार नाखे। जेम कुकडी आहफी ना पीच्यात ने आहफी ना पाखडा तळे भेळा कर लेय, तेमेत मे ढेरेंत कावा तारी अवल्यात ने मारा पाखडा तळे भेळा करवा हीडतो हातो, पण तमु मारो नकारो कर देदा। 38 देखो, भगवान तमारा यस्सलेम ना मंदीर ने सोड देहे, अने तीहयो ठारलो हय जहे। 39 मे तने केम, हण्णे गेथा तमु मने जतयार लग नी देखो, जतयार लग तमु आहयू नी केय, “जुगाळो से तीहयो, जे मालीक भगवान ना नाम सी आवे।”

**24** ईसू मंदीर सी नीकळीन जवा बाज र्यो हातो ता तीना चेला मंदीर नी बणावट ने देखाडवा करीन तीनी हाते आया। 2 पण ईसू तीमने केदो, तमु आने हुदा उबा हय रेला देख र्या? पण मे तमने हाचलीन केम, आजे हारीक आहया मंदीर ना दादा पोर दगडो बी नी रेया। आहयू आखू ओदार नाखे। 3 जतयार ईसू जेतुन बडा पोर पुर्गिन बह ज्यो, ता चेला एक घेडे ईसू हाते आवीन केदा, आमने देखाड, आहयू आखू कतयार हयहे? अने तारी आववा नी अने कळजुग खततम हयवा नी सेलाणी हू रेहे? (aiōn 1:65) 4 ईसू तीमने जपाप आययो, चेतनी रेया। कोय तमने धोको नी दीया। 5 काहाके घणा माण्हू मार नाम लीन आवहे अने केहे, “मेस ती से, अने तीहया घणा ढेरका माण्हू ने भटकाड देहे।” 6 तमु लडाय अने झगडा नो हुकवाडो हमळह। आहयी वात हमळीन तमु घवरायजो नी, काहाके ईसम ते हयहेन-हयहे। पण तीहयी टेमे खततम नी हये। 7 आखी जाती ना माण्हू आंबा-सांबा झगडो करवा करीन हुहडीन जहे। एक राज्य ना माण्हू बीजा राज्य ना माण्हू भणी झुमायवा जहे। जां तां काळ पडहे। अने जां तां भुकम्प हयहे। 8 आहयू आखू आववा वाळी गरा नी सुस्वात से। 9 मारा नाम नी करते आखी जाती ना माण्हू तमारी सी हीगी करहे, अने तीहयी टेमे माण्हू तमने वेला पडाववा करीन धरावहे अने तीहया तमने मार नाखे। 10 तीहयी टेमे घणा ढेरका माण्हू मार पोर गेथो भरहो सोड देहे। अने तीहया एक-बीजा ने धरावहे, अने एक-बीजा सी हीगी करहे। 11 अने ढेरेंत झुटा भगवान वगे गेथा केणया माण्हू आय लागहे। अने घणा ढेरका माण्हू ने भगवान ना भरहा गेथा सेटा कर देहे। 12 पाप करन्या वदवा सी घणा ढेरका माण्हू नो मोंग टाडो पड जहे। 13 बाखीन जे आखरी लग दम धरहे, तिनत छुटकारो जडहे। 14 आहयी कळी ना आखी जाती ना माण्हू ने खुस-खबर नी गवा राखवा करीन तीमनी मे भगवान ना राज नी आहयी खुस-खबर नु परच्यार हयहे, अने अळतेण कळजुग खततम हयवा नी टेम आय लागहे 15 एतरे जतयार तमु खततम करवा वाळी चीज ने मंदीर ना चोखला जागा मे उबी हय रेली देखो, जीना बारा मे भगवान वगे गेथो केणयो दानीयल केदलो हातो; भणवा वाळो हमजी लेवा जोवे के आनु मतलब हू से? 16 ता, तीहयी टेमे जे माण्हू युद्धया मे हय, तीहया बडा पोर नाह जाण जोवे; 17 अने जे घोर नी छत पोर हय, तीहयो आहफा ना घोर नु हमान लेवा हेटो नी उतरवा जोवे; 18 जे खेत मे हय, तीहयो आहफा ना लुगडा लेवा करीन पासो नी

आववा जोवे। 19 तीहया दाडा मे जे बयर भारोणे हहे अने सोर ने धाय धवाडती हहे, तीनी जुगू गरा ना दाडा केवाये! 20 वीनती करया करो के हीयाळा ना दाडा मे, नीता अराम ना दाडे नाहवा नी पडे; 21 काहाके तीहयी टेमे घण-जबक गरा आवहे, भगवान कळ घड्यो ततयार गेथी हजु लग एतरी मोटी गरा नी आवी हय, एतरी मोटी गरा आवहे। अने अळी एवी गरा कदी नी आवे। 22 कदीम मालीक तीहया दाडा ने कम नी करतो, ता एक बी जीव नी बचता; बाखीन टाळला माण्हू नी करते जीमने तीहयो टाळलो से, तीहया गरा ना दाडा ने तीहयो कम कर देदलो से। 23 तीहयी टेमे कदीम कोय तमने केय, “देखो! मसीं आजे से ता तमु भरहो नी करजो।” 24 काहाके झुटा मसीं अने भगवान नु नाम लीन झुट मेकणया माण्हू देखव पडहे, अने एवी भारी सेलाणी अने सेल-भातया कामू देखाडहे, हय संके ता तीहया टाळला माण्हू ने बी भगवान ना भरहा गेथा सेटा करवा नी कोसीत करहे। 25 देखो, आहयी आखी वात मे तमने पेले गेथोत की र्यो। 26 कदीम तीहया तमने केय, देखो, हेलो उजाडी बडा मे से, ता तमु तां नी जजो; नीता, तीहया केय, “तीहयो आजे हारीक कोपरा मे से, ता भरहो नी करजो।” 27 काहाके जीसम वीजळी उगवणी गेथी नीकळीन बुडवणी लग वीजळे, तेमेत मनखया नो सोरो बी उजनुतो आवहे! 28 जां बी धोड रेहे, तांत घुवड्या बी भेळा हय जहे। 29 तीहया दाडा मे जतयार वेला पडहे अने अळतेण दाहडु काळ पड जहे, चांद वीजाळू नी आपे, हरगे गेथा तारा हेटा पड जहे, अने हरग नी ताखत हीलाय देहे। 30 तीहयी टेमे हरगे गेथा मनखया ना सोरा नी आववा नी सेलाणी देखाव पडहे। धरती पोर रेणया ने भावणी जातीन माण्हू फुकू-फुकू रडहे, अने मनखया ना सोरा ने मोटी ताखत भेळ, अने बडाय भेळा ना वादळा पोर आवतलो देखे। 31 तीहयो फेपारया वाजा भेळो आहफा ना हरगदुत ने मोकलहे अने तीहया आखी धरती पोर गेथा तीना टाळला माण्हू ने भेळा करहे। 32 गुलर ना झाड ना दाखला नी लारे कंय हीको। जतयार तीना डाळ्या मे कुमळळा डीरा फुटवा बाज जाय अने नवला पागटा नीकळवा बाज जाय, ता तमु जाण लेवो के उनाळो आववा बाज र्यो। 33 आहयीत रीते जतयार तमु मारी केदली आखी वात हयतली देखो, ता जाण लेवो के तीहयो हाते से, अने झापलात पोर से। 34 मे तमने हाचलीन केम के आहयी पीडी ना माण्हू ने खततम हयवान पेलेत मारी केदली वात पुरी हयहे। 35 हरग अने धरती टळ जाय, पण मारी वात कदी नी टळे। 36 मनखया ना सोरा नो आववा नो दाडो अने टेम ना बारा मे कोयने मालम नी हय, नीता हरगदुत ने अने नीता सोरा ने आहयो दाडो अने टेम नीसुतो भगवान बाह एतरोत जाणे। 37 जीसम नुहा ना दाडा मे हयलु हत, तेमेत मनखया नो सोरो आवहे, तीहया दाडे बी हयहे। 38 जे दाडे तक नुहो मोट्ला दुंड्या मे नी भरायो, तांहाक माण्हू खाता-पीता, अने वेवा करता हाता। 39 अने उचकाहलोत पाणी आयो, अने तीहयो आखा ने डुबाडीन मार नाखयो, तांहाक आनु कोयने कंय मालम नी पड्यु तेमेत मनख्यान सोरा नु आवणू बी रेहे। 40 तीहयी टेमे बे अदमी खेत मे हहे, ता एक ने चूट लेहे, अने बीजो री जहे। 41 बे बयरा घट्ये दळता हहे, एक जणी ने चूट लेहे, अने बीजी ने रेवा देहे। 42 एतरे जागीन चेतनी रेवो, काहाके तमने नी मालम के तमरो मालीक काना दाडे आवहे। 43 आहयू वास रीते हमजी लेवो, कदीम घोर ना मालीक ने मालम रेय के चोट्टो राते कानी टेमे आवहे, ता तीहयो जागलो रेय अने आहफा ना घोर मे चोरी नी हयवा देय। 44 एतरे तमु बी तीयार रेवो, काहाके जे घडी ना बारा मे तमु सोचो बी नी, तीहयी घडी मनखया नो सोरो आय लागहे। 45 “एवो कोय ईमानदार अने अककल वाळो, चाकरयो से, जीने तीनो मालीक आहफा ना घोर ना पावरया नो मुर्खी बणावो। अने केय के तु मारा पावरया ने टेमे-टेमे खावा-पीवा नी चीज आपया करजे? 46 जुगाळो से तीहयो पावरयो, जीनो मालीक आवे, ततयार तीहयो तीने होपलु काम करतलो देखे। 47 मे तमने हाचलीन केम, तीहयो मालीक तीने, आहफा ना आखा माल-धन पोर मुर्खी बणावीन ठेरावहे। 48 पण कदीम तीहयो बेमान पावरयो तीना मन मे आहयो वीच्यार करे के मारा मालीक नी आववा मे वार से। 49 करीन तीहयो बीजा हाती पावरया ने ठोकवा, अने बीजा हांगया हाते खाय-पीय। 50 ता तीहया पावरया नो मालीक एवा दाडे आवहे, जतयार तीहयो तीनी वाट नी जोय र्यो हय। अने एवी टेम मे आवहे, जे तीने मालम नी हय। 51 अने मालीक तीने घण भारी डंड आपहे, अने ढोंगडा करन्या हाते भेसकी देहे, अने तीहया तां हारीक फुकू-फुकू रडहे अने दातू ककडावता रेहे।”

**25** तीहयी टेमे हरग नु राज तीहयी दह कुवारी सोरीन तेवू रेहे, जे आहफा ना दीवा लीन लाडा ने भेटवा करीन जी। 2 तीमनी मेनी पांच वण-अकलयाण



हती अने पांच हमजदार हती। 3 तीहयी पांच वण-अकल्याण सोरी दीवा ते लेदी पण दीवा जुगु तेल नी लेदी। 4 पण बीजी पांच हमजदार सोरी दीवा हाते मारणा मे तेल बी ली लेदी। 5 लाडा ने आव्वा मे वार हय जी, ता आखी कुवारी सोरी उंगायवा बाज जी अने हय जी। 6 अने अळतेण आरदी राते कचाट हमळायी, “देखो लाडो आव्वा बाज रयो। तीने भेटवा करीन चालो।” 7 ता तीहयी आखी कुवारी सोरी उठीन आहफी ना दीवा हच करवा बाज जी। 8 वण-अकल्याण, हमजदार कुवारी सोरी ने केदी, “तमारा तेल मे गेथु थोडुक तेल आमने बी आप देवो, काहाके अमारा दीवा ओलायवा बाज रया।” 9 पण हमजदार कुवारी सोरी केदी, “कदीम, अमारी अने तमारी जुगु आहयु तेल पुरी नी पडे। भल आनीत मे से, के तु वेचवा वाळान्तां चतुर तमारी जुगु तेल वेचातु ली लेवो।” 10 अने तीहया कुवारया सोरया तेल लेवा जवात बाज रया हता अने नवल्लो लाडो आय लागयो। तीहयीत टेमे जे तीथार हती, तीहयी तीनी हाते वेवा वाळा घोर मे जत री, अने झापला दी देदा। 11 आनी बाद तीहया बीजा कुवारया सोरया बी आवीन केदा, “मालीक! ए मालीक! अमारी जुगु बी झापलु उगाड दे।” 12 ता नवल्लो लाडो जपाप आप्यो, “मे तमने हाचलीन केम, मे तमने नी जाणु।” 13 एतरे चेतनी रेवो, काहाके तमने मनखया ना सोरा नी आव्वा नी टेम अने दाडो मालम नी हय। 14 हरग राज तीहया माणेह हरकु से, जे पारका देस मे जवा नी टेमे आहफा ना पावरया ने बोलायो अने तीमने आहफा नु धन होप देदो। 15 अने तीहयो एक पावरया ने पांच हजार होना ना सीक्का, बीजा ने बे हजार होना ना सीक्का अने तीसरा ने एक हजार होना ना सीक्का आप्यो। मतलब आखा ने तीमनी ताखत देखीन आप देदो, अळतेण तीहयो पारका देस मे पत रयो। 16 जीने पांच हजार स्रया आपला हता, तीहयो ततयास्त जायन तीहया पयहा नु लेणु-नेणु करयो अने अळी पांच हजार स्रया कमाय लेदो। 17 एमेत जीने बे हजार होना ना सीक्का आपला हता, तीहयो बी अळी बे हजार होना ना सीक्का कमाय लेदो। 18 पण जीने एक हजार होना ना सीक्का आपला हता, तीहयो ज्यो, अने काटु मे खाडो खोदीन आहफा ना मालीक ना होना ना सीक्का हताड देदो। 19 ढेरत दाडा वीत जया अने अळतेण तीहया पावरया नो मालीक पासो आवीन तीमनी पांह हीसाब लेवा बाज ज्यो। 20 जीने पांच हजार होना ना सीक्का आप्या हता, तीहयो अळी पांच हजार कमाय लावीन केदो, “मालीक! तु मने पांच हजार होना ना सीक्का आपलो। देख, मे अळी पांच हजार होना ना सीक्का कमाय लायो।” 21 तीनो मालीक तीने केदो, “घणु वार, भला अने भरहा लायक पावरया! तु थोडुक मे भरहा लायक रयो, मे तने देखकी चीज पोर हक आपही। तारा मालीक नी खुसी मे साजल्यो बण।” 22 अने जीने बे हजार होना ना सीक्का आपला हता। तीहयो केदो, “ए मालीक तु मने बे हजार होना ना सीक्का आपलो। देख, मे अळी बे हजार कमाय लायो।” 23 तीनो मालीक तीने केदो, “घणु वार, भला अने भरहा लायक पावरया! तु थोडुक मे भरहा लायक रेलो से, मे तने देखकी चीज पोर हक आपही। तारा मालीक नी खुसी मे साजल्यो बण।” 24 ततयार तीहयो आयो, जीने एक हजार स्रया आपला हता। तीहयो केदो, “मालीक! मने मालम से के तु घणो वातडो से। तु जां नी वेरयो, तां वाडे, अने जां नी छाट्यो, तां तु हेमटे। 25 एतरे मे बीह ज्यो, अने जायन तारा स्रया ने कादा मे डाटीन हताड देदो, अने देख, आहया तारा होना ना सीक्का से, अने आहया पासला ली ले।” 26 तीनो मालीक तीने केदो, “ए वेरी अने ओगज्या पावरया! तने मालम हतु के ‘मे जां नी वेरयो, तां वाडु, अने जां नी छाट्यो, तां मे हेमटु।’” 27 ता तने मां धन होवकारयान तां ली जायन आप देवा हतु, ता मे पासो आवीन वीयाज भेळ मांग लेतो। 28 एतरे आहया एक हजार होना ना सीक्का आनी पांह गेथा मांग लेवो, अने जीनी पांह दह हजार होना ना सीक्का से, तीने आप देवो; 29 काहाके जीनी पांह कंय से, तीनेत अळी आपहे, अने तीनी पांह ढेरत हय जहे; पण जीनी पांह कंय बी नी हय, तीनी पांह गेथु जे बी से तीहयु बी ली लेहे। 30 अने आहया कमाय पावरया ने बारथु ना अंदारला मे नाख देवो। तां हारीक रडवा अने दातु ककडाव्वा नु रेहे। 31 जतयार मनखया नो सोरो आहफा बडाय भेळ आवहे, अने आखा हरगदुत तीनी हाते आवहे ता तीहयो आहफा नी बडाय नी राजगादी पोर बहलो रेहे। 32 अने आखा देस ना माणहु तीनी अगळ भेळा करहे। जीसम गुवाळ्यो गाडरा ने बोकडा मे गेथो अलग करे, तेमेत तीहयो आखा माणहु ने एक-बीजा गेथो अलग करहे। 33 तीहयो गाडरा ने आहफा नी जमणी धेडे अने बोकडा ने डाखरी धेडे उबा करहे। 34 ता राजो आहफा ना जमणी धेडे वाळा माणहु ने केहे, “ए मारा बाह ना

जुगाळा माणहु! आवो, अने तीहया राज ना हकदारया बणो, जे सुरु गेथु तमारी करते तीथार करतु से; 35 काहाके मे भुकलो हतो, अने तमु मने खवाड्या; मे तरहेलो हतो, अने तमु मने पाणी पीवाडला; मे अंजाणो हतो, अने तमु मने तमारा घोर राख्या; 36 मे नांगरलो हतो, अने तमु मने लुगडा पराया मे मांदलो हतो, अने तमु मारा खबरया आया; मे जेल मे हतो, अने तमु मने मळवा आया।” 37 आहयी वात हमळीन तीहया धरमी माणहु मालीक ने केहे, “ए मालीक! आमू कतयार तने भुकलो देखला, अने खवाडला? कतयार तरहेलो देखला, अने पाणी पीवाडला? 38 आमू कतयार तने अंजाणो देखला अने अमारनितां राख्या? अने कतयार नांगरलो देखला अने लुगडा परावला? 39 कतयार तने मांदलो अने जेल मे देखला अने मळवा आवला?” 40 आहयु हमळीन राजो आहयो जपाप आपहे, “मे तमने हाचलीन केम, तमु मारा आहया बहयो मे काना नान्ला भाय जुगु बी, जे कंय करया, तीहयु मारी जुगु करला से।” 41 “ता तीहयो आहफा ना डाखरी धेडे वाळा माणहु ने केहे, ‘ए खोडला! मारिनां गेथा सेटा हय जावो। तीहयी जलमकी आकठी मे जावो, जे भुतडा जुगु ने तीना दुतु जुगु तीथार करलो से; (aiōnios g166) 42 काहाके मे भुकलो हतो, अने तमु मने खाणु नी खवाड्या; मे तरहेलो हतो, अने तमु मने पाणी नी पीवाड्या। 43 मे अंजाणो हतो, अने तमु मने तमारीनां नी राख्या; मे नांगरलो हतो, अने तमु अने लुगडा नी पराया, मे मांदलो हतो, अने तमु मारा खबरया नी आया, मे जेल मे हतो अने तमु मने मळवा नी आया।’ 44 ततयार तीहया बी तीने पुसहे, ‘मालीक! आमू कतयार तने भुकलो, तरहेलो, अंजाणो, नांगरलो, मांदलो अने जेल मे कुंडायलो देखला अने तारी चाकरी नी करया?’” 45 ता तीहयो तीमने जपाप आपहे, “मे तमने हाचलीन केम, जे कंय तमु मारा आहया नान्ला गेथा बी नान्ला मेना एक जुगु बी नी करया, तीहयु मारी जुगु बी नी करया मुजुक से। 46 अने ईसम करीन आहया वेरी ने जलमको डंड जडहे, पण धरमी ने अमरकाय जीवाय जडहे।” (aiōnios g166)

**26** अने ईसू आखी वात कीदीन आहफा ना चेला ने केदो, 2 “तमु जाणो के बे दाडान बाद फसह नो तीवार से। ता मनखया ना सोरा ने कुस्स पोर चडावीन मारवा करीन माणहु धराय देहे।” 3 तीहयी टेमे डायला पुंजारा अने डायला पुडारी केफा नाम ना डायला पुंजारा नी हवेली मे भेळा हया। 4 अने तीहया आसम करीन वीचयार करया के आमू केम करीन ईसू ने धरायत मरया नाखीया। 5 पण तीहया केता के “तीवार ना दाडे आसम नी करवा जोवे, कंरघ आसम नी हय जाय के आखा माणहु दंगो फसात करे।” 6 जतयार ईसू बेतनया मे सीमोन कुडावा ना घोर मे हतो, 7 ता एक बयर मोगला दयाडा नी हीही मे घण मोगलु ईतर लीन आयी। अने ईसू खाणु खावा बह रयो हतो, ता ईसू ना मुंडा पोर रेड देदी। 8 आहयु देखीन ईसू ना चेला रीहवायन केदा, “आहयु ईतर ने उदडेत काहा बगाड देदी? 9 आहयु ईतर घणु मोगु वेचातु, अने जे स्रया आवता तीहया स्रया ने गरीब मे वाट देती ता वारु रेतु।” 10 ईसू आहयु जाणीन, चेला ने केदो, “तमु आहयी बयर ने काहा दम रया? आहयी मारी वाटु भलु काम करली से। 11 गरीब ते जलम तमारी हाते रेहे, पण मे जलम तमारी हाते नी री सकु। 12 आहयी मारा डील पोर जे ईतर रेडली से तीहयी मने गाडवा करीन तीथार करली से। 13 मे तमने हाचलीन केम, आखी कळी मे जां-जां मारी खुस-खबर ने परचयार करहे, तां आहयी बयर नी फोम मे, अना काम ने बी नामलहे।” 14 अळतेण ईसू ना बारे चेला मेनो एक जणो, जीनु नाम यहुदा ईसकरयोती हतु, तीहयो डायला पुंजारा न ज्यो, 15 अने तीहयो केदो, “कदीम मे ईसू ने तमारा हात मे धराय देम, ता तमु मने हू आपहु? तीहया तीने चांदी ना तीस स्रया गणीन आप देदा।” 16 तीहयी टेमे गेथो यहुदा ईसकरयोती ईसू ने धराववा नो वारु मोखो होदतो रयो। 17 पण खमीर वगर ना रोट्ला ना तीवार ना पेलना दाडे, ईसू ना चेला ईसू ने आवीन केदा, “तु फसह तीवार नु खाणु कां हारो खावा हीड रयो? तां हारा आमू जीया, तने तारी जुगु फसह ना तीवार नु खाणु तीथार करया?” 18 अने ईसू केदो, “हेर मे तीहया अदमीनां जावो, अने तीने केवो, ‘मासतर आहयु की रयो के मारी टेमे हाते आय जेली से, मे मारा चेला हाते तारा घोर फसह तीवार नु खाणु खाही।’” 19 अने ईसू ना चेला जेम ईसू केदो, तेम करया, अने फसह ना तीवार नु खाणु तीथार करया। 20 अने हांती टेमे ईसू बारे चेला हाते खाणु खावा बहयो। 21 अने खाणु खावा नी टेमे ईसू तीमने केदो, “मे तमने हाचलीन केम, तमारी मेनो एक जणो मने धोको दीन धराय देहे।” 22 अने तीहया चेला घणा होहवाय जया। अने तीमनी मेना एक-एक जणो ईसू ने पुसवा बाज जया, “ए मालीक! हू तीहयो मे से?” 23

ततयार ईसु केदो, “जे मारी हाते एक थाळी मे खाणु खाय तीहयो मने धोका सी धरवहे। 24 मनख्या ना सोरा ने ते जवानुत से जेम तीना बारा मे लीखलु से; पण तीहया माणेह जुगु घणी दुख नी वात से, जे मनख्या ना सोरा ने धरायो! तीहयो माणेह पयदा नी हयतो ता वास् रेतु।” 25 ता तीने धराववा वाळो यहुदा ईसु ने पुख्यो, “ए मासतर! तीहयो मे ते नी हय हु? मे से?” ईसु तीने केदो, “होव, हाचलीन तु की देदलो से।” 26 जतयार तीहया खाणु, खावा बाज रया हाता, ता ईसु हात मे रोटलो धरयो, अने रोटला जुगु तु घणो वास् से कीन रोटलो भांगीन आहफा ना चेला ने आपतो जायन केदो, “लेवो, आहया रोटला ने खाय लेवो, आहयो रोटलो मारु डील से।” 27 अळतेण ईसु पीयालो हात मे धरिन घणो वास् से कीन चेला ने आहयु केतो जायन आपयो, “तमु आखा आनी मे गेथु पीवो। 28 काहाके आहयो पीयालो मारा वायदा नु लोय से, जे आखा माणहु ना पाप नी माफी नी लेदे वयवा वाळु से। 29 मे तमने केम, हमणे गेथो जतयार लग मारा बाह ना राज मे तमारी हाते नवला अंगुर नो रोह नी पी लेम, तांह तक मे आहयु अंगुर नु नवल रोह कदी नी पीम।” 30 अळतेण तीहया फसह तीवार नु भजन गावीन जेतुन ना बडा पोर जत रया। 31 तीहयी टेमे ईसु तीमने केदो, “आज रातेत तमारो आखा नो भरहो मार पोर नी रेया। काहाके खरली सासतर मे आहयु लीखलु से: मे गुवाळ्या ने मार नाखही, अने गाडरा नो टोळो रीवणया-तीवणया हय जहे, 32 पण मे पासो जीवतो हयन अळतेण तमारी गेथो पेले गलील जीला मे जत रेही।” 33 एतरी मे पतरस ईसु ने केदो, “भले, आखा तार पोर गेथा भरहो सोड देय, पण मे कदी नी सोडु।” 34 ईसु पतरस ने केदो, “मे तेने हाचलीन केम, आहयीत राते, कुकडो वाहवान पेले, तु मने तीन काव नीकारो करही।” 35 पतरस अळी ईसु ने केदो, “कदीम तारी हाते मने भले मरवा बी पडे, ते बी मे तारो नीकारो नी करु।” अने आखा चेला हेमते केदा। 36 जतयार ईसु चेला हाते गतसमनी नाम नी वाडी मे आयो, ता तीहयो आहफा ना चेला ने केदो, “जतयार लग मे हेले जायन वीनती करीन पासो नी आवु, ततयार लग तमु अज्जेत बहजो।” 37 अळतेण ईसु पतरस ने अने जवदी ना बे सोरा ने हाते ली जयो, अने तीहयो होहवायन अने घबरायवा बाज जयो। 38 अळतेण ईसु तीमने केदो, “मारो मन घण-जबर दुखी से, अने मारो जीव नीकळवा हीडे; तमु अज्जे रेवो, अने मारी हाते चेतनी रीन जागला रेवो।” 39 ईसु थोडोके अगो जायन अळतेण तीहयो धरती पोर हुंगो वळीन वीनती करयो, “ए मारा बाह! कदीम तारी मरजी हय, ता आहयो दुख नो पीयालो टाळ दे। ते बी मारी नी पण तारीत मरजी पुरी हयो।” 40 अळतेण तीहयो आहफा ना चेलान तां जयो, अने तीमने हुवतला देख्यो। अने पतरस ने केदो, “तमने मारी हाते एक घंटो बी नी जगायु हु? 41 जागला रेवो अने वीनती करता रेवो, आनीन करते के तमु पारख मे नी पडो: आत्मा ते तीयार से, पण डील कमजोर से।” 42 ईसु एक कावा अळी, जायन, आहयी वीनती करयो, “ए मारा बाह! कदीम आहयो पीयालो मारा पीया वगर नी टळे, ता तारीत मरजी पुरी हयो।” 43 अळतेण ईसु अळी पासो आयो, ता तीहयो अळी आहफा ना चेला ने हुवतला देख्यो, काहाके तीहया नीदरायला हाता। 44 तीहयो तीमने सोडीन अळी वीनती करवा जयो, अने वीनती ना तीहयात बोलु कीन तीसरी कावा वीनती करयो। 45 अळतेण ईसु आहफा ना चेलानतां आवीन तीमने केदो, “तमु हजु लग हुवीन अरामेत करवा बाज रया हु? देखो! हाव तीहयी टेम आय जेली से, जतयार मनख्या नो सोरो पापी माणहु ना हात मे होप देहे। 46 उठो! आपणु जीया, देखो, मने धोको दीन धराववा वाळो हातेत आववा बाज रयो।” 47 ईसु आहयु केवात बाज रयो हतो के बारे चेला मेनो एक जणो, जीनु नाम यहुदा ईसकरीयोती हत, तीहयो आय लागयो। तीनी हाते ढेरत माणहु तलवारया अने डीगा लीन आय लागया। जीमने डायला पुंजारा अने डायला पुडारी मोकलला हाता। 48 ईसु ने धोको दीन धराववा वाळो यहुदा तीमने आहयु कीन सेलाणी आपलो हातो, “मे जीन कुको देही, तीहयोत ईसु से। तीने धर लेजो।” 49 अळतेण तीहयो यहुदा ईसुनातां आवीन केदो, “ए मासतर! वारलो से के?” अने तीहयो ईसु ने कुको देदो। 50 ईसु तीने केदो, “दोसतीदार! जे कामे तु आवलो से, तीहयु काम कर ले।” ता तीहया माणहु अगा आया, अने ईसु ने चपटीन धर लेदा। 51 अने एतरात मे ईसु ना हाती मेनो एक जणो आहफा नी तलवार मीयान मे गेथी नीकाळीन डायला पुंजारा ना पावरयो नो झटको दीन कानटो तोड नाखयो। 52 ततयार ईसु तीने केदो, “तलवार मीयान मे पासी घाल ले, काहाके जे तलवारये करीन बीजा माणहु ने झटकावे तीहया तलवारये सी मर जे। 53 तमने आहयी वात हमज नी आवती ह, के मे मारा बाह सी वीनती करही

ता, तीहयो हरगदुत ना बारे टोळा गेथा बी जादा टोळा मोकली देहे? 54 पण कदीम मे आसम वीनती करीन हरगदुत बोलाय लेही ता खरली सासतर मे लीखली वात केम पुरी हयहे?” 55 तीहयीत टेमे ईसु माणहु ने केदो, “तमु मने डाकु हमजीन, तलवारया अने डीगा लीन मने धरवा आय रया हु? मे ते दाडिनत मंदीर मे बहीन हीकापण आप्या करतलो, तीहयी टेमे तमु मने काहा नी धरया? 56 आहयु आखु आनीन करते हयु रसु के भगवान वगे गेथा केणया माणहु नी लारे जे बी केदलु हतु तीहयु आखु पुरु हय जाय।” अळतेण आखा चेला ईसु ने रेवा दीन नाह पड्या। 57 अने ईसु ने धराववा वाळा, तीने धरीन डायला पुंजारा केफान तां, जां हरा डायला पुडारी अने चोखली सासतर हीकाडनया भेळा हय रया हाता। 58 अने पतरस बी थोडोके सेटो रीन ईसुन पसळ-पसळ आयो अने डायला पुंजारा ना घोर ना आंणना मे ज्यो, अने ईसु हाते हयतलु तीहयु देववा करीन रखवाळ्या पावरया हाते बह जयो। 59 डायला पुंजारा अने मोटली पंचु ना माणहु मेळीन ईसु ना वीरोद मे वाक काडीन मारवा करीन झटा गवा होद रया हाता। 60 पण तीमने ईसु नो वाक नी नीकळ्यो। भले झटा गवा अगा आवीन झट्टी गवा देदा। आखरी मे बे जणा अगा आया 61 अने केदा, “आहयो अदमी केदलो, ‘मे भगवान ना मंदीर ने ओदार देही, अने तीन दाडा मे तीने अळी उबो कर देही।” 62 अळतेण डायलो पुंजारा उबो हयन ईसु ने केदो, “आहया माणहु तारा वीरोद मे आहयी गवाय दी रया, तीमना वीरोद मे कंय नी केणु हय हु?” 63 पण ईसु होगो हय रयो। अळतेण डायलो पुंजारा ईसु ने केदो, “जीवतला भगवान नी तने आण घालु कदीम तु भगवान नो सोरो मसी हय, ता आमने कदि? 64 ईसु केदो, “होव, तु केदो तेमते से। मे तमने आहयु बी केम, हाव गेथा तमु नीसुता मनख्या ना सोरा ने आखा मे जोरभरया भगवान ना जमणी धेडे बह रेलो अने हरग ना वादळा पोर आवतलो देखहु।” 65 एतरु हमळीन डायलो पुंजारा आहफा ना लुगडा फाडीन केदो, “आहयो भगवान नो वाक काडलो से। ता आमने गवा नु काम नी हय? हमणेत तमु आहया ईसु ने भगवान नो जबरान वाक काडलो हमळला से। 66 तमु आखा नो हु वीचयार से?” तीहया केदा, “आहयो मोत नो डंड आपे एवो से।” 67 अळतेण तीहया ईसु ना मोडा पोर थुपया अने तीने ढीक देदा, अने थोडाक माणहु तीने थपडाट्या, 68 अने आहयु केदा “ए मसी! कदीम तु भगवान वगे गेथी वात केणयो माणेह हय, ता आमने कदि के तने कोय देदु?” 69 अने पतरस तीहयी टेमे बारथो आंणना मे बह रयो हातो। अने एक पावरयाण सोरी हाते आवीन तीने केदी, “तु बी गलील वाळा ईसु हाते हातो।” 70 पण पतरस आखा अगळ ईसु नो नीकारो करतो जायन केदो, “तु हु केवा बाज री मे नी जाणतो।” 71 अळतेण पतरस झापला नी पयडी भणी जयो, पण एक अळी बीजी पावरयाण तीने देखी अने तां हारीक उबा हय रेलो माणहु ने केदी, “आहयो अदमी बी ईसु नासरी हाते हातो।” 72 एक काव अळी पतरस नीकारो करयो अने आण घालीन केदो, “मे हीयया अदमी ने जाणु लग नी।” 73 अने थोडीक वार मे तां उबा हय रेलो माणहु पतरस ने तां जायन केदा, “हाचलीन, तु बी तीमनी मेनो एक जणो से; काहाके तारी बोली चोखीझण उजन्तो कर देय के तु तांत वाळो से।” 74 आहयी वात हमळीन पतरस भलु थुंडु कीन हाम खायन केवा बाज जयो, “मे हीयया अदमी ने जाणु लग नी।” अने तेतरी घडी कुकडो वाह देदो। 75 अने ततयार पतरस ने ईसु जे केदलो तीहयु फोम आयु, “कुकडो वाहवान पेले तु मारो तीन कावा नीकारो करही।” अने तीहयो बारथो नीकळीन पुकु-पुकु रडवा बाज जयो।

**27** हवारे वेगात डायला पुंजारा अने माणहु ना डायला पुडारी आखा मेळीन ईसु ने मार नाखवा नी योजना बणया। 2 अने अळतेण तीहया ईसु ने बांदीन ली ज्या अने डायला अदीकारी पीलातुस ना हात मे होप देदा। 3 जतयार ईसु ने धराववा वाळो यहुदा आहयु देखयो के तीहया ईसु ने गुनाळ्ळो ठेरावीन डंड आप देदा, ता यहुदा ने घणो दुख लागयो, अने तीहयो डायला पुंजारातलां अने पुडारयातलां चांदी ना तीस स्पया पासो आपवा जयो, 4 अने तीहयो केदो, “मे वण-गुनाळ्ळया माणेह ने मार नाखवा करीन धरावीन पाप करलो से।” पण तीहया माणहु केदा, “आमु हु करया! हीययी वात तुत देख ले।” 5 आहयु हमळीन यहुदा चांदी ना सीकला मंदीर मे नाख देदो अने जायन गळा मे दोडु बांदीन टंगायन मर जयो। 6 डायला पुंजारा चांदी ना स्पया चट्टीन केदा, “आहया स्पया ने खजाना मे मेकवा वास नी हय, आहयी ते लोय ना दाम से।” 7 एतरे तीहया वीचयार काड्या अने अळतेण तीहया स्पया नो, माणहु ने गाडवा करीन कुमायडा नु खेतर वेचातु ली लेदा। 8 एतरे तीहयो खेतर आज लग लोय नो खेतर केवाये। 9 आहयी रीते

यीरभया, भगवान वगैरे गेथो वात केणया नो आहयो बोल पुरो हयो: “तीहया चांदी ना तीस स्रया लीन जया, आहया स्रया ईस्रायल ना माणह आपवा करीन बोली करला हता। 10 अने जेम मालीक मने हुकम आपलो हतो तीनात अनसारे तीहया स्रया आपीन कुमायडा नु खतर वेचातु ली लेदा।” 11 ईसु हाव रोमी अदीकारी पीलातुस अगळ उबो हय रयो हतो। रोमी अदीकारी तीने पुछ्यो, “तु युहदी नो राजा से हु?” ईसु केदो, “होव, जेम तु केदो तेमेत से।” 12 जतयार डायला पुंजारा अने डायला पुडारी तीना पोर गुनो लगाडता हता, ता ईसु तीमने कंय नी केदो। 13 ततयार पीलातुस ईसु ने पुछ्यो, “तने नी हमळायतु हु के आहया तार पोर केतरा गुना लगाड रया?” 14 ते बी ईसु जपाप मे एक बोल बी नी केदो। आनीन करते रोमी अदीकारी घण-जबर वहराय ज्यो। 15 फसह ना तीवार ना दाडे अदीकारी नी आहयी रीती हती के तीहयो आहया तीवार पोर काना बी एक केदडा ने माणह नी मरजी नी अनसारे जेल मे गेथा छोड्या करतो हतो। 16 तीहयी टेमे तां हारो एक बरबबा नाम नो एक डामीस केदडो जेल मे हतो। 17 एतरे पीलातुस भेळा हय रेला माणह ने केदो, “तमने हु जोवे? मे तमारी जुगु कोयने सोड देम? बरबबा ने के मसी केवायवा वाळा ईसु ने सोडु?” 18 पीलातुस ने मालम हतु, के तीहया ईसु मसी ने कुहराये धरावला से। 19 पीलातुस जतयार नीयाव नी गादी पोर बह रयो हतो ता तीनी घोरवाळी तीने आहयी खबर की मोकली, “हीहया धरमी माणेह ने कंय बी डंड नी आपजे, काहाके हीनात कारण सी मने आज राते हपना मे घणी वेला झेलवा पडली से।” 20 पण डायला पुंजारा अने डायला पुडारी माणह ने मनवी लेदा के तमु पीलातुस ने केवो के तु बरबबा ने सोड दे आने ईसु ने मराय नाख। 21 अदीकारी पीलातुस अदी तीमने पुछ्यो, “तमने हु जोवे? मे आहया बे जणा मेना ने कोयने सोड देम?” तीहया केदा, “बरबबा ने सोड दे।” 22 एतरे पीलातुस तीमने केदो, “ता मे ईसु नु हु करू, जे मसी केवाये?” आखा की पड्या, “ईने कुस्स पोर चडावो।” 23 पण पीलातुस पुछ्यो, “काहा? हीहयो कानो गुनो करलो से?” बावीन तीहया अळी बी जयारे आडीन केदा, “ईने कुस्स पोर चडावो।” 24 पीलातुस आहयु देख्यो के आहया मारी वात नी हमळता अने उलटो दंगो हय रयो, ता तीहयो पाणी मांगीन माणह अगळ हात धोयो अने केदो, “मे आहया धरमी माणेह ना लोय नो गुनाळ्ळो नी हय। आहयी वात ने तप्त जाणो।” 25 अने आखा माणह जपाप आप्या, “आनु लोय वयाडवा नो गुनो आमारी पोर, अने आमारी अवलयात पोर पडवा दे।” 26 अळतेण पीलातुस तीमनी जुगु बरबबा ने सोड देदा, अने ईसु ने चपका दीन कुस्स पोर चडावो करीन सीपायडा ना हात मे होप देदो। 27 अळतेण रोमी अदीकारी पीलातुस ना सीपायडा ईसु ने हवेली ना आंगणा मे ली जायन तीनीन्तां आखा सीपायडा ना टोळा भेळा कर लेदा। 28 तीहया तीना लुगडा काडीन तीने रातलु नाब्लु डालु पराया, 29 अने काटा वाळा झाटवा नु मुख्यु गुथीन तीना मुंडा पोर मेलया, अने तीना जमणा हात मे वाहण नी होटी धराय देदा। अने तीहया तीनी अगळ मांडा टेकीन आहयु केता जायन तीनी हाही उडाडता जीन केदा, “ए युहदी ना राजा वारलो से के!” 30 अने तीहया तीना मोडा पोर थुपया अने तीना हात मे वाळी वाहण नी होटी तीना मुंडा पोर देता जया। 31 अळतेण तीहया तीनी हाही कर चुक्या ता तीहया तीनु नाब्लु डालु नीकाळ देदा अने तीने तीनात लुगडा पराया अने तीने कुस्स पोर चडाववा करीन ली जया। 32 जतयार तीहया हेर मे गेथा नीकळीन जवा बाज रया हता, ता तीमने कुरेनी गाम मे रेणयो सीमोन नाम नो एक माणेह भेटयो। अने तीहया तीने ईसु नु कुस्स जोर करीन उचलाड्या। 33 तीहया गुलगुता नाम ना जाणो पुराया, जीनु मतलब से, “माणह ना खोपडी नो जाणो।” 34 तां तीहया माणह ईसु ने कडवल्लु भेसकायलु अंगुर नो रोह पीवा आप्या। तीहयो तीहया रोह ने चाखी ते लेदो, पण पीवा सी मना कर देदो। 35 ततयार तीहया ईसु ने कुस्स पोर चडाया, अने चीट्टया नाखीन तीना लुगडा वाट लेदा। 36 अळतेण तीहया तीनां बहीन ईसु नो पहरो देवा बाज जया। 37 अने तीहया ईसु ना मुंडा गेथी उपर कुस्स पोर गुनो लीखीन एक चीट्टी ठोक देदा, के आहयु युहदयो नो राजा मसी से। 38 तीहया ईसु हाते बे चोटटा ने बी कुस्स पोर चडाया, एक ने तीना जमणी धेडे अने एक ने तीना डाखरी धेडे चडाया। 39 अने तां मायन आववा अने जवा वाळा माणह मुंडु हीलावीन तीनी हाही उडाडता हता अने तीनो वाक काड्या। 40 अने ईसम केता हता, “ए मंदीर ने ह्यारवा वाळा अने तीन दाडा मे तीने पासो बणाववा वाळा। कदी तु भगवान नो बेदो हय ता, आहफा ने बचाड, अने कुस्स पोर गेथो उतरिन आव।” 41 आहयी रीते, डायला पुंजारा बी चोखली सासत

हीकाडनया अने डायला पुडारी हाते, ईसम केता जायन तीनी हाही उडाडता हता, 42 “हीहयो बीजा ने बचाडयो, पण आहफा ने नी बचाड सक्यो। आहयो ते ईस्रायली माणह नो राजा से। हाव कुस्स पोर गेथो उतरिन आव, ता आम् आनी पोर भरहो करहु। 43 आहयो भगवान पोर भरहो करे। कदीम भगवान हीने छुटकारो आपवा हीडतो हय, ता हीने सोडाय ले। काहाके आहयो केदलो हतो, ‘मे भगवान नो सोरो से।’” 44 आडे-धेडे कुस्स पोर चडावला डाकु बी आहयी रीते वाक काडीन हाही उडाडता हता। 45 माथे दाडे सी मांजणीक दाडे लग आखा देस मे अंदारु सवायलु रयु। 46 मांजणीक दाडे ईसु जयारेत आडीन केदो, “एली! एली! लमा सबकतनी?” आनु मतलब “ए मारा भगवान, ए मारा भगवान, तु मने काहा सोड देदो?” 47 जे तां उबा रेवा वाळा माणह मे सी थोडाक आहयु हमळीन केवा बाज जया, आहयो ते एलीया ने आडवा बाज रयो। 48 अने तीमनी मे गेथो एक ममार दवडयो, अने पोतु ने लीन अंगुर ना कडवला रोह मे डुबाडयो अने वाहण ना टोकरा पोर मेलीन तीने चुहाडयो। 49 थोडाक माणह केदा, रेवा दे! देखजे हीने एलीयो बचाडवा आवे के नी आवे। 50 अने अळतेण ईसु जयारेत आडयो अने जीव सोड देदो। 51 तीहयी टेमे मंदीर नो पडदो उपर गेथो हेदो लग, फाटीन बे ठेपाडा हय ज्यो, धरती हील जी अने चाफर्या फाट जया 52 अने तीहयी टेमे मडाटया लग उगडी जया, अने भगवान ना मरला चोखला माणह ना धोडु पासो जीवता हय जया। 53 अने तीहया मडाटया मे गेथा नकळी आया अने ईसु ने जीवतो हयवान अळतेण यस्सलेम ना चोखला हेर मे जायन ढेरत माणह ने देखाव पड्यो। 54 सुबदेर अने तीनी हाते ईसु नो पेहरो देणया सीपायडा धरती हीलीन धडडनु अने जे कंय हय तीहयु आखु देखीन घण-जबर बीही जया, अने की पड्या, हाचलीन! आहयो भगवान नो सोरो हतो। 55 तां ढेरत बयरा बी उबा हय रया हता। तीहया ईसु नी सेवा-चाकरी करवा करीन गलील जीला मे गेथा तीमनी हाते-हाते आवला हता। 56 तीमनी मे मरीयम मगदलीनी, याकुब अने यूसुफ नी आयह मरीयम, अने जबदी ना सोरा नी आयह हती। 57 हातीं टेमे अरीमीतीया हेर नो एक मालदार अदमी आयो। तीनु नाम यूसुफ हतु, अने तीहयु बी ईसु नो चेलो बण जेलो हतो। 58 तीहयो पीलातुस नी तां जायन ईसु नो धोड मांग्यो, अने पीलातुस हुकम आप्यो के धोड यूसुफ ने आप देवो। 59 यूसुफ ईसु नो धोड ली ज्यो, अने तीना धोड ने एक धोळ्ळा लुगडा मे लपटयो। 60 अने आहफा जुगु चाफर्या मे खोडाडीन बणावला मडाटया मे तीहया धोड ने मेक देदो, अने तीहयो चाफर्या ना मडाटया ना झापला पोर मोटलो दगडो ढबळावीन जत रयो। 61 मरीयम मगदलीनी अने बीजी मरीयम तां मडाटया अगळ बही री हती। 62 अराम ना दाडा नी तीयारी ना बीजा दाडे डायला पुंजारा अने फरीसी पंथवाळा भेळा हयन पीलातुस नी तां जया। 63 अने केदा, “ए मालीक! आमने फोम से के तीहयो धोको देवा वाळो जतयार जीवतलो हतो, ता केदलो हतो के ‘मे तीसरे दाडे अळी पासो जीवतो हय जही।’ 64 एतरे तीन दाडा लग मडाटया नी रखवाळी करवा नो हुकम आप। कदीम ईसम नी हय जाय, के तीना चेला हीने चोरी करीन लीत्ती रेय, अने माणह सी केय के ईसु मरला मे गेथो पासो जीवतो हय ज्यो। आहयो पासलो धोको ते पेलना धोका गेथो बी जादा रतदी हयहे।” 65 पीलातुस केदो, “पहरो देणया सीपायडा ने ली जावो, अने जीसम तमने हमज मे आवे तेमेत मडाटया नी रखवाळी करजो।” 66 तीहया जया अने मडाटया ना झापला पोर लागला दगडा पोर सील लगाड देदा। अने मडाटया नी रखवाळी करवा बाज जया।

**28** अराम ना दाडान बाद हपता ना दाडे परगड फाटतेत मरीयम मगदलीनी अने बीजी मरीयम मडाटया ने देखाव आयी। 2 अने देखो, धरती हीली, काहाके मालीक नो एक दूत हरगे गेथो उतरयो अने हाते आवीन तीहयो दगडा ने ढबळाय देदो, अने तीनी पोर बह ज्यो। 3 तीनो स्प वीजळीन तेम अने तीना लुगडा बरप ने तेम धोळा हता। 4 तीना बीक सी झापले पेहरो देणया काप उदया, अने मरला हरका हय जया। 5 हरगदूत बयराम ने केदो, “ना बीहो, मे जाणु के तमु ईसु ने जे कुस्स पोर चडावला तीने होदवा बाज री 6 तीहयो आवे नी हय, पण आहफा बोलु नी अनसारे जीवतो हयलो से। आवो, आहयो जागो देखो, जां ईसु मालीक ने मेकला हतो, 7 अने ममार जायन तीमना चेलाम ने केवो के तीहयो मरला मे गेथो पासो जीवतो हय जेलो से, अने तीहयो तमारी गेथो पेले गलील मे जत रयो, तां तीने देखहु! देखो, मे तमने देखाड देदो।” 8 अने तीहया बीक अने

मोटी खुसी हाते मडाट्या मे सी ममार पासी आवीन तीमना चेलाम ने खबर आपवा दवडी पडी। 9 ततयार ईसु तीमने भेट्यो। अने केदो, “सुखी रेवो” तीहया हाते आवीन अने तीना पोग धरीन तीने वांदया। 10 ततयार ईसु तीमने केदो, “ना बीहो; मारा भायु सी जायन केवो के गलील मे जत रेय तां मने देखहु।” 11 तीहयी जवात बाज री हती के पेहरो देणया मे गेथा थोडाक माणहु हेर मे आवीन आखी वात डायला पुंजारा ने हमळया। 12 ततयार तीहया डायला पुडारी नी हाते भेळा हयन वीचयारीन अने सीपायडा ने ढेरका चांदी ना सीक्का आपया, 13 अने केदा, “आहयु केजो के राते जतयार आमु हववा बाज रेला हता, ततयार ईसु ना चेला आवीन तीना धोड ने चोरी कर ली जया। 14 अने आहयी वात सुखी-डायला ना कानटा लग पुग जहे, ता आमु तीने हमजाड लेहु अने तने फीकर करवा सी बचाड लेहु।” 15 तीहया स्प्या लीन जेम हीकाडला हता, तेमेत करया। आहयी वात आज लग युहदया मे चाल री। 16 गयारे चेला गलील मे तीहया बडा पोर जया, जीने ईसु तीमने देखाडलो हतो। 17 जतयार तीहया ईसु ने देखया ता तीनी भक्ती करया। पण कोय-कोय ना मन मे सणका हयी। 18 ईसु तीमनी हाते आवीन केदो, “हरग अने धरती नो आखो हक मने आपलो से। 19 आनीन करीन तमु जावो, आखा राज्य ना माणहु ने चेला बणावो; अने तीमने बाह, अने सोप, अने चोखली आत्मा नी नाम सी बपतीसमा आपो, 20 अने तीमने आखी वात जे मे तमने हुकम आपलो से, मानवा हीकाडो: अने देखो, मे कळी ना आकरी लग सदा तमारी हाते से।” (aiōn g165)





## The New Jerusalem

*"I saw the holy city, New Jerusalem, coming down out of heaven from God, prepared like a bride adorned for her husband. I heard a loud voice out of heaven saying, 'Behold, God's dwelling is with people, and he will dwell with them, and they will be his people, and God himself will be with them as their God.'"*

Revelation 21:2-3

# Reader's Guide

Bareli, Palya at [AionianBible.org/Readers-Guide](http://AionianBible.org/Readers-Guide)

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

# Glossary

Bareli, Palya at [AionianBible.org/Glossary](http://AionianBible.org/Glossary)

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

## **Abyssos** g12

*Greek:* proper noun, place

*Usage:* 9 times in 3 books, 6 chapters, and 9 verses

*Meaning:*

Temporary prison for special fallen angels such as Apollyon, the Beast, and Satan.

## **aidios** g126

*Greek:* adjective

*Usage:* 2 times in Romans 1:20 and Jude 6

*Meaning:*

Lasting, enduring forever, eternal.

## **aiōn** g165

*Greek:* noun

*Usage:* 127 times in 22 books, 75 chapters, and 102 verses

*Meaning:*

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

## **aiōnios** g166

*Greek:* adjective

*Usage:* 71 times in 19 books, 44 chapters, and 69 verses

*Meaning:*

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

## **eleēsē** g1653

*Greek:* verb, aorist tense, active voice, subjunctive mood, 3rd person singular

*Usage:* 1 time in this conjugation, Romans 11:32

*Meaning:*

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See [ntgreek.org](http://ntgreek.org).



**Geenna** g1067

*Greek:* proper noun, place

*Usage:* 12 times in 4 books, 7 chapters, and 12 verses

*Meaning:*

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

**Hadēs** g86

*Greek:* proper noun, place

*Usage:* 11 times in 5 books, 9 chapters, and 11 verses

*Meaning:*

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

**Limnē Pyr** g3041 g4442

*Greek:* proper noun, place

*Usage:* Phrase 5 times in the New Testament

*Meaning:*

Lake of Fire, final punishment for those not named in the Book of Life, prepared for the Devil and his angels, Matthew 25:41.

**Sheol** h7585

*Hebrew:* proper noun, place

*Usage:* 66 times in 17 books, 50 chapters, and 64 verses

*Meaning:*

The grave or temporal afterlife world of both the righteous and unrighteous, believing and unbelieving, until the general resurrection.

**Tartaroō** g5020

*Greek:* proper noun, place

*Usage:* 1 time in 2 Peter 2:4

*Meaning:*

Temporary prison for particular fallen angels awaiting final judgment.

# Glossary +

[AionianBible.org/Bibles/Bareli-Palya---Palya-Bareli-Bible/Noted](http://AionianBible.org/Bibles/Bareli-Palya---Palya-Bareli-Bible/Noted)

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. \* The note placement is skipped or adjusted for verses with non-standard numbering.

## **Abyssos**

Luke 8:31  
Romans 10:7  
Revelation 9:1  
Revelation 9:2  
Revelation 9:11  
Revelation 11:7  
Revelation 17:8  
Revelation 20:1  
Revelation 20:3

## **aidios**

Romans 1:20  
Jude 1:6

## **aiōn**

मत्ती 12:32  
मत्ती 13:22  
मत्ती 13:39  
मत्ती 13:40  
मत्ती 13:49  
मत्ती 21:19  
मत्ती 24:3  
मत्ती 28:20  
Mark 3:29  
Mark 4:19  
Mark 10:30  
Mark 11:14  
Luke 1:33  
Luke 1:55  
Luke 1:70  
Luke 16:8  
Luke 18:30  
Luke 20:34  
Luke 20:35  
John 4:14  
John 6:51  
John 6:58  
John 8:35  
John 8:51  
John 8:52  
John 9:32  
John 10:28  
John 11:26  
John 12:34  
John 13:8  
John 14:16

Acts 3:21  
Acts 15:18  
Romans 1:25  
Romans 9:5  
Romans 11:36  
Romans 12:2  
Romans 16:27  
1 Corinthians 1:20  
1 Corinthians 2:6  
1 Corinthians 2:7  
1 Corinthians 2:8  
1 Corinthians 3:18  
1 Corinthians 8:13  
1 Corinthians 10:11  
2 Corinthians 4:4  
2 Corinthians 9:9  
2 Corinthians 11:31  
Galatians 1:4  
Galatians 1:5  
Ephesians 1:21  
Ephesians 2:2  
Ephesians 2:7  
Ephesians 3:9  
Ephesians 3:11  
Ephesians 3:21  
Ephesians 6:12  
Philippians 4:20  
Colossians 1:26  
1 Timothy 1:17  
1 Timothy 6:17  
2 Timothy 4:10  
2 Timothy 4:18  
Titus 2:12  
Hebrews 1:2  
Hebrews 1:8  
Hebrews 5:6  
Hebrews 6:5  
Hebrews 6:20  
Hebrews 7:17  
Hebrews 7:21  
Hebrews 7:24  
Hebrews 7:28  
Hebrews 9:26  
Hebrews 11:3  
Hebrews 13:8  
Hebrews 13:21  
1 Peter 1:23

1 Peter 1:25  
1 Peter 4:11  
1 Peter 5:11  
2 Peter 3:18  
1 John 2:17  
2 John 1:2  
Jude 1:13  
Jude 1:25  
Revelation 1:6  
Revelation 1:18  
Revelation 4:9  
Revelation 4:10  
Revelation 5:13  
Revelation 7:12  
Revelation 10:6  
Revelation 11:15  
Revelation 14:11  
Revelation 15:7  
Revelation 19:3  
Revelation 20:10  
Revelation 22:5

## **aiōnios**

मत्ती 18:8  
मत्ती 19:16  
मत्ती 19:29  
मत्ती 25:41  
मत्ती 25:46  
Mark 3:29  
Mark 10:17  
Mark 10:30  
Luke 10:25  
Luke 16:9  
Luke 18:18  
Luke 18:30  
John 3:15  
John 3:16  
John 3:36  
John 4:14  
John 4:36  
John 5:24  
John 5:39  
John 6:27  
John 6:40  
John 6:47  
John 6:54  
John 6:68

John 10:28  
John 12:25  
John 12:50  
John 17:2  
John 17:3  
Acts 13:46  
Acts 13:48  
Romans 2:7  
Romans 5:21  
Romans 6:22  
Romans 6:23  
Romans 16:25  
Romans 16:26  
2 Corinthians 4:17  
2 Corinthians 4:18  
2 Corinthians 5:1  
Galatians 6:8  
2 Thessalonians 1:9  
2 Thessalonians 2:16  
1 Timothy 1:16  
1 Timothy 6:12  
1 Timothy 6:16  
2 Timothy 1:9  
2 Timothy 2:10  
Titus 1:2  
Titus 3:7  
Philemon 1:15  
Hebrews 5:9  
Hebrews 6:2  
Hebrews 9:12  
Hebrews 9:14  
Hebrews 9:15  
Hebrews 13:20  
1 Peter 5:10  
2 Peter 1:11  
1 John 1:2  
1 John 2:25  
1 John 3:15  
1 John 5:11  
1 John 5:13  
1 John 5:20  
Jude 1:7  
Jude 1:21  
Revelation 14:6

## **eleēsē**

Romans 11:32

## **Geenna**

मत्ती 5:22  
मत्ती 5:29  
मत्ती 5:30  
मत्ती 10:28  
मत्ती 18:9  
मत्ती 23:15  
मत्ती 23:33  
Mark 9:43

Mark 9:45  
Mark 9:47  
Luke 12:5  
James 3:6

## **Hadēs**

मत्ती 11:23  
मत्ती 16:18  
Luke 10:15  
Luke 16:23  
Acts 2:27  
Acts 2:31  
1 Corinthians 15:55  
Revelation 1:18  
Revelation 6:8  
Revelation 20:13  
Revelation 20:14

## **Limnē Pyr**

Revelation 19:20  
Revelation 20:10  
Revelation 20:14  
Revelation 20:15  
Revelation 21:8

## **Sheol**

Genesis 37:35  
Genesis 42:38  
Genesis 44:29  
Genesis 44:31  
Numbers 16:30  
Numbers 16:33  
Deuteronomy 32:22  
1 Samuel 2:6  
2 Samuel 22:6  
1 Kings 2:6  
1 Kings 2:9  
Job 7:9  
Job 11:8  
Job 14:13  
Job 17:13  
Job 17:16  
Job 21:13  
Job 24:19  
Job 26:6  
Psalms 6:5  
Psalms 9:17  
Psalms 16:10  
Psalms 18:5  
Psalms 30:3  
Psalms 31:17  
Psalms 49:14  
Psalms 49:15  
Psalms 55:15  
Psalms 86:13  
Psalms 88:3  
Psalms 89:48

Psalms 116:3  
Psalms 139:8  
Psalms 141:7  
Proverbs 1:12  
Proverbs 5:5  
Proverbs 7:27  
Proverbs 9:18  
Proverbs 15:11  
Proverbs 15:24  
Proverbs 23:14  
Proverbs 27:20  
Proverbs 30:16  
Ecclesiastes 9:10  
Song of Solomon 8:6  
Isaiah 5:14  
Isaiah 7:11  
Isaiah 14:9  
Isaiah 14:11  
Isaiah 14:15  
Isaiah 28:15  
Isaiah 28:18  
Isaiah 38:10  
Isaiah 38:18  
Isaiah 57:9  
Ezekiel 31:15  
Ezekiel 31:16  
Ezekiel 31:17  
Ezekiel 32:21  
Ezekiel 32:27  
Hosea 13:14  
Amos 9:2  
Jonah 2:2  
Habakkuk 2:5

## **Tartaroō**

2 Peter 2:4

## **Questioned**


None yet noted



*"By faith, Abraham, when he was called, obeyed to go out to the place which he was to receive for an inheritance. He went out, not knowing where he went"*

Hebrews 11:8

# Israel's Exodus



*"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt!'" Exodus 13:17*



*"For the Son of Man also came not to be served, but to serve, and to give his life as a ransom for many"*

Mark 10:45



*"Paul, a servant of Jesus Christ, called to be an apostle, set apart for the Good News of God"*

Romans 1:1

## Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

**Jesus Christ born 4 B.C.**

## New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

**Resurrected 33 A.D.**



<b>What are we?</b> ▶			Genesis 1:26 - 2:3		Mankind is created in God's image, male and female He created us				
<b>How are we sinful?</b> ▶			Romans 5:12-19		Sin entered the world through Adam and then death through sin				
<b>Where are we?</b> ▶			<b>When are we?</b> ▼						
			Innocence		Fallen			Glory	
▶			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth
			God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light		
Son	God's perfect fellowship	John 8:58 Pre-incarnate		John 1:14 Incarnate	Luke 23:43 Paradise				
Holy Spirit		Psalm 139:7 Everywhere		John 14:17 Living in believers					
Mankind	Living	Genesis 1:1 No Creation No people	Genesis 1:31 No Fall No unholy Angels	Ephesians 2:1-5 Serving the Savior or Satan on Earth			Matthew 25:41 Revelation 20:10  Lake of Fire prepared for the Devil and his Angels		
	Deceased believing			Luke 16:22 Blessed in Paradise					
	Deceased unbelieving			Luke 16:23, Revelation 20:5,13 Punished in Hades until the final judgment					
Angels	Holy	Genesis 1:1 No Creation No people	Genesis 1:31 No Fall No unholy Angels	Hebrews 1:14 Serving mankind at God's command			Revelation 20:13 Thalaasa  Revelation 19:20 Lake of Fire  Revelation 20:2 Abys		
	Imprisoned			2 Peter 2:4, Jude 6 Imprisoned in Tartarus					
	Fugitive			1 Peter 5:8, Revelation 12:10					
	First Beast			Rebelling against Christ Accusing mankind					
	False Prophet								
Satan									
<b>Why are we?</b> ▶			Romans 11:25-36, Ephesian 2:7		For God has bound all over to disobedience in order to show mercy to all				

# Destiny

Bareli, Palya at [AionianBible.org/Destiny](http://AionianBible.org/Destiny)

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, *"You did not choose me, but I chose you,"* John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philipians 2:9-11.



आनीन करीन तम् जावो, आखा राज्य ना माण्ह ने चेला बणावो; अने तीमने बाह, अने सोरा, अने चोखली आत्मा नी नाम सी बपतीसमा आपो, - मत्ती 28:19